


# NSÒMBELU WEBÈ

## MMUKÙMBÀNYÌNE

### ÈVÀNJEELÌYÒ ANYÌ?

 Twǎnjì tushaalaayi biimanyine kuulu katanci kakese cyanaana, patudi twinyika mitu mpindyewu bwa kweyemena Mukalenge apa. Piikalaku malomba kampanda a kumanyisha kudi Nzambi, bu wêwè mwa kuswa ela anu cyanza cyebe muulu mpindyewu kudiYe pa dîbà edi, nunku ewu, nenku ushaale mulame pa mwoyi webe cyûdi ukeba aci.

<sup>2</sup> Taatù wetu wa mu Dyulu, tudi ne kusakidila bwa dituku dikwabo edi. Nenku mpindyewu ndyedi dikaadi dibange kudisakidila; nediikale bwalu bulonda. Masangisha a mu dinda emu akaadi mamane kupita. Mêyì adi mambiibwe akaadi mu mpepele, pa mukaba wa mêyì, ne netwikale ne cya kutuutakeena naaWu dîngà dituku. Nebikengele kwikalaci anyi cya bushuwa anyi cya mashimi. Kadi twètù tudi—tudi twitabuujja ne Didi dya bushuwa, bwalu Didi Dîyì Dyebe.

<sup>3</sup> Mpindyewu, tudi tulomba bwa Wêwè kutukumbajila, diloolo edi, malomba atudi tulomba aa. Ne byanza byetu, bitudi beele muulu ebi, tudi tufila malomba etu. Wêwè ukaavwa mumanye bituvwa naabi dijinga, ne bitudi tulomba. Pa nanku tudi tulomba bwa Watwandamunaku, Mukalenge, ne watupaku cidi majinga a myoyi yetu, mbwena kwamba ne, piikalabi ne tudi mwa kukwata naaci mudimu bwa kukutwa Wêwè mushinga. Enzaku nanku, Mukalenge.

<sup>4</sup> Ondopaku masaama adi munkaci mwetu. Umushaku mpekaatu yònsò ne bupidya bwònsò. Utupe Ebe. . .cyakabidi citupa cya mabeneshà Ebe, diloolo edi, Mukalenge, patudi twelangana meeji pa Dîyì apa, ne cikondo cya dîbà citudi ne mwoyi eci. Tudi badisangishe, Taatù, kacyi mu kiipacila kakwabo to anu bwa kuteeta bwa kuyiila mushindu wa kwikala ne nsòmbelu mutambe kulengela, ne bwa kwikala ne nsòmbelu wa mutambe kuseemenenangana Neebe. Bwalu nyewu tumona dituku dyenda diseemena, ne twètù tudi ne cya kwikala tudisangisha misangu yàbûngì, bwa kupeta dileeja dya njila dya kûdi Wêwè. Enzaku nanku, Taatù, mu Dînà dya Yesu. Amen.

Twasakidilaayi. Nudi mwa kusòmbaayi.

<sup>5</sup> Ndi mumanye ne kudi luuya lubi be, ne mwaba mwine ewu mùle tente mudiwu emu. Nenku tudi tuumvwa bitutacisha bwa patudi katuyi ne. . . byamu bifidi bya citaleela. Nenku mèmè. . .

Pàmwāpa aci neciikale . . . Kudi bintu bibidi bîndi njinga kwenza bwa ekeleeziya, pândi anu mpeta mushindu wa kwalukila mu mushindu wûndi muswe kwalukila awu, mêmè mwalukile mu masangisha mu mushindu udi ukengediibwa. Ndi muswe ci—cisanji cya piano, mwaba udici cisòmba mu mushindu ewu, mu mushindu wa ne mwimbi wa cisanji cya piano neikale mutangile kudi disangisha. Ndi muswe cisanji cya orgue lwà ku elu luseke; ne cyamu cifidi cya citaleela. Pa dîbà adi ndi ndyumvwa ne cyôci aci nciidi cifwanyine kwikalaku. Ne pa nanku tudi . . . Netwikale mwa kweyemena Mukalenge, ne netumanye ne Yêyè neatukumbajile cyôci aci.

<sup>6</sup> Ngeela meeji, mbangambile ne, Mwaneetu Hickerson mmufume ku dyangata *eci* mu cikandakanda. Ûvwa muciteeke pa meesa aanyi a mudimu paanyima pàapa. Ncisumbu cya Banjelo cidi mu cikandakanda cidibo bambe aci. Nudi numona mbungakeenu wa cipaapu cya musaka awu anyi? Tangilaayi Ewu nunku ku *elu* luseke, dipwapwa disongoloke, mwikale ulwa ne cyâdi citadika mushindu ewu, ku dyabalume dyanyi. Anu mûmvwà mwambe mu cyambilu cimwecimwe eci, kukaadi ngondo ne ngondo ne ngondo, nwamonu's, s'ki Cyôci aci. Nenku cikandakanda cya *Look* . . . Anyi, cikandakanda cya *Life* nciidi ciCipatule, no—nomba wa ngondo mwitânù, matuku 17 a ngondo mwitânù, ngeela meeji mmwômò. Ncya bushuwa anyi? Matuku 17 a ngondo mwitânù, nomba awu. Mandamu Wood uvwa ungambila leelu mene ewu ne bààbûngi mbamubiikile bamwela nkonko. Cidi mu nomba wa ngondo mwitânù, matuku 17 a ngondo mwitânù.

<sup>7</sup> Nditutu didi kadiyi dyumvwika to. Ditutu adi didi kilomeeta makumi anaayi ne yibidi mu butumbuke ne kilomeeta makumi anaayi ne mwandamukulu mu bucyama. Nenku's ki cituvwa twamba mwab'ewu aci. Ki kuvwa Mwanjelo wa Mukalenge mupweke ne muzakaje mwaba awu. Ne cyônso . . . Ncyenze dîyi dikole . . .

<sup>8</sup> Ndi mumanye ne kudi muntu umwepele, piikalabi ne . . . Ngeela meeji, Mwaneetu Sothmann, s'ngaamumonu katanci aka, mwaba kampanda. Ûdi apa. Yêyè uvwa mwimane lwà . . . Eyo. Anu lwà paanyima *apa*. Ûvwa mwimane pabwîpî pavwaci cyenzeke. Ngeela meeji ne ncivwa kule menemene nende to. Mvwa anu mumumone, mêmè kuteeta bwa kumukupa cyanza. Anu, mvwa ne tulondo twende atu. Aci, nya—nyama ayi, yituvwa twenda tulemba ayi, yivwa ne . . . Kayivwa pa kakuna aku to. Mpindyewu ki yôyi kuyayi pa kakuna kakwabo. Mvwa muyisangane, dituku kumpala, ne mêmè kubambila kuvwa kukengela kuya. Mêmè kubânda lwà *apa*, mwaba wa ne, bu yôyi mwa kuvwila eku, mvwa anu mwa kutuuta cingoma muulu mu lupeepele bwa ne nyipingaje lwà kwaka, bwa bôbô kupetabo muntu ne muntu wende—wende—wende nyama. Nenku yivwa nngulube ya diitu.

<sup>9</sup> Ki pa nanku mêmè kusambuluka, elu luseke, kadi yôyi kayiyimu to. Kayivwa ní ng'elu luseke ní ndwalwa to. Mêmè kumona Mwaneetu Fred upatukaku, kadi kayivwaku to. Kwalukilaye, ki Mwaneetu Norman kubàndayè pamutu paa kakuna apu. Ki mêmè kukudimuka, kupweka mu kaamukidi kakese kadi kubànda, anu mêmè nkaayaanyi, mu ntanta wa wipacila kilomeeta yibidi ne citupa wa ngenda mpicila mu citupa kampanda cya buloba cya bikunakuna bya mabwe bya dikema. Nenku nkaavwa musòmbèle panshi mwikale anu nkenzakana. Dìbà divwa dyenda dìbànda mundaamuunya amu.

Nenku mvwa mwikale ntuula tulumyana atu, tutùtù tubiikila kwaka ne, mpooopu atu. Nkantu kafwanangane ne ntambwe-dishinda. Mvwa munkaci mwa diyituula ku mukolo wa mupanu wanyi, ya mushindu anu umweumwe menemene ne yimvwa mudimone ntuula pâmuvwa mwaba ewu nnwambila bwa cikeena-kumona apu, kukaavwa bu, ngondo isambombo nanku, kumpala kwa kwenzekaci. Mêmè kwamba ne: “Ebu bwalu’s mbwa dikema. Mona mûndi nsanganyiibwa anu ku nord menemene wa Tucson, byenze bu pankaci paa nord ne esete. Bidi byenza . . .”

“Tucson,” nudi bavuluke, mûngààkambà, “kakese pankaci paa sud ne wesete.”

Ki mêmè kwamba ne: “Ebu bwalu’s mbwa dikema.” Mvwa mutangile ntambwe-dishinda ayi, mushindu *ewu*, nyituula ku wanyi. . . yàbûngì, ku mikolo ya mupanu wanyi. Pawikala kuyiku mwanji kukufika to, mmwaba wa cipeela. Kawena bu ewu nunku to, nansha kakese. Mutambe kupenduka misangu mitwe ku makumi abidi kupita muneemu; kabidi kamwena mici ne bikwabo bu mudibi muneemu emu to. Mudi anu ntulu ne lusenga.

<sup>10</sup> Ki mêmè—mêmè mwikale anu nyitangila, mushindu *ewu*. Ki mêmè kubandulula anu mèsù. Nenku mu ntanta wa bu, ndi mufwanyine kwamba ne, mètres nkama mwandamukulu ne mwaba wûmvwa awu, mêmè kumona mutu mujima wa . . . cisumbu cijima cya ngulube ya diitu, midyâdije panshi, yipatukila lwà mundekeelu, muvwayi yidya mabeji a tuumici twa mafûke. Ki mêmè kudyambidila ne: “Mpindyewu, ngikalapù nansha mwa kwambila Mwaneetu Fred ne Mwaneetu Norman bwa kuyabo kwine kwaka, s’ki mwaba ngwôwò wawa naka.”

<sup>11</sup> Kadi diloolo divwa didyânjile, Nyuma Mwîmpè uvwa mulenga wa dikema mu kampoonyi, mu mushindu wa ne Ûvwa ungambila bintu bivwa byenzeke ne bivwa munkaci mwa kwenzeka. Kukengelabi bwa njuuke nye kule ne kampoonyi kaanyi.

Ki pasiishe, dinda dya paakacyabu, mvwa mubànde kuntwaku. Ki mêmè kubanga . . . Mêmè ne: “Mpindyewu, bu mêmè ne mushindu wa kufikaku kudi Mwaneetu Fred kwaka,

s'nêmmwambilè anyunguluke mukuna ewu," ùdì bu mu ntanta wa—wa kilòmèètà umwe ne citùpà mu nunku *ewu*. Bivwa bikengela mêmè kuya bu—bu mu ntanta wa kilòmèètà yisatu ne ndambu anyi mipite apu, kumwangata, pàmwāpa mitwe ku yitaanu. Kupingana mu nunku *ewu*, kwinshi kwa eci, citudi tubiikila ne "kakuna kaa bikunakuna" aka, kulwa mubànde nunku *ewu*, kuulu kwa mikuna ya bikunakuna bya mabwe, misongoloke eyi, ne kupwekela lubilu *eku*, kukosolola kadi kulwa luseke lukwabo, kadi kupweka kuya mutangile mu nunku *ewu* ne kumwangata. Nenku bivwa bikengela kuyaye too ne kwinshi kwa kakuna aku, kuya kangata Mwaneetu Norman, uvwa mwikale mu ntanta pàmwāpa wa kilòmèètà yisambombo ne citùpà anyi mwandamukulu, pashiishe kwalukila. Nenku mvwa ne cya kwikala kwasa ka—kapesè kakese kaa dibèji dya mushwala wa Kleenex kāmvwà mwa kulembelejila ku kapesè kaa—kaa dibèji dya mucu wa meesikiita kwine aku, bwa mêmè kumona ne nku lusongo kaayi lwa kakuna kwa kupatukila pāmvwà mwa kwalukila.

<sup>12</sup> Ki mêmè kubàndila anu kuulu kwa kakuna kakese kudi mabwe masongoloke àbûngì, ne kudi mu—mupwa wa nyama ya tushà mupwekele ku luseke lukwabo alu, bu mu ntanta wa, kaa, mètres makumi asatu ne mwandamutekete, anyi makumi anaayi ne asamnbombo kwinshi kwa mabwe matumbuke aku. Civwa bu, kaa, civwa mundaamuunya, twàmbè ne mpa dîbà mwandamukulu, anyi dîbà citeema. Udiku mufwanyine kudicinkila cintu cya mushindu awu anyi, Mwaneetu Fred, pàmwāpa pa dîbà citeema, cintu kampanda's? Mêmè kunyeemena lwà kuulu aku *elu* luseke, lukasalukasa, bwa ngulube ya diitu ayi kayilu kummona to. Yôyi yitu ngulube milume ya cisuku, nudi bamanye's, kabidi yitu ne bwôwà bwa dikema.

<sup>13</sup> Ki mêmè—mêmè kubàndila pa kakuna apu mu nunku *ewu*, kukosa, kwasa lwendu, kubànda kakuna aku lubilu. Ki mêmè kuya anu ngenda nyeemena kumpengampenga aku, mu kaaba kakese, citudi tubiikila ne, museesu wa kabwa. Ki dyakamwe, citupa cyônsò cya buloba aci kutudikaci's. Kacya ncivwaku mwanji kuumvwa dikubakuba dya dikwacisha bwôwà bu nanku to! Mwaba awu muzakale, mabwe matuuke enda abunguluka. Ki mêmè kudyumvwa anu bu ne mvwa—mvwa ne cya kwikala mutupike muye muulu mu butumbuke bwa mètre umwe ne citùpà kuulu kwa buloba, muvwabi bimweke's. Cyôci kadi—kadi kumpa bwôwà. Mêmè kudyambidila ne: "Kaa, ekelekele!" Mêmè kudyambidila ne bavwa bangaase cingoma. Ne muntu kampanda. . . Mvwa mwase cifulu cifiike. Mêmè kudyambidila ne bavwa ne cya kwikala beele meeji ne civwa nngulube wa diitu wenda unyeema ùbànda mukuna, muntu mungaase cingoma. Civwa cyenze mutooyi mukole wa dikema, anu pambidi paanyi, mushindu awu. Pashiishe, dyakamwe, Cintu kampanda kwamba

ne: “Tangila muulu.” Ki Cyôci cyacya’s. Pashiishe KungambilaYe ne: “Ndikangula dya Bitampi Mwandamutekete abi. Alukila kumbelu.” Pa nanku, s’ke pândi mwalukile apa.

<sup>14</sup> Mêmè kutuutakeena ne Mwaneetu Fred ne Mwaneetu Norman, paanyima paa bu dîbà dijima nanku awu, pângààkalwà kubapeta. Bavwa basaluke baakula bwa cyôci aci. Ki cyôci cyacya. Ne maalu a mamanya adi amba ne kabyenaku mwa kwenzeka to bwa—bwa di—difwima nansha dya mushindu kaayi anyi nî ncinyi cyônsò kubândaci mu bwabwa butumbuke, dibungi, dibungi dya mâyi. Nwamonu anyi? Neciye anu... Ncyêna mufwanyine kumanya to. Ndi—ndi...

<sup>15</sup> Twêtù, patutu twâya dyamwamwa dya mbû, tutu tubuuka ne ndeke mu butumbuke bwa mètres binunu bibidi nkama mwandamutekete ne makumi ataanu. Aku nkuulu kwa mvula ya bipupu. Aci cyôci cidi ntanta wa wipacila kilomeeta isambombo ne citupa. Nanku twâmbè, twâmbè ne, pâmwâpa mmu kilomeeta makumi abidi ne inaayi mudi kamuyi mushindu wa kupeta kabidi dibungi dya mâyi to. Kadi eci mmu kilomeeta makumi anaayi ne ibidi, ne kushaalaci cilebelele mwaba awu dituku dijima. Nwamonu anyi? Bôbò kî mbamanye ne Cyôci aci ncinganyi to. Kadi, twasakidila kudi Mukalenge’s we, twêtù tudi bamanye.

Twasakidila, Mwaneetu Hickerson. Nêncilamè pa birô byanyi muntu mwamwa. Ne patwafunda mukanda awu, mona’s, pa dîbà adi netwikale mwa kucyangata.

<sup>16</sup> Ndi ne kabeji kakese kafunda mwab’ewu kadibo bampe. Ngeela meeji ne nkwenzeke divulangana dya bantu munkaci mwetu kubangila pâmvwà mwab’ewu musangu mushaale. Ngeela meeji ne dîna dyende udi—udi... pa kuumusha, dîna dya tatwëndè, David West. Nanku badi ne mwânà mukese mwab’ewu udibo baswe kulambula kudi Mukalenge. Mmwômò anyi? Civwa ndiloolo edi, anyi civwa ndiloolo dya mu diisâtù? Ncyêna mumanye to. Ûdi ne... Diloolo edi? Mbîmpè. Ee, kadi bishi bwa... Wêwè’s udi David, kî mmwômò anyi? Ki cîmvwà ndyambidila ne ki dîna dyebe. Eyo. Nudi nwamba bishi bu nwênù mwa kubànda kuneeku ne mwânà mukese awu?

Bu mwaneetu wa bakaji mwa kulwaku kuneeku ku cisanji cya piano eku, bwa kutwimbilaku musambu wa ne *Bwelàayi Naabò Muneemu* awu. Mpaasata, bu yêyè mwa kuswa, abande kuneeku, nanku netulambule mwânà mukese wa balume ewu kudi Mukalenge. Mpindyewu, tudi tukeba bwa kulama bwalu ebu bilondeshilangane ne Mifundu.

<sup>17</sup> Ewu mmwikulwebe, Mwaneetu West. Mbyenze anu bu ne kabyena mwa kwenzeka to, s’mmwômò’s? Mwaneetu wa bakaji West, udi wela peebe meeji bishi bwa ciine aci? Kabyenaku... Wêwè’s udi mumanye cîndi ndyambidila, nansha nanku? Udi mumanye’s, s’ndi paanyi kaaku, mêmè.

Cidi cimvulwija Mwaneetu Demos Shakarian. Ûvwa mwimane kumpala kwa musumbà munene wa bantu. Ûtu pende maalu ònsò amubwelakana anu bu mèmè kunu, nudi bamanye's. Ûvwa mwimane mwaba awu. Kwambaye ne: "Udi mumanye's," wamba ne, "ndi—ndi mwambile Rose ne, ndi mudyũmvwè," mmukajende awu, wamba ne, "ndi mudyũmvwè mutambe kukulakaja kacya ngaashaala kaaku mukaji." Yêyè ne: "To. Mvwa nswa kwamba ne, kaaku mulum— . . ." Nudi bamanye's, mèmè . . .

<sup>18</sup> Kwêna nkaayeebe to, Mwaneetu West. Badimu bûngi cyanaana muneemu emu. Ne bidi anu bimpè. Ngeela meeji ne twètù tudi bulelela mwa kwanyisha biikulu beetu. Eci kacyna . . . Ndi ntekemena ne eci kacyna cimweka cibi to. Kadi tudi mwa kupicisha kabidi dîbà dyàbûngi naabo, ngeela meeji, kupita mutuvwa tucicisha ne bânà beetu—beetu balela. Mvwa mukonke mukajanya ciine aci, dituku dikwabo adi. Yêyè kwamba ne: "Cya bushuwa. Udi ubananga bwa katanci kakese, ubapingaja kudi mamwábò, nenku utungunuka."

<sup>19</sup> Ee, mèmè's ndi ne kiikulu kaanyi kaa balume lwà paanyima pààpa. Kavwa kamba ne: "Papa, yisha. Papa, yisha." Nenku bavwa basangishe mulambu mu diloolo dya dyalumingu dishaale, ki kulwabo kuwushiyabo muteeka pa meesa. Kubwelabo nende muneemu, paanyima pààpa, ki—ki kungumvwaye ngaakula ku cikolokolo. Ki yêyè awu: "Papa, yisha. Papa, yisha."

Ki Billy kwambaye ne: "Eyo, *kwaka* naka."

Yêyè ne: "To." Ki milambu kwicikilayi panshi pònsò apu. Yêyè—yêyè uvwa ukeba kupatuka kulwa apa, nudi bamanye's. Kadi utu anu misangu yònsò ungeela anu mbila, nudi bamanye's, padiye ummona nî mmu cibila kaayi cyònsò. Ûdi wela lubila ne: "Papa, yisha." Ûvwa wela mbila mikole. Pa nanku ndi mumanye ne bôbò batu balenga kumona be.

Ambaayi tûng, ndi ndikonka ne ndiku mufwanyine kusomba ndambu wa nsuki ayi? Yêyè kêna naayi dijinga mpindyewu ewu to. Mèmè ngudi naayi dijinga. Dyende nganyi? [Mwaneetu wa bakaji West udi wamba ne: "David Jonathan."—Muf.] David Jonathan. Adi kî ndîna dilenga anyi? Ee, ndi ntekemena ne nsòmbelu wende neafwanangane ne wa beena mènà adiyè mwangate abu. Davidi, mfumu, Davidi; yêyè, Kilisto udi ne cya kusòmba pa nkwasu wende wa butumbi; ne Jonathan kabidi, mulunda munanga. Ndi—ndi nnwambila ne, mbaanyaana bananga baa twânâtwanà padibo apa. Tudi tubaanyisha, bikole menemene. Mèmè . . . Yêyè udi utabuluka. Kabidi ùdi mwa—udi mwa kutwa "amen" wa cikunda anu mudi bakwabo bònsò mwa kutwa amu, nudi bamanye's, pa nanku katwena anu tulekela bitutacisha to. Twètù tudi tumulambula kudi Mukalenge.

Ndi ngeela meeji ne mbya kalolo menemene, bwa kwikala ne babaka baa twânàtwânà, badi Nzambi muteekele bukubi bwa mwânà mukese bu ewu, ne biikale balwa bwa kumufila kudi Mukalenge. Nenku panudi nwenza nanku, bidi bileeja ne kanwena. . . ne nudi nupingajila Nzambi cidi Nzambi munupe. Nzambi amubeneshe.

Mpindyewu, paudi muswe kumwambula, ngeela meeji ne pàmwâpa maamù ngudi mufwanyine kumwambula bimpè ndambu kumpita mêmè. Kadi ambabi tûng bu twêtù anu mwa kumutentekela byanza cyanaana? Mbipiciibwe ne wêwè mwenze aci anyi? Bwalu, mêmè ndi nciina ne nkwpèi kwawwaye kumbafuka, anyi kayi umbafuka to, kumucibula anyi cintu kampanda cikwabo, nudi bamanye's. Nenku mêmè ntu anu misangu yônsò nciina bwa kubacibula, nudi bamanye's. Wanyi—wanyi. . .

Meda uvwa wamba, paanyima pààpa. . .Ngeela meeji ne ewu mmudimu wa pa cibumba cya ku cyambilu eku utuye ungumvwila mukawu, nudi bamanye's. Yêyè utu muswe kwambula. . .

Ee, tangila kuneeku wê, neantangile. Mmwânà mwîmpè. Eyowa's, mukalenge. Pàmwâpa ndi mufwanyine kumwambula. Ndi ndikonka's. Kaa, mwaneetu wa bakaji, kwikadi. . .Ndi ntekemena ne kaakupona to. Monaaku, kî mmulenga kumona anyi? Kî mmulenga kumona anyi? Wetwawu? Ee, mpindyewu, munanga wanyi.

Twinyikaayi mitu yetu.

Mukalenge Yesu, kukaadi bidimu byàbûngi, pààkalediibwà bwena Kilisto mu mmwenekelu wa Muntu ubiikidiibwa ne n'Kilisto, Maasiya mulaaba awu, Dinà Dyende uvwa Yesu. Bantu baakaMutwadila bânà baabo batekete balela, bwa Yêyè kubatentekela byanza ne kubabenesha. Ki Yêyè kwamba ne: "Lekelaayi bânà bakese balwe Kûndi, ne kanubakandiki to, bwalu baa bu bôbò aba ki mudi Bukalenge bwa mu Dyulu." Babaka babidi balenga aba, baakakwâbò ne bôbò batu bayiidi balelela baa Dîyì.

Mukalenge Yesu, nyewu nKutwadila, mwambule, diloolo edi, mpaasata ne mêmè, David Jonathan West mukese mulenga kumona ewu. Ndi mmufila Kûdi, mmumusha kudi mamwëndè ne tatwëndè. Ndi mmulambula kûdi Wêwè, Mukalenge, bwa bukole bwa mubidi, dikanda, mwoyi wa matuku àbûngi mu mudimu, bwa kutwa Nzambi wa Bukole bwônsò mushinga, Yêyè udi mumufikishe pa buloba ebu. Swaku bwa mabenesha a Nzambi ashaale pambidi pende. Swaku bwa Nyuma Mwîmpè ashaale pambidi paa mwânà ewu. Piikalabi ne maalaba udiku, swaku bwa yêyè kwambula Evanjeeliyo udi baledi bende ne baakakwëndè banange bamba kufwa leelu ewu ewu. Enzaku nanku, Mukalenge. Mpindyewu, mu Dinà dya Yesu Kilisto,

nyewu Nkupà mwânà ewu, bwa dilambula dya nsòmbelu wende. Amen.

Ngeela meeji ne badi bajinga kukwata mwânà mukese ewu fôtô. [Cyamu cya fôtô cidi cidila cyak—Muf.] S'ngazawuku's, mêmè paanyi.

Nzambi akubeneshe, mwaneetu wa bakaji. Swaku unange ne unange Mukalenge Yesu bwa kashidi wamba kufwa, nenku mwânà mukese ewu akoleshiibwe mu mibelu ya Nzambi, ne wikale ne mwânà mukese wa balume mulenga. Mêmè ndi mutwishiibwe. Nzambi ikale neenu.

Ngeela meeji ne yêyê wăpôneshi kandundu kende kakese kaa dyamwa? Băkăpeci anyi? Kaa, ekelekele!

Mpindyewu twîmbààyi kaamusambu kakese aku kaa ne, *Bwelàayi Naabò Mûneemu* aku. Bantu bônso, cyapamwe mpindyewu, bwa mwânà mukese ewu. Eyo, mwaneetu wa bakaji.

Bwelaayi naabo muneemu, bwelaayi naabo  
muneemu,  
Lwâyi ne bânà bakese kudi Yesu.

<sup>20</sup> Ncyêna mumanye byanza bidi bitambe bwîmpè bya kubateekamu to. Nudi nwênù babimanye anyi? Byanza bya Mukalenge Yesu!

<sup>21</sup> Mpindyewu, ndi mumanye ne kudi luuya lukole muntwamu. Ndi muswe kwambila muleejanganyi wa myaba, mwakunyaanyi wa balume, Doc, anyi mukwabo, bwa batangile bwalu abu. Bamwe baa ku bânà beetu baa bakaji badi banyanga yimwe ya ku jipè yabo ne—ne mafuta adi pa nkwasu. Mbanganyi badi bayinyange ne mafuta awu? Ndi mumanye, kudi mukajaanyi, bânà baanyi baa bakaji babidi, Betty Collins mwânà, Mandamu Beeler, ne bamwe baa kudibo. Ncintu kampanda, mafuta pa myaba ayi. Bu wêwè mwa kutapaku dîsù mwaba awu, Doc, pawapeta mushindu. Cidi, ngeela meeji, cidi mwaba udibo. . . Mmafuta anyi mmukubu, anyi cintu kampanda, anu nemene mwaba udibo benzela mudimu bábànda bapweka awu, nkwasu ayi. Nenku kî mmwômò anyi? [Mwaneetu Edgar “Doc” Branham udi wamba ne: “Kapeena mafuta to, bwa kuàkúpula.”—Muf.] Ee, ncyêna—ncyêna mumanye ne ncinyi to, pa nanku. Cintu kampanda cîndi mfuma ku. . . Ncyangambidibo, ki mêmè kwamba ne nĕ—nĕncyâmbilè Doc. Eyo.

Mpindyewu, disangisha dya milombo dya mu disâtù diloolo. Kudi bukwabo bwalu anyi? Nukaadi bamanyishe anyi? Nukaadi bamane kufila mamanyisha enu anyi, Mwaneetu Neville? Mamanyisha ônsò akaadi mafidiibwe.

<sup>22</sup> Mpindyewu, bu Nzambi mwa kwanyisha, mu dyalumingu dilwâlwa edi mu dinda, ndi muswe kwakula pa cyena bwalu



cya difunda dya lukongo elu ku cilumbu bwa dipoopela dyalu dya Kilisto pa nkuruse. Wèwè udi wamba ne: “Kî ng’elu lukongo ludi lufwanyine kwikala lwenze aci to.” Netujandule ne mbacyènzè, anyi kî mbacyènzè, bilondeshile Dîyì. Mpindyewu, mu dyalumingu dilwâlwâ edi mu dinda, bu Mukalenge mwa kwanyisha. Bu ne, mpindyewu, bu—bu—bu cintu kampanda mwa kwenzeka . . .

<sup>23</sup> Ndi ne cya kwikala mu Houston lumingu elu, kabidi, mu cibilu kampanda, cìikalà mwa kungangata too ne ku dyalumingu, pa nanku ncyèna mumanye ne ngâpeta mushindu anyi ncyakupeta. Kadi tudi ne maadyalumingu makwabo abidi atudi mwa kuteekela meeji, kumpala kwa dyôdi adi, nansha bishi. Pashiishe tuyaaya ku Chicago bwa cibilu aci, anyi bwa disangisha mu Chicago, lumingu lwa ndekeelu lwa ngondo ewu. Ne pashiishe nebinkengele kupingaja famiye ku Arizona, bwalu—bwalu diikisha dyabo dyajiki ne bânà badi ne cya kwalukila mu tulaasa.

<sup>24</sup> Mpindyewu, mbanganyi badi basanke bwa kubala kwa Dîyì, ne bwa mabenessa a Mukalenge? [Disangisha didi dyamba ne: “Amen.”—Muf.] Twètù bônso, bikole be.

<sup>25</sup> Mpindyewu, kudi luuya lukole be, ne ndi mumanye ne bamwe baa kunudi nebaalukile ku màabò diloolo edi. Ndi mumanye ne Mwaneetu Rodney ne Charlie, ne bakwabo, badi ne cya kwendesha mashinyi ntanta mule. Kadi anji indilaayi kakese tûnga, s’nudi mu diikisha, kî mmwômò anyi? Ee, ndi ngumvwa bamba ne nuyaaya ku diloba.

“Mukalenge katu ubadila muntu cikondo padiye munkaci mwa kuloba to. Kwèna ukulakajaku to paudi uloba apu.” Pa nanku, mpindyewu, nwènù bânà baa bakaji nwâyaayi kabafila. Nwamonu anyi? Ne mêmè mwine nêndwe kudisanga kunudi aku, mêmè mupete mushindu. Kabidi nudi bamanye ne: “Mukalenge mwîmpè,” mutubo bamba’s, “katu ubadila muntu cikondo padiye muye ku diloba to.” Nubyènzè byâbûngì dîbâ dinudi—dîbâ dinudi nudyumvwa maalu manujingakaje. Ki cintu citambe bwîmpè bwa kwololokelaku, cînkaadîku mêmè musangane mu wanyî nsömbelu, nkuya ku diloba.

<sup>26</sup> Ngâkapeta karta kakese, mûngà musangu, kaa kudi Mukalenge Troutman. Kudiku muntu muvuluke Mukalenge Troutman, mwena cyapu cya dyanza dya makwe a mashika mu New Albany awu anyi? Ûvwa ne karta kakese kuntwaku, kafundapu ne: “Muye ku diloba.” Nenku katungunuke, kamba ne: “Muntu udi ne. . . Muntu yônso, bânà baabo baa balume, baye ku diloba. Ne cyanza cyambulwishi neikalè misangu yônso anu ne cya kucyolola, pàdîye muye ku diloba.” Kavwa ne maalu bu mwandamukulu anyi dikumi nanku awu mashiileshiilangane. Kadi paapwekiye kwinshi, kwambaye ne: “Muntu udi utamba kwikala museemene pawîpi ne Nzambi

padiye muye ku diloba.” Nenku ndi ngeela meeji ne aci nciswe kwikala bu cya bushuwa. “Babanji ne bapele badi bônso mwomumwe, padibo baye ku diloba.” Nwamonu anyi? “Cyanza cyambulwishi neikale misangu yônso anu ne cya kucyòlòla, padiye muye ku diloba.” Kadi byônso bivwa anu ne: “Muye ku diloba.”

<sup>27</sup> Ee, mêmè nênwâmbilè diloba dikwabo dîndi ngenza kukaadi bidimu bu makumi asatu ne bisatu bidi bipite ebi, ndi mumonangane anu ne diloba dya misuuka ya bantu. Mukalenge asweku atukwacishe bwa twètù kupeta wônso utwikala ne mushindu wa kupeta awu.

<sup>28</sup> Mpindyewu, diloolo edi, eci badi bacikwata pa mikaba ya mêyi. Mpindyewu, mu dinda emu, (Jim yêyè mwikale apa, anyi ukwata pa mikaba ya mêyi), ndi—ndi ngeela meeji, pa mikaba ya mêyi, muntu mukwabo kukokaye ntema yanyi kwôkò aku, mêmè mwambe ne: “Cimwangi ciibîdî.” Ncivwa ne meeji a kwamba *ciibîdî* to. Cidi: “Cimwangi ciisâtù.”

Nyuma Mwîmpè mu mmwenekelu wa Dikunji dya Kapyà, Nzambi upweka mu dimweneshiibwa, wakatwala cimwangi cya kumpala, ne—ne mwamwa mu. . . wakapatula Izaleela mu Ejipitu.

Cimwangi ciibîdî civwa n’Kilisto upatula Ekeleeziya mu cyena Yuda.

Nenku, *Cimwangi Ciisâtù*, mpiikala Dikunji dya Kapyà dimwedimwe adi mwa kupatula Mukaji—musela mu ekeleeziya. Nwamonu anyi? Kupatula mu cya mubidi; kupatula mu cya nyuma; ne cya Nyuma cipatuka mu cya nyuma. Bisatu abi, nudi numona’s, cya Nyuma cipatuka mu ekeleeziya, nanku’s we. Dîbà adi tudi tupeta bisatu abi, bikondo byaci bisatu.

<sup>29</sup> Mpindyewu, diloolo edi, mvwa muswe kwenza mukaba mukwabo wa mêyi, nguvwa ubiikidiibwa ne: *Nsòmbelu Webè Mmukùmbànyine Èvànjeeliyò Anyi?* Pàmwápa kî ncifwanyine kwangata mukùngùlù mutambe bule to. Ee, anu ndambu wa Mifundu ne tuntu tufunda tûndi naatu mwab’ewu, kadi kumpala tudi baswe kubala Dîyi dya Nzambi. Kumpala kwa twètù kwenza aci, tudi twinyika cyanaana myoyi yetu kumpala Kwende katanci kakese.

<sup>30</sup> Mukalenge Yesu, muntu mulume kana yônso ewu, mu mubidi emu, anyi mukaji, anyi mwânà, udi mwa kusaka mabeji a Bible ewu paanyima, kadi kakwena nansha umwe udi mwa kuWubuulula to pa kuumusha Wêwè. Ndi ndomba, Mukalenge, bwa wangate cyena—bwalu eci mudici citeekiibwe pa mwoyi wanyi ewu emu bwa kucituma mu matunga ônsò, bwa bantu, bwa bôbò kumanya ne nnsòmbelu wa mushindu kaayi udi mulombiibwe bwa kwikalabo nende. Bwalu, bàábûngi bakaadi bangeelele nkonko eyi ne: “Mwine Nsòmbelu wa bwena Kilisto ewu nnsòmbelu wa kukwacila ekeleeziya mudimu anyi?”

Nkukwacisha kwa bapele, badi mu lukengelu lwa bintu anyi? Anyi ncidimba cya kashendende? Ndulamatu lwa menemene kudi ekeleeziya anyi?” ne nkonko ya mushindu awu. Taatù, swaku bwa dyandamuna dijaalame dilwe diloolo edi, ku mèyì aa, patudi tudyenzeja bwa—bwa kuàtwàdila bantu apa. Mu Dîna dya Yesu Kilisto, mmutudi tulomba nunku. Amen.

<sup>31</sup> Mpindyewu buululaayi mu Bibles yenu, mu Mukanda wa Luuka Munsantu, nenku netubangile ku nshapita wa 14 ku mvensa wa 16, bwa kubala Mufundu kampanda bu ntaku, bwa mwaba wa kushindamijila bitudi twamba, bwa eci citudi tukeba bwa kukosela tusunsa etu tutwe ku makumi asatu anyi makumi anaayi. Mpindyewu, mvensa wa 16 wa nshapita wa 14 wa Luuka Munsantu.

*Pashiishe yêyè wakamwambila ne: Muntu kampanda wakenza didya dinene dya diloolo, ne wakabiikila bantu bààbúngì,*

*Ne wakatuma basadidi bende pa dîbà dya didya dya diloolo bwa kwambilabo bavwa babiikidiibwe abu ne: Lwâyaaku, bwalu—bwalu bintu byònsò mbilongolola mpindyewu.*

*Kadi bònsò ne dîyì dimwe baakabanga kufila tubingila. Wa kumpala wakamwambila ne: Mémè ndi... musumbe citupa cya buloba, ne ndi ne cya kwikala ne dijinga dya kuya kacimona; ndi nkulomba bwa umfwileku luse.*

*Ne mukwabo wakamba ne: Ndi musumbe ngombe ya bikokedi bitaanu, nenku nyaaya bwa kuyiteeta; ndi nkulomba bwa umfwileku luse.*

*... mukwabo wakamba ne: Ndi musele mukaji, ... ki bwa cinyi ncyèna mwa kulwa to.*

*Pa nanku musadidi wakalwa, ne wakaleeja mukalenge wende bintu byònsò ebi. Nenku mfumu wa nzubu awu mwikale ne ciiji wakambila musadidi wende, ...*

Monaayi ne, kî mbasadidi to. “Musadidi.”

*... Patuka lukasa ubwele mu misèèsù ne mu kajila, ne mu bimenga, nenku ubweje mwaba ewu bapele, ne balema, ne bilemenda, ne bampofo.*

*Nenku musadidi wakamba ne: Mukalenge, byènjùbù mùdì mutume dîyì amu, kadi kucidi anu myaba.*

*... mukalenge wakambila musadidi ne: Patuka ubwele mu bibeeba ne mu mpangu, ùbènzèjè ku bukole bwa kubwelabo, bwa nzubu wanyi ikale mùle tente.*

*Bwalu ndi nkwambila ne: Nansha umwe wa ku bantu bavwa babiikidiibwe abu kaakulabula ku didya dyanyi dya diloolo nansha.*

<sup>32</sup> Mpindyewu, nwamonu ne, kuvwa nkokelu isatu, anyi bipungu bisatu, bya cyôci aci anyi? Paakatukabo, musangu wa kumpala, ne kubiikilabo aba bavwa, anyi, babiikidiibwe bwa kulwa, kadi kabayi balwe to. Pa nanku kupatukaku kampanye kaa dyondopa, kupatukaku bwa kwangata bampofu ne bilemenda. Kadi kucivwa anu myaba, ki kupatuka kwenzeja bantu bîmpè, babi, ne bavwa kabayi bacyuka maalu; bivwa bikengela bwa kubwelabo.

<sup>33</sup> Mpindyewu, nudi nubala lusumwinu lukwabo lwa bwalu ebu, cintu kampana cifwanangane ne eci, mu Maataayi 22.1 too ne ku 10, panwaswa kucibala, paanyima. Kadi ndi—ndi mupatulemu cyena-bwalu eci cya ne: *Nsòmbelu Webè Mmukumbànyine Èvànjeeliyò Anyi?*

<sup>34</sup> Mpindyewu, mwaba ewu Yesu udi wamba... Muntu utu misangu yònsò anu ukeba kufila tubingila, bwa kubenga kwakidila Dîyì dya dibiikila dya Nzambi. Nansha dyôdì dijaadikiibwe bikole kudiye, bwa ne—bwa ne n’Didya Dyende dya diloolo ne ndibiikila Dyende, kadi muntu udi misangu yònsò anu ufila tubingila. Nenku nwènù babale Maataayi 22, nenusangane ne muntwamu kabidi, tubingila ntufidiibwe. Nenku—nenku badi bakeba...

<sup>35</sup> Cyakaalukila mu bikondo byònsò. Cyakaalukila e mu cikondo aci, bamba ne muntu kampana wakababiikila, ne—ne ùvwa ne budimi bwa mvinyo. Nenku tudi tusangana lusumwinu alu. Ne mwakatumaye basadidi bende bwa kusangishabo bya mu budimi bwa mvinyo abu. Musadidi wa kumpala kulwaye, baakenza cinyi? Baakamwipata. Musadidi wâkalonda kulwaye, kumwasabo pende mabwe. Ki kwipatabo musadidi ne musadidi yònsò; bantu beena lwonji abu. Mfumu kutumaye, ndekeelu wa byònsò, mwanende wa balume. Kadi paakalwa mwanende ewu, tudi tusangana, ne: “Baakamba ne: ‘Ki mupyanyi nyêye ewu. Netumushipe, pashiishe twangate bintu byònsò.’” Ki Yesu kubambila ne: “Mfumu kutumaye bantu e kushipabo bashipyanganyi abu, ne kwoshabo bimenga byabo.”

<sup>36</sup> Mpindyewu, tudi tumona ne, padi Nzambi upeesha muntu dibiikila, ne bwa kwenzaye cintu kampana, anyi bwa kwakidilaye dibiikila didiYe mumupeeshe adi, kadi yêye ewu udibenga, pa dîbà adi kakwena cintu nansha cimwe cidi cishaale to, paanyima paa luse lumane kubengiibwa ku maditambishi, anu cilumbulwidi. Paudi usambuka mikalu ya luse, pa dîbà adi kukaadi kushaale cintu anu cimwepele, ne aci ncilumbulwidi. Nenku tudi tusangana ne muntu mmwenze cyôci aci mu bikondo byònsò. Ncyenzekezeke, pawîpî ne cikondo cyònsò, mu Bible.

<sup>37</sup> Paakatuma Nzambi Noa, musadidi Wende awu, ne kusebelaye njila wa dipandukila bwa bantu bònsò bavwa baswe bwa ku—kusungidiibwa. Kadi bantu baakaseka ne baakeelulwila Noa. Kadi Nzambi wakasebela njila, kadi bôbô

baakafila kabingila. Kacivwa bilondeshile ngeelelu wabo—wabo wa meeji wa cyena leelu awu to. Kacivwa . . . Kacivwa mushindu uvwabo bôbò baciswe to, nenku baakafila tuingila mu matuku a Noa.

<sup>38</sup> Baakafila tuingila mu matuku a Mòsà. Baakafila tuingila mu matuku a Eliya. Baakafila tuingila mu matuku a Kilisto. Ne nyewu bafila tuingila leelu ewu.

<sup>39</sup> Mpindyewu, Yèyè mwikale wakula buludi ne Izaleela, biine bavwa babiikidiibwe ku difesto abu, cîndî mufwanyine kwamba leelu ewu bwa bantu, ekeleeziya, udi mubiikidiibwe bwa kulwa ku difesto, kadi kayi muswe kulwa to, difesto dya nyuma dya Mukalenge. Kadi kabayi baswe kucyenza to. Kî mbaswe kucyenza to. Badi ne bîngà bintu bya dyenza. Badi bapeta tuingila.

<sup>40</sup> Mpindyewu, Izaleela, kukaadi bidimu binunu bibidi, bu ne baakiitaba dibiikila dyakabapabo adi, nunku kabeena mudibo leelu ewu emu to. Kukaadi bidimu binunu bibidi, Izaalela wakabenga dibiikila dya kulwa ku didya dya dibanji, ne baakadibenga kadi kubwela mu cilumbulwidi. Kadi, bu mwakamba Yesu, baakasa bapofeta mabwe ne kushipa bônso baakabatuminabo abu, mu difila dya tuingila, mpindyewu, tuingila twakafilabo mu dituku dyônso.

<sup>41</sup> Tudi tusangana ne, mu matuku a Yesu, Yèyè—Yèyè kaakaswikakanaku nansha ne umwe wa kudibo to. Baakamba ne: “Ewu Muntu mmupete edi dilonga dibà kaayi? Mmu cilongelu kaayi mudiYe mupatukile? Ewu kî m’Mwânà wa mwenji wa mabaya awu anyi? Mamwëndè dînà dyende kî m’Mariya anyi? Bânà baabo baa balume, kî n’Jose ne Yakobo, ne bakwabo abu anyi? Kabidi bânà baabo baa kakaji kabeenaku munkaci mwetu emu anyi? Kadi Muntu ewu wapeci ebu bukookeshi bwa kwenza nunku penyi?” Nwamonu anyi? Mu ngaakwilu mukwabo, Yèyè kavwa muswikakane naabo to. Ki kwambabo ne: “M’Beelezebula. Mmwena Samaaleya. Udi ne démon, ne Udi ne mukupa. Yèyè udi—Yèyè udi. . . Yèyè m’Muntu udi ne nyuma mubi, pa bidi bitangila ntendelelu, ki udi muMuvwije ne mukupa. Ki cyôci aci. Ûdi pambelu pààpa bu muntu wa cisuku. KanuMutangidi bu kudi bwalu to.” Nenku tudi bamanye cyakenzekela Izaleela. Nenku bôbò baakeela mbila mikole. Bavwa batwishiibwe bikole ne Muntu awu uvwa mu ntupakanyi, mu mushindu wa ne, kaa, paakalwabo kuMupiisha, kwambaye—kwambaye ne: “Mashi Ende ikale pambidi peetu ne pambidi paa bânà beetu balela.” Nenku Akiikala pambidi paabo kubangila anu piine apu.

<sup>42</sup> Yesu uvwa uteeta kubambila ne tuingila twabo atu ki twàkashipà bapofeta, ne ki twàkashipà baakane bàakalwà abu. Baakiitabuuja twitabaayi yabo yakabapabo kudi bantu,

pamutu paa kwangatabo Dîyì dya Nzambi. Nenku, mu dyenza dya nanku, baakavwija Dîyì dya Nzambi kadiyi ne bwenzeji to.

<sup>43</sup> Mpindyewu, bidi bikengela anyi bwa wèwè kwamba, mu bwalu ebu, ne *Eci* ndiswa dya Nzambi ne dijinga dya Nzambi, anyi ncintu kampanda cikwabo cyùdi mwa kuleejangana, cidi cîmpè kutamba *Eci*. Mpindyewu, bikengela wangate anyi eci anyi cikwabo. Kwèna mwa kukwacila Nzambi mudimu pamwe ne mamona to. Nenku bidi bikengela wâmbè ne: “Eci ki Bulelela,” anyi ne “Ncitunga cya Bulelela,” anyi ne “Cyônsò cijima kî m’Bulelela to,” anyi ne “Kî ncitwangaja bîmpè to,” anyi ne “Kî neyumvwija mu cyôci to.”

Kadi Bible mmwambe, ne: “Dîyì dya Nzambi kî ndifumine ku didyumvwijila dya muntu dya nkaayende to.” Muntu mukwabo nansha umwe kèna ne cya kusakidilaKu dyumvwija kampanda nansha, Dyôdi ndifunda mu mushindu udi Nzambi muswe bwa Dyôdi kumvwijiibwadi. Anu cidiDi dyamba aci, Cyôci aci, ncidi ne cya kwikalaku. NuDyângâtaayi anu mushindu udiDi dyambiibwe awu, mudiDi difumdiibwe Apa awu.

<sup>44</sup> Mpindyewu, bôbò mbiitabe twitabaayi yabo ayi. Badi bavwija milayi ya Nzambi kayiyi ne bwenzeji kudibo bôbò to. Badi bacinguluka Cyôci aci. Nebasambuke baCishiye kule.

<sup>45</sup> Mpindyewu, bu Russie mwitabe Dibenesha dya Mpenta adi, kukaadi bidimu makumi mwandamutekete ne bitaanu, paakapona Nyuma Mwîmpè mu Russie apu, nunku kabeena ba-communistes leelu ewu to. Mpindyewu, kukaadi bidimu makumi mwandamutekete ne bitaanu, kwakapetabo ditabuluja dinene mu Russie. Nzambi kulwa munkaci mwabo, ne baakapeta matabuluja manene, maye too ne mu Sibérie. Kadi cyakenzabo ncinyi? BaakaCibenga. Kadi leelu ewu, ditunga’s ndifwe, ne ekeleeziya kayiciyi mwa kwenzaku masangisha to, padiku kakuyi dyanyisha. Ne bakaadi bapiishiibwe babwele mu cilumbulwidi. Ûkaadi muye kwa naka mu cilunji cya ciiji eci cya communisme; bamana kupaanyisha kudi dyabulu.

<sup>46</sup> Kukaadi bidimu makumi ataanu, Nyuma Mwîmpè wakapona mu Angleterre. Dyakamwe paanyima paa aci kulwaku George Jeffreys, ne F.F. Bosworth, ne Charles Price, Smith Wigglesworth, balwanganyi banene baa mvita baa diitabuuja abu, kukaadi bidimu makumi ataanu, ki bôbò kupa Angleterre ditabuluja dya Nyuma Mwîmpè. Kadi cyakenzabo ncinyi? Baakabaseka, kubeelabo mu maloko, kubabiikilabo ne mbapâle, beela meeji ne bavwa bajimije lungenyi. Ekeleeziya kubengelayi bantu bwa kulwabo kubateeleja. Nenku baakondopa babeedi, ne baakiipata badémmons, ne baakenza byenzedi binene. Kadi bwalu Angleterre, bu ditunga, wakabenga Evanjeeliyo, mpekaatu yende—yende’s ki kumanyikayi buloba bujima eku. Kakwenaku dingà ditunga pa buloba bujima,

nansha Loomo mwine ne France, didi—didi dipambuke kutamba Angleterre to. Yèyè's kadi ki mamwëndè wa dipambuka. Anu myaba mene yivwa Finney ne bantu baabo banene abu bayiishile ayi, mu—mu Haymarket, ne Charles G. Finney, ne Wesley, anu nanku, kadi yèyè kubenga Cyôci aci.

<sup>47</sup> Kadi mpindyewu, nansha lumingu lushaale elu, anyi mbingu ibidi, mu bibejibeji, nudi nusangana myaba yidi bantu baabo banene biikale bavwijiibwe ne butekete bunene mu—mu maalu a masandi ne bakaji, mu mushindu wa ne batentekedi bakaadi babwelemu. Ne munene wabo mwine mmulwe kujandula bakwabo kabidi. Bikandakanda mbyûle naabi tente. Wabo mpekaatu wa cilendwishi, anu mu bukalenge bwabo bwine, mmukune dînà dyabo dya bundu adi mu buloba bujima. Bwa cinyi? Mmubenge Bulelela. Wakafila kende kabingila, kadi kwende's nkumane kujika. Angleterre ukaadi yèyè yônsò mushaale cintu cyanaana, bwa Nzambi, kukaadi ntanta mule. Bu ne . . .

<sup>48</sup> Amerike, kukaadi bidimu dikumi ne bitaanu, paakatungunuka ditabuluja dya dyondopa kuumukila ku mpenta, dibwayike mu ditunga, kwenzekaku ditabuluja mu cimenga cikulu, Washington, DC. Bamfumu baa ditunga, bindonda bya bamfumu, bantu banene, banguvena; bintu binene kwenzekabi, banguvena ne—ne bantu kwondopiibwabo. Bu mudi, Congressiste Upshaw uvwa mucibukile panshi munda mwa—mwa bidimu makumi asambombo ne bisambombo, ne kabayi mushindu wa kukudimuna mpala kwamba ne kabivwa nanku to. Civwa anu kumpala kwabo mene, kadi bôbô kuCibenga.

<sup>49</sup> Nenu, diloolo edi, ki cidi cyenza ne ditunga edi diikale dishaale. Dikaadi dipiishiiibwe. Kakucyena ditekemena bwadi dyôdi to, nansha dikese. Dikaadi disambuke mukalu wa pankaci paa cilumbulwidi ne ngâsà. Ne dikaadi disungule cikaadidi naaci eci, bwa kukontonona ditunga. Ne dikaadi dibole, too ne penyi. Cidiidi cyadi cikaadi cibole. Maalu a mu nsòmbelu a ditunga edi mmashaadile kupita cyônsò cîndiku mwa kudicinkila aci. Kadi ndongolwelu wadi wa ntendeleelu mmubole kupita ne maalu miine a nsòmbelu awu. Dikaadi dishaala, mu kwenza kwa cyôci eci, dikaadi mpindyewu dikadilamike, ekeleeziya yônsò eyi, ne ya ditunga, mu nsangilu wa maekeleeziya, ne dikaadi dyangate cimanyinu cya nyama wa lwonji. Cintu kaayipu's we! Bwa cinyi? Kilisto wakabapa mpunga ne: "Lwâyi ku difesto Dyanyi," difesto dya mpenta, didi dyûmvwijà ne "makumi ataanu" adi.

<sup>50</sup> Paakapongoloka Nyuma Mwîmpè pa Russie, baakabiikidiibwa ku difesto dya mpenta, difesto dya nyuma, kadi bôbô kuMubenga. Angleterre, Nyuma Mwîmpè wakabapongolokela, kadi bôbô kuMubenga. Amerike, Nyuma Mwîmpè wakabapongolokela, kadi nyewu baaMubengi.

<sup>51</sup> Wakabiikila misangu isatu. Misangu isatu, nyakatumaYe, kadi kabaakateeleja difesto adi to. Pashiishe kutumaYe cyakabidi, kwambaYe ne: “Nda wenzeje bantu abu ku bukole bwa balwe. Bikengela bwa meesa aadijiibwe. Meesa akaadi malongolola. Myaba nyeyi yicidiku.” Nenku ndi ngeela meeji, ne, pàmwàpa, pàmwàpa mu ngondo mikese yilwalwà eyi, anyi cintu kampanda, anyi cidimu, anyi nî ncinyi cyônsò, Nzambi neatume dinyukusha dikwabo mu ditunga dijima emu, bwalu kucidi anu muntu mukwabo pambelu pààpa, mu mwaba kampanda, mwikale Dimiinu didyanjila kulongolola, udi Bukênkè ne cya kuponena, mu mwaba kampanda, mu mwaba kampanda pa buloba. Bwa ditunga, dyôdi diine, kwadi nkumane kujika.

<sup>52</sup> Mvwa ntangila mu cikandakanda cya *Life* cya lumingu elu; lwà kwinshi, ee, lwà kwinshi mu Little Rock kwaka, dituku dikwabo, anyi, to’s we, mmu Hot Springs. Ki mêmè kumona mwômò amu, ngeela meeji uvwa nnguvana wa ditunga dya New York, mwikale ne kakaji kajì kaa maja kaa kavuula ne bilàmbà kaa mushindu kampanda mu Honolulu, uja naaku maja. Mpindyewu. . . Ne apa, kwinshi kwa cyôci aci, kuvwa muntu mukwabo wa mwende luumu. Kaa, bundu kaayi! Tangilaayi ditunga dyetu leelu ewu. Tangilaayi ngiikadilu wa dyetu—wa dyetu ditunga diine. Tangilaayi numone kukaadidi dikafike, mukaadidi ditukine dishaale dya ciipanshi.

<sup>53</sup> Tangilaayi wetu ndongolwelu wa ntendeleelu leelu ewu. Mmunyi mudibi mwa kwikala ne ekeleeziya yikale mibwele mu ngiikadilu udiyi mpindyewu ewu? S’mbwalu mbadyombole ne babenge Mukenji wa Nzambi, dibiikila dya kulwa ku difesto. Nudiku bafwanyine kubiikila nsòmbelu wa mushindu awu ne mmwakanyine Èvanjeeliyo anyi? Nudiku bafwanyine kubiikila nsòmbelu, udi mufwanyine kusòmbesha ne kwanyishila bantu baabo—baabo bwa kwenzabo bintu abi, kunwa mfwanka anyi?

<sup>54</sup> Dîngà dituku, lwà kwinshi eku, ekeleeziya kampanda, cisumbu cikese cya banayi civwa cinaya kwinshi eku ku cisuku cya dilamina nyama eku, ne mwânà wa balume mukese wa bukonde bwanyi mulume utu mwedi wa ndundu wa cimwe cya ku biine bisumbu abi. Ne pa nanku ùvwa muye kanaya ndundu kuntwaku, nenku kuvwa cisumbu cya banayi cya ekeleeziya ciikale cinaya. Nenku ki mpaasata nyawu, ne tunsongaalume etu mu cipalu amu, biikale banaya. Kadi mpaasata awu wenza kukoka mucu wa mfwanka utuuka wasa mukwabo, wa ekeleeziya mwena mutumba anu menemene ku luseke lwetu eku. Kadi nudiku mwa kudifwanyikijila muntu. . . Nansha mene bantu bavwa basòmbèle mu bateeleji amu bavwa bamone paabo ciine cintu aci. Kadi bikaadi byenda bishaala mu mushindu wa kabacyi nanshà bôbò biine babicyuka to.

<sup>55</sup> Ekeleeziya munene kampanda, ekeleeziya wa ba-Baptistes, wùndi mumanye, utu ulekela beena mu ekeleeziya bapatuka mu kalaasa kaa Dyalumingu, tusunsa dikumi ne tutaanu twa



pamutu, bwa mpaasata ne bakwabo bônso abu kuya kiimanabo pambelu banwa mfwanka, kumpala kwa kumwalukilabo bwa kukwacila Mukalenge mudimu. John Smith, mubangi wa mwine ekeleeziya awu, wakasambila wamba kufwilaku, bwa Nzambi kutuma ditabuluja, too ne muvwa mèsù amuula ashaala mabwite bufuku, bikengela bwa mukajende aye nende ku meesa wenda umulombola ne umudiishila byakudya mu nkutu. Bu ne...Muntu awu's mmufwanyine kwalukila mu majambu bu yèyè mwa kumanya ne ekeleeziya awu ukaadi mufike mu ngiikadilu wa mushindu awu. Ncinyi ciine aci? Bavwa babiikidiibwe bwa kulwa, kadi kucibengabo. Ki cintu cimwepele ncyaci. Ne nudi bavuluke, Yesu wakamba, mwômò emu, ne, bôbô baakabiikilabo, kadi kucibengabo abu, kabaakulabulaku ku didya Dyende dya diloolo nansha.

<sup>56</sup> Padi Nzambi utuma Nyuma Mwîmpè ne ukookola ku ciibi cya muntu, kadi yèyè uMubenga ne budiswilè bwônso, musangu mukwabo wadyakuMubenga bwa musangu wende wa ndekeelu, ne wèwè kwakwikalaku muntu wa dyèsè to. Udi mwa kusomba mu ekeleeziya uteeleja Evanjeeliyo, ne witaba bidi Evanjeeliyo wamba abi. Udi mufwanyine kwenza bintu byabûngi bu kwamba ne: “Ndi mumanye n’Cya bushuwa,” kadi kuyiku mwa kutwa munu pa Yèyè to, bwa kuMukwacisha, wèwè mwine. Nwamonu anyi? Udi anu uMuteeleja cyanaana, bwalu wèwè udi wamba ne: “Ndi muMwitabuuje ne ngwa cya bushuwa.” Aci’s cidi anu kudya Nende bulunda cyanaana.

Ndi mufwanyine kwamba ne: “Ndi mwitabuuje ne *aci* ndola binunu dikumi.” Kî mbwena kwamba ne ndi muyipete to. Nwamonu anyi? Ndi mufwanyine kwamba ne: “*Aci* mmâyì mîmpè matalale,” kadi kubenga kuânwa. Nudi bamanye cîndi muswe kwamba aci anyi?

Kadi eci m’Mwoyi wa Cyendeleele. Ne kubenga kucyenza, dîngà dituku neusambuke mukalu udi pankaci paa cilumbulwidi ne ngàsà, ne kwakupeta kabidi dyèsè dya kulwa kuMupeta to.

<sup>57</sup> Bwenu nwênù badi balwa mwab’ewu. Mémè ncyèna mwambule bujitu bwa badi...anyi—anyi bwa badi bakwabo bambi bambila nansha. Kadi, piikalaCi cilelela, s’udi mwena dibanza dya kufilaKu mwoyi webe. Ncinganyi cikwabo ciwadyakusanganaku, cifwanyine kwikala ne dikwacisha kûdi, kutamba kumanya kwa ne udi mwa kwikala ne Mwoyi wa Cyendeleele?

<sup>58</sup> Ambaayi tûng bu ne mvwa ngaabanyinangana tumuma twa bwanga mwab’ewu, twa ne, bijaadikiibwe kudi maalu a mamanya, bijaadikiibwe kudi maalu a mamanya ne kamuma aka nkafwanyine kukushiya ne mwoyi munda mwa bidimu cinunu? Ee, nunku’s mbifwanyine kun—kunkengela kwikala ne cisumbu cya bampulushi pambelu apa, bwa kubiipata mwaba awu. Nunku kî mbifwanyine kukengela wèwè kwenza nansha

dibiikila dya ku cyoshelu bwa bwalu abu to. Bikengela anu wêwe kubatuuta bwa kubiipatapu, bwa kwikala ne mwoyi bidimu cinunu.

Kadi, nansha nanku, bijaadikiibwe kudi maalu a mamanya ne Nzambi wa Cyendeleele, bukole Bwende bwônsò bwa dibiika Dyende dya ku lufu, budi bukulaya Mwoyi wa Cyendeleele abu, kadi Sataana's neateeke maalegônà ende pambelu pààpa bwa kukulama kule naaWu. Nwamonu anyi? Nansha nanku, udi mwa kutangila, ne mwikale ne meeji mushindu mukumbane bwa kuWutangila mumpala ne kumona ne ng'Wa cya bushuwa, kadi pashiishe kuWubenga. Nwamonu anyi?

<sup>59</sup> Cintu kampanda, kabingila kaa mushindu kampanda. "Luuya ndupite bukole. Ndi mucyoke be. Nêndwe, maalaba." Cidi anu kabingila kaa mushindu kampanda, ki cyônsò cidibo benza. Mu kubenga kwa dituku dya dikenkeciibwa, cidi cikutapulula ne Nzambi.

<sup>60</sup> Mpindyewu, tudi tumona. Nenku, mu Dipungila Dikulukulu, bavwa ne civwabo babiikila ne ncidimu cya budishikaminyi. Apu mpavwa bantu bônsò, bavwa bapika abu, bafwanyine kuya badishikamine pavwa mpungi wa cibilu cya budishikaminyi wediibwa. Kadi pa dîbà adi pavwa muntu kayi upatuka uya to, pavwaku kabingila kampanda kavwaye mufwanyine kufila, bwa ne kavwa muswe kwalukila mu buloba bwende to, pa dîbà adi bavwa ne cya kumwenza cimanyinu ku dici, ne mulonda, ku dikunji dya mu ntempelo. Nenku pa dîbà adi bibilu bya budishikaminyi nansha bilwe bilondangane misangu bûngi munyi, muntu awu ukaavwa mumana kusumbisha kashidi. Kavwa mwa kwalukila kabidi bu mwena mwabo wa mu Izaleela to, cyakabidi nkwardi. Úvwa mwenze cinyi? Mubenge dibiikila dyende. Kabivwa bikengela bwa kufutaye cintu nansha cimwe to. Dibanza dya bupika bwende divwa dijike. Famiye wende uvwa mudishikamine. Yêyê uvwa mufwanyine kwalukila buludi mu buloba bwabo ne kwangatulula bintu byende sungasunga abi. Kadi yêyê mubenge kucyenza, pa dîbà adi kavwa kabidi mwa kupeta bumpyanyi mu Izaleela to, ne bintu bivwa byende yêyê abi bavwa babipeesha muntu mukwabo.

<sup>61</sup> Mpindyewu, cintu cimwecimwe aci mu mubidi cidi cyangaciibwa mu nyuma. Aci, byôbî byenzeke ne twêtù aba, bu bapyanyi baa Mwoyi wa Cyendeleele, bumvwe Evanjeeliyo ne bamanye ne ng'Wa cya bushuwa, kadi tuMubenga, kadi tubenga bwa kucyenza anyi kuMuteeleja, tudi twangata cimanyinu cya nyama wa lwonji.

<sup>62</sup> Mpindyewu, muntu wâmbî ne: "Mpindyewu, nekulwe ci—cimanyinu cya nyama wa lwonji, necilwe matuku kumpala eku." Lekaayi nnupe bwalu. Cikaadi cimane kulwa. Nwamonu anyi? Pakaadi anu Nyuma Mwîmpè ubanga kupona, cimanyinu cya nyama wa lwonji cidi cibanga kwenzeka. Nwamonu anyi?

<sup>63</sup> Wêwè udi ne bintu anu bibidi cyanaana. Cimwe cya ku byôbî, ncyà ne, kuMwitaba, nkwangata kwa Citampi cya Nzambi. KuMubenga, nkwangata kwa cimanyinu cya nyama wa lwonji. Kubenga Citampi cya Nzambi nkwangata kwa cimanyinu cya nyama wa lwonji. Bantu bônso mbumvwe anyi? [Disangisha didi dyamba ne: “Amen.”—Muf.] Kubenga Citampi cya Nzambi nkwangata kwa cimanyinu cya nyama wa lwonji. Bwalu, Bible mmwambe ne: “Bônso bavwa kabayi batwibwe Citampi cya Nzambi baakangata cimanyinu cya nyama wa lwonji.”

<sup>64</sup> Pavwabo beela mpungi, bônso bavwa baswe kuya badishikamine bavwa mwa kuya. Bavwa kabayi baswe abu, bavwa batwibwa cimanyinu.

Mpindyewu, nudi numona’s, cimanyinu cya nyama wa lwonji, twêtù tucyamba ne ncyà matuku acilwalwa, mpikaalaci mwa kumweneshiibwa, pawamanya ne ki cyûkaadi mumane kwenza. Nwamonu anyi? Ki mudi kabidi Nyuma Mwîmpè, Ûdi ne cya kumweneshiibwa. Patwamona Mukalenge Yesu ulwa mu butumbi, ne patuumvwa bukole bushintuludi abu, ne patwamona bafwe babiika bapatuka mu nkita, ne tumanya ne mu katanci kaa kasunsukila kaa kasunsa, netushintuluke ne netupete mubidi mufwanangane ne Wende. NeAmweneshiibwe. Pa dîbà adi, kumona aba baakaMubenga abu, nebabashiye panshi apa, pambelu.

<sup>65</sup> Yesu kaakambaku ne baavirgo baakapatuka bwa kutwilangana ne Kilisto anyi? Bamwe baa kudibo baakalaala tulu, cilu cya kumpala, ciibîdî, ciisâtù, ciinâyî, ciitânù, ciisambombo, too ne ku cilu cya mwandamutekete. Kadi, mu cilu cya mwandamutekete, dîbà adi ki dyakalwa dîyî ne: “Monaayi, Mubaki nyawu ulwa. Patukaayi nukatwilangane Nende.” Nenuku aba bavwa balaale tulu abu, baakabiika. Cikondo cyônso cya paanyima aci, too ne ku Mpenta, baakabiika. Nwamonu anyi? Kuumukila ku cikondo cya mwandamutekete, cikondo cya mwandamutekete cya ekeleeziya, kuntwadijilu too ne kundekeelu, baakabiika. Kadi aba bavwa mu eci cikondo cya ekeleeziya, biikale ne mwoyi abu, baakashintuluka. Nenuku baakabwela.

Pa dîbà mene paakabwelabo apu, baavirgo bavwa balaale tulu baakalwa ne baakamba ne: “Tudi baswe kusumbaku ndambu wa Maanyi enu awu.”

<sup>66</sup> Kadi abu kwambabo ne: “Tudi naawu makumbane anu bwetu twêtù biine. Ndaayi kudi badi bàÀsûmbishà.”

“Nenuku pavwabo bateeta bwa kupeta Maanyi aa, Mubaki wakalwa.” Kakutu kwanji kwikalaku cikondo kampanda mu maalul malonda a buloba ebu, cikaadîku ba-Épiscopalians, ba-Baptistes, ba-Méthodistes, ba-Presbytériens... Bibejibeji mbyûle tente. Bibejibeji bya ntendelelu bidi bitumbisha Nzambi, mùdî baavirgo badi balaale tulu abu bateeta bwa

kupeta mpenta, bateeta bwa kupeta Nyuma Mwîmpè. Kadi bantu kabeenaku bafika ku dyumvwa ne aci kacyakwenzekaku, bilondeshile Dîyì dya Nzambi anyi? “Pavwabo bakeba bwa kwalukila apu, Mubaki wakalwa ne wakangata Mukaji-musela. Ne baakeediibwa mu mîdimà ya pambelu, bwa cilumbulwidi,” bwalu baakabenga dibiikila dyabo.

<sup>67</sup> Bantu bônso mbabiikidiibwe bwa kulwa. Nzambi, mu cikondo cyônso, utu mmutume Bukênkè Bwende, kadi Bwôbo bwakabengiibwa.

<sup>68</sup> Nenu, mpindyewu, leelu ewu kî mmushiilanganeku ne dituku dikwabo dyônso adi nansha, bwa kubenga dituku dya dikenkeciibwa. Padi Nzambi munkaci mwa kwenza dikumbula kudi Ekeleeziya ne kudi bantu apa, Mwakidila pa dîbà adi. Kulaadikiji too ne ku cidimu cyavwa, ku ditabulujya dilwalwà to. Dîbà ki dyôdi adi ne: “Leelu ewu ki dituku dya lupandu.”

<sup>69</sup> Nenu vulukaayi ne, kacya Nzambi katuku mwanji kutuma Mukenji, nansha mu dituku kaayi, ÛdiYe kayi mushindike ne citambe-mfukilu to. Yesu wakamba, Yêyè mwine ne: “Mêmè nciyi ngenza byenzedi bya Taatù Wanyi to, nanku kanuNgiitabuuji to. Kadi Mêmè ngenza byenzedi, itabuujaayi byenzedi panwikala kanuyi mwa kungiiitabuuja Mêmè,” kadi panudi nubimona patooke tòò ne—ne bimweneshiibwe.

<sup>70</sup> Mpindyewu dîbà dyalu didiye uWubenga, pa dîbà adi mmutubudiibwe dici ne mulonda, pashiishe kaakuWumvwaku to. Mpindyewu nyemu wayi kadifila mu nsangilu wa maeeleeziya, bwa kumubwela buludi bwa kwangata cimanyinu cya nyama wa lwonji.

<sup>71</sup> “Kamwe kaa ku twipacila tunene,” muntu kampanda mmumpe cibejibeji aci anu mpindyewu ewu, mùdi paapà mupyamupya ewu mwambe ne, “nkaa kusangisha pamwe maeeleeziya.” Bôbò’s nebacyenzè bulelela anu mùndi mêmè mwimane kaaba aka emu. Ne beena Mishònyì paabo mbaseswishiiibweku. Nwamonu’s? Bwalu, ekeleeziya... Bible mmwambe, Pòlò, muprofeta wa Mukalenge awu, mmwambe ne: “Dituku adi kadyakulwa to padi dipambuka kadiyi dyanji kulwa, dyambedi, ne pashiishe... kumpala kwa muntu wa mpekaatu awu kayi mwanji kubuuludiibwa. Yêyè udi musòmbè mu ntempelu wa Nzambi awu, udibandisha yêyè mwine, cyônso cidi kumutu kwa Nzambi aci; yêyè, bu Nzambi,” ufwilangana luse ku mpekaatu pa buloba, ne bikwabo. Mushindu mwine udi bwalu ebu bwenzeke’s we! Kadi kabuvwa mwa kwenzeka to too ne pavwa dipambuka, too ne pavwa ekeleeziya ubanga kuseesuka ku difesto dya nyuma, udisaka paanyima ne udyenza bulongolodi. Ne pa dîbà adi dibuulula kadyakashaala ne ekeleeziya to.

<sup>72</sup> Vulukaayi ne, Izaleela wakenda, mundaamuunya ne bufuku, ku Dikunji dya Kapya. Pavwa Dikunji dya Kapya adi

ditentemuka, bavwa batentemuka naaDi. Nenku vulukaayi ne, Divwa Kapyà bufuku, ne Ditutu mundaamuunya. Pa nanku nDifwanyine kulwa, mundaamuunya anyi bufuku, pa dībà kana dyònsò. Kadi, mwaba wònsò uvwaDi disanganyiibwa, kuvwa kwenjiibwa difuta dya cibawu, bwa kabapangi kuDimona to. Divwa Bukènkè bufuku, ne Ditutu mundaamuunya, ne bōbō bavwa benda baDilonda. Eyowa's, mukalenge. Cintu cimwecimwe aci!

<sup>73</sup> Martin Luther wakaDimona. Cyakenzaye ncinyi? Wakapatuka mu cyena Katolike. Kadi bōbō baakenza cinyi? Baakiibaka kaalupangu kakese kacinyungulukile, kwambabo ne: “Tudi ba-Luthériens. Eci ki cyòcì.”

<sup>74</sup> Pashiishe ki Wesley kuDimona dipatuka dyumukamu. Yèyè kuya. Cyakenzabo ncinyi? Baakiibaka kaalupangu kakese kacinyungulukile, kwambabo ne: “Eci ki cyòcì.” Cyàkenzà Bukènkè abu ncinyi? Bwakatentemuka kuya anu kumpala, cyakabidi.

<sup>75</sup> Mpenta kuDimonaye. Cyakenzabo ncinyi? Baakapatuka mu ba-Wesléyens ne ba-Nazaréens, ne bikwabo. Cidibo benza ncinyi? Badi biibaka kaalupangu kakese kacinyungulukile, badibiikile ne: “Tudi ba-unitaires,” ne “Tudi ba-trinitaires,” ne “Tudi Basanga,” ne byònsò ebi. CyakenzaYe ncinyi? Nzambi wakatentemuka ne wakapatukamu e kuya kumpala. Nwamonu anyi?

<sup>76</sup> Twètù katwena mwa kwenza aci to. Bikengela twikale twenda tulonda, dituku dyònsò, dībà dyònsò dya dituku, cidya cyònsò cya njila. Bikengela twikale balombodiibwe kudi Mukalenge Yesu Kilisto. Katuyi benze nanku to, tudi twangata nsòmbelu wa cyena bulongolodi. Ne nsòmbelu udi kayi ulonda Kilisto, ku dituku ne ku dituku, kī mmukumbanyine to.

<sup>77</sup> Muntu udi mwena Kilisto mu dyalumingu, uya mu ekeleeziya, ùsòmbela paanyima pààpa ne wèlà meji ne ekeleeziya ng'wenda yèyè bwalu ùdi wènzà *cikampanda*, *cikansanga*, anyi *cikankenga*, kadi mu dimwe mwikale wiba ne ushima. Ne bakaji bàdi baya ku myaba ya ciibungì ya mu lusenga lwa kumpenga kwa mâyi, ne—ne bapatuka baya mu mìsèsèsù, bavwale tulàmbà tudi tusalulangana masandi!

<sup>78</sup> Mvwa ngeela meeji bwa—bwa inàbànzà mukaj'a mfumu wa ditunga, kavwaku muswe kudilaaba nansha bilaabu kwisù to, bwa kuya kumpala kwa paapà; kadi mmwenze anu walukila, kuditeekaye bu ntungaamulongo wa bisuba bya nsuki bwa bakaji mu ditunga emu. Ne nkanzu yònsò eyi, myenze ne, paakalwaye maamu, mukaji yònsò mu ditunga emu ujinga kuvwala umwe wa ku nkanzu ya mushindu wa baamaamù ayi mpindyewu. Ncya bushuwa. Abi mbilejilu. Ne bōbō mbamanye ne bantu abu mbafwanyine kwenza cyòcì aci. Badi bavwala

nyuma wa pa buloba. Kadi aci kî ncyà mu Ekeleeziya wa Nzambi udi ne mwoyi nansha.

<sup>79</sup> Bivwa bikengela bakaji kwikalabo batangija mèsù abo kudi Yesu Kilisto. Bivwa bikengela nwênù kwikala kutangija mèsù enu kudi Sarah ne kudi bakwabo baa mu Dipungila Dikulukulu abu.

<sup>80</sup> Mpindyewu, bakaadi bashaale too ne mu mushindu wa ne . . . Mvwa nyiisha diloolo dikwabo, mu mwaba kampana, ngamba bwa bakaji kwikalabo batumikila baabayaabo. Kutumikila? Eyo. Aci cikaadi cyumuke mu mushingà wa dibaka, kukaadi ntanta mule. Kadi bôbò kabaakwenzaku aci to. To, mukalenge. Bôbò mbasômbèle mu Amerike, ne ki cidibo bakwambila bwa wêwè kumanya. Kabaakutumikilaku to. Kadi, paudi anu kuyi ucyenza to, kudidingiku bwa kuteeta kudibiikila mùdi mwena Kilisto to, bwalu kî ncyûdi to. Nansha wêwè uja maja ne wakula mu myakulu bûngi munyi, pawikala kuyi utumikila bayeebe to, udi pambelu paa diswa dya Nzambi.

<sup>81</sup> Mukaji udi uvwala tuputulu ne wenza bintu bidiye wenza mu mùsèèsù abi, kudibiikidiku wêwè mùdi mwena Kilisto to. Udi ujinga kwikala ne maalù a pa buloba kadi mwikale anu kacya wakwata ku bujaadiki bwebe. Kwêna mwa kwenzaku aci mu Bwikadi bwa Nzambi to, paudi mumanye cidi cîmpè citambe dyanza dya aci.

<sup>82</sup> Monaayi ne, “mutubula dici,” mwenza cimanyinu, pa dîbà adi kwadyakuumvwaku to. Vulukaayi ne, aci ncimanyinu cya dijikà dya mu maci. KwadyakuCyumvwa kabidi to. Kwakuteeleja to. Kwakupetaku mushindu kabidi to, bwa kucyenza kabidi.

<sup>83</sup> Kaa! “Yêyè katu witabaku Aci to.” Kaa, ekelekele! “Wêwè kumwambidiku to. Mmucitâbùùje.” To. “Yêyè udi ukwambila anu . . .” Kî mmu Cimanye to. Mmunyi mudi inâ—inâbânzà mufwanyine . . . Ndi nganji anu kunukonkapaanyi cyanaana ne, mmunyi mudi inâbânzà mufwanyine . . .

Pâmvwà ngaakula mu dyalumingu, diloolo dya dyalumingu dishaale edi, kukaadi lumingu lujima too ne diloolo edi, pa “bukênkè bukunze bùdi bupòdya,” mushindu ùkaadi nkwa wa—wa—ba bakaji mushaale wa balenga kwîsù kupita muvwabi kwônso eku. Mpindyewu, aci kî—kî ndilwisha dya mukaji to, mpindyewu, cidi anu . . . kadi mushindu udiye ukontonona ciine aci. Nwamonu anyi? Kùdi . . . Ùkaadi mushaale mushindu awu, bwa kumuteeka mu diteeciibwa, muvwa Eva muteekiibwe kumpala kwa mucu awu.

<sup>84</sup> Mulume yônso, mwânà wa balume yônso udi ulwa kudi Nzambi, bikengela apicile mu dîbà dya diteeta adi. Eci ncikondo cya bakaji, ditunga edi, mudi mukengela bwa mukaji apicile mu diteeta adi. Bu yêyè mwa kwikala mukaji mulenga kwîsù, kadi mwikale wenza maalù bu mwaneetu wa bakaji, dibeneshà dya

Mukalenge didi pambidi pende. Kadi pakaadiye mwa kudifila ku—ku dimanya eci, kadi kudizanjika, kakuyi mpatà to aci cididilejea anu ne ùdi ne—ne nyuma mubi pambidi pende. Kèna ne meeji a kwikala mushindu awu to, ncyèna ngeela meeji nanku to, bààbùngì baa kudibo kabeena ne meeji awu to. Kadi kabeena bafika ku dyumvwa cyòci aci to.

<sup>85</sup> Nudiku bafwanyine kungambila ne mukaji udi udineemeka, ne wa wela meeji ewu, mmufwanyine kuvwala tulàmbà tukese tudibo bavwala pambelu apa mu mìsèsù etu anyi?

<sup>86</sup> Ndi ne bânà baa bakaji batekete babidi basòmbe mwab'ewu. Ncyèna mumanye cyavwila bânà abu kundekeelu ncinyi to. Mémè ndi anu mbasambidila. Bânà, leelu ewu wa Ndaaya, ncyèna . . . Kamwena mushindu wa kubyamba to. Ncyèna mumanye to. Kí mbatwibwe cisàlù cya kubengabi kubenzekela to. Bikengela biikale badiimanyine ne makàsà abo abidi matwe panshi, kumpala kwa Yesu Kilisto, bwa kulumbululabo. Kabeena mwa kubwela biimanyine pa cididilejea . . . pa—pa cindimémè ngiitabuujà, ne pa cididilejea mamwábò witabuujà to. Mémè ncitu mumanye bitubo benza to. Kadi mu bushuwa bwa bwalu ndi ngiitabuujà ne, mu díbà edi, bu bânà baa bakaji abu mwa kupatuka mu mùsèsù, bavwale bilàmbà bya mushindu awu, ne muntu mulume kubapendaye, biikale bavwale bilàmbà bya mushindu awu, ncyèna ngiitabuujà ne, bu mémè ne mpunga, ne ndiku mufwanyine kupiisha muntu awu to. Aci's ncyà bushuwa. Ndi mémè mpiisha bânà baa bakaji abu. Kabavwa ne cya kwenza nanku to.

<sup>87</sup> Teelejaayi. Piikala muntu wela meeji, ne bôbò balongesha ne: “Muntu katu mupite nyama to. Mmufumine ku bukwanyama.” Kadi tangilaayi, pa díbà adi, muteekaayi pambelu pààpa bu . . .

<sup>88</sup> Nutu nwangata mbwa nuya nende kudi kabwa kakaji mu bikondo kampanda, mu mpangu ne bikwabo byònsò, s'mbwalu kabwa kakaji aku kadi mu ngiikadilu awu; ngulube, ngombe, nyama mukwabo kana yònsò ewu. Nenu patwikala twètù mwoyi wa bukwanyama; bwalu ki citudi, bwa luseke lwa mubidi. Kadi padi mukaji udizanjika mushindu awu, s'ùdi ùjaadika ne ùdi cintu anu cimwecimwe cididilejea kabwa aci, anyi cintu cimwecimwe aci, menemene, bwalu kavwa mufwanyine kwenza nanku nansha. Yèyè's mmumanye. Bufuki's budi bumulongesha ne muntu mulume neamutangile. Ne Bible utu mwambe ne: “Ewu yònsò udi utangila mukaji bwa kumwalakana ukaadi mumane kwenda nende masandi munda mwa mwoyi wende.”

<sup>89</sup> Aci cididilejea citeeka cikondo cya diteeta. Kadi dyabulu udi uvwija bakaji abu balenga kwìsù, ne ubavuula bilàmbà, kadi kubateeka pambelu pààpa, bwa kunuteeka nwènù ku diteeta. Nwènù balume, tumaayi mpala mu cisuku. Ikalaayi bânà baa balume baa Nzambi. Nwènù bakaji, vwalaayi bilàmbà bu bânà

baa bakaji baa Nzambi. Kanulu kalumbulula bwa dyenda dya masandi mu Dituku adi to.

<sup>90</sup> Piikala mukaji awu, nansha mwikale kayi mwenze bwalu to. . . mmufwanyine kwikala kayi mwenze bwalu bubi to, kayiku mene ne meeji a kwenza bwalu bubi to. Kadi ngènzàmpèkààtù uvwa mutangile mbungakeenu mubidi wa mukaji udi ukoka ntema awu awu (mumanye ne yèyè mmuntu mulume, ne mubidi wa bukaji paawu udi mu ewu. . . tujilu twa masandi mu ewu, ne bya bulume mu mukwabo), ne nebikengele bwa ngènzàmpèkààtù awu kulumbululaye mu Dituku dya Cilumbulwidi: Udi mucyènzè nganyi? Udi mupiile nganyi? Kí nyèyè awu to. Ngwèwè. S'ki bwalu mbwabu, mwena nsòmbelu wa masandi.

<sup>91</sup> Tangilaayi ditunga edi. Bivwa pa ciibidilu ne, bôbò—bôbò pavwabo ne nkanzu ya mishiikidile mu binù yivwa bakaji bavwala ayi, bivwa bikengela twètù tuyilombesha ku Paris bwa kuyipeta. Leelu ewu, Paris ngukaadi uyilombesha muneemu bwa kuyipeta. Bikaadi bikooyike bikole mu mushindu wa Paris mwine ukadi mushaala paanyima. Ncya bushuwa. Dyônsò dijima. . . Bwa cinyi? Dibenga dya Evanjeeliyo. Bwa cinyi?

Paris kavwa Nende to. Yèyè udi ne bwena Katolike lukama pa lukama. Beena Mishònyì kabeena nansha mwa kubwelamu to. Tangilaayi Billy Graham. Ngeela meeji ne mudi beena Kilisto anu nkama isambombo mu Paris mujima, pa miliyô, beena Kilisto nkama isambombo, beena Mishònyì. Biine abu kabayi bûle tente ne Nyuma Mwîmpè to. Badi anu beena Mishònyì beetu baa patupu aba, nkama isambombo, pa miliyô kuvudija ku miliyô. Kabaakapeta mpunga wa kuMubenga to.

<sup>92</sup> Kadi bantu aba badi ne Evanjeliyo. Kadi padibo baseesuka ku Mukenji ne Evanjeliyo udibo bamone muleejiibwe patooke, badi baMuseka anu bwalu dilongesha kampana dya ndumba kampana wa kale ndibèlè mu kanjingambaala; ne mpaasata kampana mwimane mu cyambilu, utamba kwela meeji ku ndola ne kwende kudiye udiila kupita ku musuuka, bantu biine badiye uyiisha abu, ncya bushuwa, ki cidi cicyènzè ncyôci aci. Mpindyewu ditunga edi ki dikaadi dileeja baa pa buloba dikàsà.

<sup>93</sup> Nudi bavuluke, abidi adi panshi aa, mu tabernacle emu. Mvwa muyiishe pa cyena-bwalu kampana, kukaadi bidimu bitwe ku makumi abidi ne: “Nénnùleejè nzambi mukaji wa Amerike,” kuvwa kakaji kakese aku kaa mvwadilu mubi mwab'ewu, kasòmbè kakavwale mwaba awu. Ki cidiku ncyôci aci. Mpindyewu mene, bakaadi naaku's. Badi munkaci mwa kupeta citubo balombelombe. Ne bôbò's nebacipete. Kwajiki.

<sup>94</sup> To. Kabaakuciitabuujja to. To, mukalenge. Bakwambila mudibo beena mwabo baa Amerike, ne mudibo ne bukenji bwa—bwa kukwata mudimu mudibo baswe mwônsò amu. Mémè ndi anu njinga. . .



<sup>95</sup> Lekaayi nnumpe mwanda. Nènnwǎmbilè mpindyewu. To, mukalenge, cididi kacyadyakwenzaku bwalu bwa nsongo to. To, mukalenge, mungalaata kawakwenzaku bwalu bwa nsongo to. Mungalaata ukaadi mubole, too ne mu mifuba. Bu biikale bawenza munkaci mwa musumbà wa beena Kilisto, bivwa mwa kwikala bimpè. Kadi panudi nuwuteeka pambelu pàapa mu baa pa buloba, udi ulwa anu bilambà bya ku mazuwa a mâyi pa byôbi kakuyi lwongo to. Cya bushuwa menemene.

<sup>96</sup> Tangilaayi muneemu emu, leelu ewu. Cintu kana cyônsò cidi mwa kwenzeka, kadi bôbò nebiikale anu...Cintu kana cyônsò, kukoka ndambu wa beena cididi, kadi nebashaale kabayi banyookiibwa to nansha bôbò bashipangana.

<sup>97</sup> Pângààkayiishà kuntu kwaka, diloolo adi bwa kuteeta bwa kusungila mwoyi wa bânà babidi abu. Mbapiile bapange ne mwa kupiila. Nansha mwine ndumbùlùlà awu wakajuuka e kwimana paanyima paanyi, kwamba ne: “Ncya bushuwa.” Yèyè ne: “Ncyèna ngiitabuuja dishipa dya bantu to.” Yèyè ne: “Nwênù baswe kumona mu milubu yenu ya benzavi, mbanganyi batubo bashipa mu nkwaswa mitwa ku nzembu ne bikwabo? Kî mbabanji to. Mubanji yèyè udi mwa kupeta mushindu wa kudyangacila mumwakwidi wa bwenzeji kampanda, tuumàyèle kampanda twa bukooya, ne ndambu wa tuntu tukodyakane *apa*, ne ndambu lwà *apa*, ne kukosa cintakanyi mishiku.” Yèyè ne: “Mbânà bapele bu bôbò abu, badi kabayi ne mfranga mikumbane kudisumbilaku dilongo dya byakudya dya kaneemu edi, baa mushindu awu mbadi basuna badyambika’s. Ki bôbò baa mushindu awu badibo bashipa ku nzembu, muntu wa bu badibo babiikila ne mmusumbà wa bapangi, biikale anu kacya baakwata ku dînà dyabo dya dinyooka dya lufu.”

<sup>98</sup> Mêmè kwamba ne: “Mushipyanganyi wa kumpala ukaadiku mushipangane pa buloba, mushipe mwanaabo, kadi Nzambi kaakamushipa bwa nanku to. Wakamutwa cimanyinu, bwa muntu nansha umwe kamushipi to. Cya bushuwa. S’ki Nzuji Wa kumutu kwa bônsò nyawu.”

Ndi mmona ne baakabuumushila cibawu aci. Mpindyewu nebasambe cilumbu cikwabo. Mu bushuwa bwa bwalu, bôbò nebabakosele buloko bwa kashidi mpindyewu, ciikalà bidimu dikumi ne cimwe, ne pàmwǎpa babiitabila bwa budishikaminyi bwa munu ku dîsù. Mbapiile. Cya bushuwa. Mbapiile. Bivwa bikengela kubatumabo mu buloko, bwa kashidi, kadi kabayi babashipa to. Muntu nansha umwe kêna ne bukenji bwa kushipa mukwabo muntu to. To, mukalenge. Ncitu ngiitabuuja aci to. To, nansha kakese.

<sup>99</sup> Kaa! Badi bamba...Mona’s, kabeena biitabuuja ne badi pambelu paa diswa dya Mukalenge to, bwalu aci ki cyônsò cidibo bamanye, cyônsò cidibo baswe kuumvwa babambila’s. Bakaadi batume maci ku luseke bwa kabumvu Bulelela to, mwômò amu.

<sup>100</sup> Nansha Ejipitu kavwa muswe kumanya ne musùmbà wa bansantu babunguluki baa mu malaba kuntu kwaka abu uvwa ndiswa dya Mukalenge to. Mmunyi muvwabo bafwanyine kukeba bwa kumanya ne muntu mupâle kampanda uvwa mulwe muntwamu amu, ufumina mu cipeela, ne mwedi cipamba mulembelele mushindu ewu, wamba ne: “Pâlò, ndi mulwe mu Dînà dya Mukalenge. Lekelela bânà abu?”

Pâlò mufwanyine kwamba ne: “Nganyi? Mêmè? Mwelaayi pambelu.” Nwamonu anyi? “Mêmè?”

“Kuyi mwenze nanku to, Mukalenge Nzambi neatuute ditunga edi ne manyooka.”

<sup>101</sup> Nansha nanku: “Mukulakaji wa cimfiikaamunda awu, mwelaayi pambelu mwaba kampanda. Umuke aye. Muunya ukaadi bu mumwoshe bwongo padiye apu.” Nwamonu anyi? Kadi cyakatwala dinyooka, bwalu muntu awu uvwa muprofeta ne uvwa ne EMU MMUDI MUKALENGE WAMBÀ. Cya bushuwa menemene. Kabaakaswaku kuciteeleja to.

Loomo kaakaswaku kuciteeleja to, yèyè pende, kadi byakenzeka anu mene.

<sup>102</sup> Izaleela kaakaswa bwa kwitabuuja ne ùvwa m’Maasiya to. “Mmunyi mene’s bôbò aba, musùmbà wa—musùmbà wa beena Ngalela aba?” Bamba ne: “Bônso aba kî mbeena Ngalela anyi? Mbafumine penyi biine aba? Mmusùmbà wa mushindu kaayi mene udiYe wenda naawu ewu? Bapele baa menemene badibo mwa kusangisha aba, ki musùmbà udiYe muswikakane naawu ngwôwò awu. Ki badi balwa kuMuteeleja mbaabu, bapele, bantu badi kabayi bamanye cintu baba. Kabayi basungudiibwe to. Kabeena—kabeena bantu baa mamanya a mu mitu baa mushindu utudi twètù aba ewu to. Mmusùmbà wa bapele.” Nutu nucyumvwa bacyamba bwa ditabuluja mu dituku edi. “Mmusùmbà wa bantu kaayi mene’s badi babateeleja? Mbaa mushindu kaayi mene’s badi baya mu miine masangisha aa? Mbantu baa mushindu kaayi?”

<sup>103</sup> Mvwa muumvwe muntu kampanda wamba, abidi adi panshi aa. . .Ee, yèyè uvwa bu. . .Ùvwa ntatwëndè mudiishi wa Hope. Nenku mvwa mmwambila bwa dibatiiza dya Nyuma Mwimpè. Yèyè ne: “Mpindyewu, nganyi pende udi mufwanyine kwitabuuja cintu cya mushindu awu’s, pa kuumusha musùmbà wa bantu baa bwena baudi naabo kuntwaku abu?” Yèyè ne: “Nulekela *Kampanda* wawa, mwena kantu-ku-byanza wa mu cimenga emu, wa lwonji bu cinyi awu, numulekela wamba pende mudiye mupete Nyuma Mwimpè, njuuka paanyi kwitabuuja ciine aci.”

<sup>104</sup> Mêmè ne: “Kuditacishi to. Yèyè kaakucyambaku to.” Muntu awu wakafwa lufu lwa cikoso, kayi ne Nzambi to. Nwamonu anyi?

Ikala mudimuke bwa byûdi wenza. Ikala mudimuke bwa byûdi wamba. Udi dijinga ne nsòmbelu udi mukumbanyine Evanjeeliyo. Cya bushuwa.

<sup>105</sup> Izaleela kaakiitabuuja aci to, musumbà wa bantu awu. “Mupâle wawa, Dîna Dyende Yesu wa mu Nazaleeta, mulela,” muvwabo badyambidila’s, “mulela mu masandi.” Ne bantu baakaciitabuuja. Bwalu, bavwa bamba ne: “Awu kî ntatwëndè to. Mona’s, Wende tatwëndè’s n’Yozefu, kadi Mariya wakapeta difu dya Mwânà mwine ewu kumpala mene kwa kabayi nansha. . . Mulediibwe, mona’s, s’ngwa mu masandi. Ne Yêyè udi cinyi? Mupâle anu wetu ewu. Ngumwe wa ku bantu baa mushindu wa mukutakane abu. Kanuyi kaMuteeleja to.” Bavwa benza cinyi? Bavwa munkaci mwa dituma misuuka yabo mu inferno. Bavwa bangata. . .

<sup>106</sup> Yesu kwamba ne: “Balekelaayi. Mpofu yêyè ulombola mpofu, bubidi bwabo kabaakupona mu mukidi anyi?” S’ncya bushuwa. Bôbò kabavwa bacimanyeku to. Kabavwa baswe kuCiitabuuja to. Kabavwaku mwa kwitabuuja to.

<sup>107</sup> Kabavwa mwa kumona ne mmunyi muvwa bantu bapwekele biikale ne Mukenji mupwekele, kubengiibwa kwabo, kuvwa kufwanyine kufikisha ditunga dijima ku kabutu to. Mpindiyewu teejeaayi. Kabavwaku mwa kuumvwa aci to: musumbà wa bantu bapwekele, baa ciibidilu aba, baa ciipanshi aba. Nudi bamanye, Bible mmwambe ne: “Bantu baa ciipanshi bavwa bateeleja Yesu ne disanka.”

<sup>108</sup> Ngâkapeta kaacintu kampana kenzeke mu Mexique, abidi adi panshi aa. Valderna Kâlââlâ kaa masalaayi, musungula wa Nzambi, Bukênkê e kuteemena mu njila wende musangu kampana, mu dimwe dya ku masangisha. Mulwanganyi wa mvita munene wa cyena Katolike awu, umwe wa ku tulââlâ twa masalaayi twa kuulu menemene mu Mexique, wakalwa ne didipwekesha dyônso ku cyoshelu ne wakapeta dibatiiza dya Nyuma Mwîmpê. Kupinganaye ku Mexique. Ki kwikalaye anu ungeela mbila, bwa mêmê kuya kuntwaku. Ndekeelu wa byônso, mêmê kwangata dipangadika dya kupwekaku. Mukalenge nguwva mundombole; mvwa mupete cikeena-kumona. Mêmê kwambila mukajaanyi. Mêmê kukupweka.

Nenku paakenzaye nanku, yêyè mwikale umwe wa ku bamfumu baa tulââlâ twabo twa masalaayi, kalââlâ kaa masalaayi kaa mitooto inaayi, kuyaye ku ciimamwëndè wa bukalenge, ku bukalenge. Kadi, bôbò, batu balwishangana ne beena Mishòònyi muntwamu bikole, nudi bamanye’s. Pa nanku bavwa bamanye ne bwa eci neciikale disangisha dya tuyaayi tukamone, ki kuyaye kuntwaku e kwangata bampulushi batu balama bantu abu. Mbenze anu bafika, kupetabo cipalu cinene aci. Nenku bavwa ne cya kumfikishamu mushindu awu. Bukalenge mbuvwa bumfikishamu.

Nenku, paakenzabo nanku, mwe—mwepiskopo, umwe wa ku beepiskopo banene baa ekeleeziya wa Katolike, kuyaye kudiye, kudi nguvena, kwambaye ne: “Mukalenge, ndi ngumvwa bamba ne nudi nufikisha muntu muneemu udi kayi mwena Katolike.”

Awu ne: “Eyo. Udi umona bishi?”

“Mona’s,” mwakambaye, “kanwena mwa kufikisha muntu bu nanku awu muneemu to. Kacya bukalenge ebu kabutu bwanji kumanyaku mwa kwenza cintu bu nanku to.”

<sup>109</sup> “Kadi,” mwakamba awu nanku, “twacyēnji bwa mpindyewu’s.” Yêyè ne: “Mona’s,” ne, “muntu awu mmuntu mumanya ne ngwa kweyemenyiibwa. Ndi ngumvwa bamba ne binunu bya bantu badi bapatuka bwa kumuteeleja. Valdena Kalààlà kaa masalaayi awu, mmulunda wanyi wa katapula-kateeka.” Yêyè ne... Kabidi uvwa ne... Mfumu wa ditunga mwine mmwena Mishòònyì, nudi bamanye’s, Méthodiste. Ki kwambaye—kwambaye ne: “Muntu awu mmuntu mumanya ne ngwa kweyemenyiibwa, ku dyanyi paanyi dimanya.” Yêyè ne: “Valdena Kalààlà kaa masalaayi ewu, mmukudimwisha mucima kudi mwine muntu ewu.” Yêyè ne: “Mona’s, yêyè ewu, ku dyanyi dimanya, mmuntu mumanya ne ngwa kweyemenyiibwa.” Yêyè ne: “Binunu bya bantu, mudibo bamba, nebalwe bwa kumuteeleja.”

Ki mwepiskopo ewu ne: “Mbantu baa mushindu kaayi biine abu’s, mukalenge? S’anu binyonga byetu ebi. Baa nanku awu’s ki batu baya, bakateeleja muntu wa mushindu awu.”

<sup>110</sup> Mfumu awu ne: “Mukalenge, nwènù aba’s mbadi naabo kukaadi bidimu nkama itaanu mijima, bēnji binyonga bwa cinyi?” Bwalu kumba kutuuka’s. Aci kadi kukosa bwalu. Kaa, ekelekele! Aci kadi kubapwekeshaci milongo. Eyowa’s, mukalenge. Eyowa.

<sup>111</sup> Pashiishe paavu mwânà wa mu diboko awu kubiishiibwa ku bafwe, mēmè kutuma muntu ne mukenji bwa kulondaye muntu awu. Inàbànzà awu uvwa wamba, mu ci-Espagnol ne: “Mwânà ewu mmufwe mu dinda emu, pa dībà citeema jaajaaja.” Kadi kuvwa kuloka mvula wa yebeyebe, mvula’s. Tukudimwisha mucima bantu batwe ku binunu dikumi balwe kudi Kilisto, diloolo dyònsò.

Diloolo divwa didyānjìle, mpofu kampana mukulakaji uvwa mutabale pa cibumba cya ku cyambilu apu. Kaa, cya bunene bwa tabernacle ewu misangu isatu anyi inayyi, citumbuke bule *ebu*, pasanganyiiibwa bitambala bya mu nshingu ne bifulu bya kale panshi apu. Ki mēmè anu . . .

<sup>112</sup> Bavwa bampwekeshilmu ku myonji, mu cyalu amu, bwa kumbwejamu. Mēmè kupatuka anu mwaba awu e kubanga kuyiisha, ku diitabuuja.

Billy kulwaye, kwamba ne: “Papa, nebikengele bwa wêwê kwenzaku cintu kampanda, bwa mukaji wawa.” Yêyè ne: “Ndi ne baawisiyê nkama isatu biimane kwaka. Mbapange bukole bwa kwimanyika kakaji kakese kaa menemene, kaa bujitu bwa kilô makumi anaayi ne itaanu, bu nanku.” Kabidi kainâbânzâ kalenga kwîsù, kîpî kaa bule *ebu*, byenze bu ne, kaa, pâmwâpa civwa mmwanende wa kumpala’s. Ndi mufwanyine kwamba ne ùvwa ne bidimu makumi abidi ne bisatu anyi makumi abidi ne bitaanu.

113 Nenku ùvwa mwimane mwaba awu, ne nsuki mipweke, mwambule mwânâ mukese wa mu diboko. Nenku ùvwa mwa kudinana e kutupika mulongo awu. Bantu balume abu bavwa mwa kumusaka paanyima. Yêyè uvwa mwa kubâbândila pa mitu, ne mwânâ awu mwambula ku lubese, mushindu wônso naka, ubabwelela mu mantanta, anyi cintu kampanda. Bavwa anu bafwayine kumubândisha kwaka, kadi bôbô bamuumusha ku cibumba aku ne miseba.

114 Baa bwalu kabayi ne karta kaa disambila kaa kumupa to. Yêyè ne: “Mêmè mudidinge anu mumulekele mubwelemu, Papa, ne mwânâ mufwe wawa, kayi ne karta kaa disambila to, ne. . . .” Yêyè ne: “Padibi ne bakwabo mbiimane kwaka, bindile mwab’ewu kukaadi matuku abidi anyi asatu, mu mvula wawa ne muunya. Kadi kumulekela yêyè upita kumpala kwabo bôbô,” yêyè ne, “aci’s necijuule ci—cimvundu lwâ kwinshi kwaka.”

115 Mêmè ne: “Mbîmpè.” Mwaneetu Moore uvwa mwaba awu, ne yêyè utu ne dibâlâ dyanze anu bu mudi dyanyi edi. Ki mêmè kwamba ne: “Mukaji awu kî mmumanye ne ng’ewu anyi ng’ewu to, bantu mbapite bûngi.” Mêmè ne: “Tuma. . . .” Nenku—nenku bânâ beetu baa balume babidi, umwe wa ku bânâ beetu baa balume uvwa wa muneemu mu tabernacle ewu, ukââdi muye mu Butumbi mpindyewu, ncyêna mwa kuvuluka dînâ dyende pa dîbâ edi to, kadi, ùvwa mwimane lwa paanyima apu. Pa nanku mêmè kwamba ne: “Mwaneetu Moore, pweka wêwê, usambidile mwânâ awu. Mukaji awu kaakumanya ne nganyi to, bwa ne mmêmè anyi ngwêwê. Pweka anu cyanaana. Ne yêyè mwine kêna mwa kwakula Anglais to.”

Ki pa nanku Mwaneetu Moore ne: “Mbîmpè, Mwaneetu Branham.”

116 Kwasaye lwendu wenda upweka. Mêmè kwamba ne: “Bu mûmvwâ ngamba, fa-. . . .” Ki mêmè kumona mwânâ mukese wa mu diboko, mwânâ mukese wa beena Mexique musômbe kumpala kwanyi, mwikale anu useka’s. Mêmè kwamba ne: “Anji indila kakese.” Ki mêmè ne: “Shiilaayi kainâbânzâ aku njila.”

Billy ne: “Ncyêna mwa kwenzaku aci to, Papa. Yêyè. . . .”

Mêmè ne: “Ndi mumone cikeena-kumona, Billy.”

Yêyè ne: “Kaa, aci kaayi mbûngâ bwalu’s.”

117 Ki twètù kukangula njila mu musùmbà wa bantu awu mushindu awu ne kumupicishilamu. Ki yêyè ulwalwa ewu, kuponaye ku binù, ne lunzaadi mu cyanza. Mémè ne: “Juuka.”

Pa nanku mémè kwamba ne: “Taatu wa mu Dyulu, bwa mpindyewu kaayi ncyêna mumanye ciwenzà Wêwè to. Ncyêna mumanye ne Wêwè udi ukeba anu bwa mémè kusankisha mukaji ewu pa kusambidila mwanende, anyi ne ncinyi. Kadi,” mémè ne, “nyewu ntentekela mwànà mukese ewu byanza, mu Dinà dya Mukalenge Yesu.” Cintu anu cimwecimwe cingààkenzà bwa Mwaneetu Way aci, pavwaye mulaale panshi mwaba awu apu, mufwe, dîngà dituku. Ki mikolo kudisubayi mu mbulankete amu, ne mwànà mukese awu kubangaye kwela mbila mikole. Nenku civwa mbwa dipetulula dyende dya mwoyi. Pavwa . . .

118 Mémè kutuma muntu ne mukenji, Mwaneetu Espinosa, bwa kuyaye nende kwa ngangabuka, bwa apete kabeji kaa didicipa kaa dijaadika kaa kudi ngangabuka kaa ne: “Mwànà awu uvwa mufwe.” Tukaavwa bu pa dîbà dikumi wa bufuku nanku awu. “Ûvwa mufwe mu dinda amu pa dîbà citeema, mu bìrò byende, mufwe disaamà dya bisulusulu.” Kupetaye kabeji kaa didicipa kaa dijaadika kaa kudi ngangabuka.

Bafundi baa bibejibeji kabavwa mwa kulama bwalu abu to, nudi bamanye’s, ki kukengelabi bwa kulwabo kûndi. Kungeelabo nkonko. Ki kungambilabo, awu kunkonkaye ne: “Udi welaku peebe meeji ne beetu bansantu mbafwanyine kwenza paabu aci anyi, bôbò?”

Mémè ne: “Piikalabi ne badi ne mwoyi’s.”

“Kaa,” mwakambaye, “kwêna mwa kwikala munsantu paudi kuyi mwanji kufwa to.” Ki bwalu abu’s. Nwamonu anyi? Nenku bantu . . .

119 Nudi numona’s, dikwabo dituku, mmwaba kaayi uvwabo ne mansere uvwabo basumishile bwalu ewu, mu cibejibeji? Pa nanku, munsantu mupyamupya uvwa mufwe, kaa, kukaavwa bidimu lukama, anyi cintu bu nanku awu, ki kwenzabo . . . mbamuvwije munsantu mpindyewu, bamuvwije munsantu’s. Nenku bavwa bamba ne—ne mmwalukile ufuma ku bafwe ne musambidile mubeedi kampanda uvwa ne disaamà dya kansere kaa mu mashi. Kî mmuvwabi anyi? Civwa mmu cimwe cya ku bikandakanda. Anji elayyi anu meeji mudibo bateeta kusumisha bwine bwalu abu, kadi padiku nkama ne nkama ya maalu anu mwîsù mwa bantu mwab’ewu. Ki cintu kaayi ciine aci? Bwa cintu bu dinaya’s bwa kwelamu ekeleeziya wa Mishòonyi, nwamonu’s, bwa kumwelesha meeji ne kudi bwalu bwa nsongo.

Kadi byenzedi bilelela bya Mukalenge, mwaba udibi bishindikiibwe anu bya menemene ebi, bijaadikiibwe, kabeena bapeta dikima dya kulengaku cibejibeji bwa kubifunda to. S’ki bwalu abu. Mbapete dibiikila kadi kudibengabo. Eyowa’s, mukalenge.

120 Kabeena mwa kuumvwa mudi Mukenji mupwekele, cisamba cipwekele, ne kubenga cintu bu nanku nkufwanyine kubeela mu cimvundu cinene to.

121 Mukaji mukwabo uvwa ungambila, mu Grant's Pass, Oregon, kukaadi cikondo kampana, nsongaakaji mukwabo wa cyena Katolike mupatuke mwaba awu bwa kumpiisha ne kumfunda mu cibejibeji. Úvwa kamona-kamba wa cibejibeji kampana, ne dibuki dya mfwanka mu cyanza. Ki yêyè ne: “Ndi njinga kuyiikilanganaku neebe.”

Mêmè ne: “Ciine cyûdì ujinga kwamba ncinyi?”

Yêyè kwamba ne: “Mvwa njinga kukwelaku nkonko pa ntendeleelu webe wêwè ewu.”

Ki mêmè ne: “Udi ujinga kukonka cinyi?”

Ki yêyè ne: “Nku bukookeshi kaayi kûdì wenza ebi?”

122 Mêmè ne: “Mu Dîna dya Yesu Kilisto, ku dibiikila dya kudi Nzambi.” Ki kutungunukaye, wakula ne dipeetu. Mêmè ne: “Indilabi kakese.”

Yêyè ne: “Bu ne bivwa bikengela mêmè kuswikakana ne musumbà wa binyonga wawa,” yêyè ne, “ncivwaku mene mwa kujinga bwa kwikala mwena Kilisto to.” Yêyè ne: “Ne padibo . . . Badi bamba ne bantu abu ki baakookesha buloba kumpala eku.” Yêyè ne: “Ndi ntekemena ne ncyakwikalaku mêmè to.”

Mêmè ne: “Kuditacishi to. Kwakwikalaku to.” Mêmè ne: “Udi . . . bikengela kuditacisha bwa aci's.”

“Mona's,” mwakambaye, “bònsò badi benza maalu a lukutukutu beela mbila baba!”

Mêmè ne: “Kadi peebe's udi ulaka mukana wamba mùdì mwena Katolike?”

Yêyè ne: “S'ki cîndi.”

123 Mêmè ne: “Utu mumanyeku ne byakakengela bwa virgo Mariya apete Nyuma Mwîmpè ne aakule mu myakulu, ne aje maja mu Nyuma, mushindu umweumwe wakenzabo awu, kumpala kwa Nzambi kumwakidilaye anyi? S'nutu numubiikila mudiye maamù wa Mvidi Mukulu.”

Yêyè ne: “Aci's ndukutukutu.”

Mêmè ne: “Anji indila kakese. Mêmè . . .”

“Ncyêna ne bwalu bwa kutangila mu Bible to.”

124 Mêmè ne: “Kadi mmunyi muwamanya cidì Bulelela anyi cidì kaciyi Bulelela?”

Yêyè ne: “Mêmè ndi ngangata dîyì dya ekeleeziya wanyi.”

125 Mêmè ne: “Eci ki Dîyì dya Nzambi. Ki Dyôdì edi apa mene. Ndi nkwela kadyombo bwa kuDitangila. Ne Mariya uvwa naabo kwaka mu nzubu wa kuulu, ne wakapeta dibatiiza dya Nyuma Mwîmpè anu mwakapeta bakwabo abu. Cibi nudi numubiikila

mudiye maamù wa Mvidi Mukulu.” Mêmè ne: “Pashiishe kubiikila aci ne: ‘Musùmjà wa bisote, mâyi a manyaanu?’” Mêmè ne: “Kuditacishi to. Kwakwikala Kwaka to. Kabyena bikengela bwa wêwè kutamba kuditacisha bwa aci to, piikalabi ne ki cyònsò cyùdi uditacishila. Mbipiciibwe ne wêwè muditacishe bwa musuuka webe wa mpekaatu awu, nsongaakaji wa yaaya.” Ki mêmè kumulekela kuyaye.

<sup>126</sup> Mpindyewu elanganaayaaku meeji bwa byònsò ebi, bipwekele ebi. Nzambi udi ubivwija bipwekele menemene.

Mmunyi muvwa Aakaba, mmunyi muvwa Izabela, mmunyi muvwa bantu bònsò bavwa beela meeji ne Eliya uvwa muloji abu, bafwanyine kwela meeji ne mmwena lubuku? Nansha Aakaba’s wakamba ne: “Mufidi wa cimvundu cyònsò eci mu Izaleela’s nyêyè ewu.”

Yêyè ne: “Wêwè’s ngudi mufile bimvundu mu Izaleela.”

<sup>127</sup> Mmunyi muvwa ditunga adi difwanyine kwela meeji, ne, kubenga mukenji wa muntu wa kwisù kubwikakane bu yêyè awu, kayi muvwale bilàmbà bya bwakwidi, ne bikwabo, ne nkufwanyine kwikala dipiila dya ditunga adi?

Mmunyi muvwa Ejipitu mufwanyine kucimanya, mukookeshi wa buloba awu, baapâlò, ne kasumbu kende ne bantu bende baa kuneemekibwa abu. . . ? Kacya buloba kabutu bwanji kufikaku cyakabidi pa kaaba aku to, mu maalu a mamanya ne bikwabo. Mmunyi muvwabo bafwanyine kwela meeji ne, kubenga muprofeta mukulakaji wa bidimu makumi mwandamukulu awu, ne mwedi cipamba mulebelele, ne mvya ku mutu, upatuka wenda utwa mikuma, wâkanyeema awu? Kadi kupatuka kwaka ne mukenji ne: “Anyi neubalekele baye, anyi Nzambi neabutule ditunga.” Pâlò uvwa mufwanyine kwela meeji awu munyi? “Neuntumikile mêmè, Pâlò.”

<sup>128</sup> Pâlò kwambaye ne: “Kutumikila?” Kaa, yêyè, Pâlò! “Ne muntu mukulakaji, mwine awu muntu mukulakaji wa cimfiikaamunda,” muvwabo badyambidila, “kubenga muntu bu nanku, ne nkubutula ditunga?” Kadi’s cyakadibutula. Kaa, ekelekele!

Twãnjì twimanaayi, bapuwe ndambu wa tusunsa twènzè disambila, ne kwelangana kwa meeji. Tudi ne mwoyi mu dituku kaayi? Tukaadi penyi? Cikwabo cikondo cya cyena leelu, cya maalu a mamanya. Mbîmpè twètù kwelangana meeji. Pàmwãpa, wimana, bantu biimana ne basambila ndambu, ne beelanganaku meeji ndambu, udi mufwanyineku kudyumvwa bîmpè menemene paanyima paa wêwè mujikije kucyenza. Ncya bushuwa.

<sup>129</sup> Mwena Kilisto kî ncyamu cya mudimu, anyi nsapi wa cyamu wa mushindu kampanda wa kwikala kukanga ne kukangula nende bulongolodi bunene bwa ntendeleelu to. Ncya bushuwa. Mwena Kilisto kî ncyamu cya mudimu kampanda cidì cilama



diya kumpala dya ndongolwelu wa ntendeleelu to. Mwena Kilisto, awu kî mmwena Kilisto to. Mwena Kilisto nkwikala mufwanangane ne Kilisto. Ne mwena Kilisto kâna mwa kwikala mwena Kilisto padi Kilisto kayi mubwele mu muntu awu to, Mwoyi wa Kilisto munda mwende. Pa dîbà adi mpadi cyôci aci citwala Mwoyi wakaleeja Kilisto mu nsòmbelu awu, nenku wêwê mwikale wenza bintu byakenza Kilisto abi.

<sup>130</sup> Cîndî munkaci mwa kwamba ncinyi? Malanda a sungasunga a wêwê ne Kilisto. Ncinyi ciine aci? Nsòmbelu webe mmukumbanyine Evanjeeliyo anyi?

Mpindyewu ndi nteeta bwa kwadija mwaba wa kujaadikila bitudi twamba abi mwaba awu, bwa kunuleeja cyôci aci, balume ne bakaji bàvwà bakaji baa luumu, balume.

<sup>131</sup> Bible ngudi mwambe. Nukaavwaku bamone anyi? Diloolo dya dyalumingu dishaale, cintu kampanda cîmvwà mupwe mwoyi bwa kwelamu, Genese nshapita mwi6 ku mvensa mwi4. “Balume bààkadyàngacilà bakaji abu, bu bakaji baa nzubu, baakadi balume baa kale, baa luumu.” Balume baa luumu, baakadyanjilabo kwamba ne nebalwe cyakabidi. “Anu mwakadibi mu matuku a Noa, ki mwikalabi kabidi ku Dilwa dya Mwânà wa muntu.” “Balume baa luumu bangata bakaji,” kabayi bakaji baa nzubu to, “bakaji; balonda mubidi wa cyanaana.”

<sup>132</sup> Tangilaayi mu Angleterre, kukaadi mbingu ibidi. Tangilaayi mu États-Unis. Tangilaayi myaba yônsò, mmyûle tente ne bundumba. Bantu banene, banene, baa myânzû mitumbuke, bafwisha ditunga bundu, benda balondangana ne bakaji. Muntu munene awu mu Angleterre mwamwa, munene wa basalaayi wa mushindu kampanda, nanku awu, mona’s, ne nukaavwaku bamone, ùvwa ne mukaji mulenga kumona. Fôtô wende uvwa mwaba awu, bamuleeje pende. Tangilaayi ndumba wa beena Russie awu, kadi ùvwa muvwale mvwadilu anu wa usalulangana masandi, ulwa udikupa kuntwaku, bwa kuleeja patooke mubidi wende wa bukaji. Mulume awu kadi fwaku bwa cyôci aci’s we.

<sup>133</sup> Bàdî bàtùkèngelà leelu ewu mbânà baa balume baa Nzambi. Tudi dijinga ne balume mu bukalenge, biikale bânà baa Nzambi. Ncya bushuwa. Ki bwa cinyi, mfumu mwîmpè, wa difwana dya Nzambi, mmufwanyine kwimanyika lukutukutu lwônsò elu. Nunku bya dyela dya nseke byônsò ebi kî mbifwanyine kwikalaku to. Bu mwakenza Davidi, wakabiimanyika’s. Yêyê’s wakacyenza bushuwa, s’mbwalu ùvwa mfumu. Ne kuvwa anu. . .

<sup>134</sup> Mushindu mulelela, ngwa ne, Nzambi mwikale Mfumu, ne Nzambi udi utuma muprofeta. Samwele kaakabambilaku kumpala kwa kupetabo mfumu anyi? Wakamba ne: “Nzambi ki wenu Mfumu. Kacya nkaadiku munwâmbile bwalu kampanda mu Dînà dya Mukalenge kabuyi bwenzeke anyi?”

Bòbò kwamba ne: “To. Bwa aci kaayi ncya bushuwa.”

“Kacya nkaadiku mulwe ne kanza koolola kunudi bwa kunulomba cyakudya anyi?”

“To. Kacya kutu mulweku ne kanza koolola kutudi bwa kutulomba cyakudya to.”

“Kacya ncutuku munwãmbile cintu kampana cidi kacyi cilelela to, kumpala kwa Mukalenge.” Yêyê ne: “Nzambi ki wenu Mfumu.”

<sup>135</sup> “Kaa, tudi bamanye aci. Ne tudi bamanye ne wêwê udi muntu mwîmpè, Samwele. Tudi twitabuuja ne Dìyì dya Mukalenge didi dilwa kûdi, kadi tudi tukeba mfumu, nansha bya munyi.” Nwamonu anyi? Ki cidibo bapeta ncyôci aci.

<sup>136</sup> Mpenta wakakeba bulongolodi, nansha bya munyi. Kubupetaye. Ncya bushuwa. Baakakeba bwa kwikala bafwanangane ne ekeleeziya mikwabo yônso eyi. S’ki munukaadi. Ndaayi kumpala, aci, anu aci nciidi cikengediibwa. Kadi Nzambi ki wetu Mfumu. Nzambi ki wetu Mfumu. Eyowa’s, mukalenge.

<sup>137</sup> Ncinyi aci? Mbwalu bantu, anu mwakenzabo mu matuku a Kilisto, anu mwakenzabo mu cikondo ne cikondo cyônso, badi bapeta anu kabingila. Badi ne twitabaayi yabo bôbô. Udi mufwanyine kwikala kuyi muswe kwamba ne: “Ndi—ndi musumbe ngombe, ne ndi muswe kuya kamona ne udi—udi wenza mudimu anyi kêna wenza, anyi udi ufila mabeele, anyi—anyì ne ngwa dimiinu kaayi.” Udi mufwanyine kwikala kuyi ne kabingila kaa nanku to.

Kadi mushindu wa kabingila kadi bantu mwa kufila ngwôwò ewu: “Mémè ndi Presbytérien. Katutu twètù twitabuuja Aci to. Mémè ndi Baptiste. Katutu twitabuuja cintakanyi bu Aci kî to. Ee, mémè ndi Luthérien.” Ee, aci kacyena ne dipetangana ne Cyôci aci to. Aci nciswe kwamba ne udi mwena Kilisto to. Aci nciswe kwamba ne udi wa ku musumbà wa bantu kampana badi badyênzè bulongolodi. Nenku udi wa mu diswa dya ba-Luthériens, diswa dya ba-Baptistes, diswa dya beena Mpenta. Kakutu cintu paaci ne ng’Ekeleeziya wa beena Mpenta to. Kakutu cintu paaci ne ng’Ekeleeziya wa ba-Baptistes to. Ndiswa dya ba-Baptistes, diswa dya beena Mpenta, diswa dya ba-Presbytériens.

Kadi kudi Ekeleeziya anu umwepele. Ne kudi mushindu anu umwepele wûdi mwa kubwelaMu, nku Dilediibwa. Udi mulediibwè mu Ekeleeziya wa Yesu Kilisto, mwikale cidimba cya Mubidi Wende, wa mu baaminyampala baa mu nyuma baa ku Dyulu. Pa dîbà adi bimanyinu, bya ne Kilisto udi neebe abi, bidi ne mwoyi ku wêwê.

<sup>138</sup> Nwênù beena Kilisto, kaa, bikengela nwikale ne malanda a sungasunga ne Nzambi. Bwa wêwê kwikala mwânà wa Nzambi, udi ne cya kulwa mu bulongo ne Nzambi. Yêyê udi ne cya kwikala Tatwêbè, bwa wêwê kwikala mwan’Ende wa balume.

Nenku anu bânà Bende baa balume ne baa bakaji ki badi basungidiibwe, kî mbidimba bya ekeleeziya to, kadi bânà baa balume ne baa bakaji. Kudi cintu anu cimwepele cyapatula ciine aci, n'Dilediibwa dipyadiya. Dilediibwa dipyadiya ki cintu cimwepele cyapatula bulongo ne Nzambi. Ncya bushuwa anyi? [Disangisha didi dyamba ne: “Amen.”—Muf.] Bânà baa balume ne baa bakaji. Pashiishe padi cyôci eci cyenzeka, ki padi balume. . .

<sup>139</sup> Lukonko lûndi njinga kunwela ndwôlò elu. Muntu awu udi wamba ne: “Citudi twenza pashiishe ncinyi paanyima paa twêtù bamane kulediibwa cyakabidi?” Bààbûngi batu bangeela lukonko alu. “Ncinyi cidi cikengela mêmè kwenza pa dîbà adi, Mwaneetu Branham?” Wêwè mulediibwe cyakabidi, ngiikadilu webe yônsò nkòong mmushintuluke. Udi mufwe ku bintu byúvwà welelela meeji kale wawa abi.

<sup>140</sup> “Ee,” mùdi wamba, “Mwaneetu Branham, pângààkashààlà mwena ekeleeziya, cyôci aci ncîngààkapetà.”

Ee, nenku, pa dîbà adi, Nzambi mmwambe ne: “Yesu Kilisto udi umwèumwè awu makeelela, leelu, too ne kashidi. Yèyè ucidi anu wondopa babeedi. Ûcidi anu uleeja bikeena-kumona.”

“Kadi, Mwaneetu Branham, ekeleeziya wanyi’s!” Mpindyewu, kwêna mulediibwe cyakabidi to. Wamonu anyi? Kamwena mushindu to; bwalu, Nzambi mwine awu, piikala Mwoyi Wende munda mwebe, bu mudi. . . mùdi mu. . . mwoyi wa tatwèbè amu, nenku, piikala Mwoyi mwine wa Nzambi awu mwikale munda mwebe, Nyuma mwine uvwa munda mwa Kilisto awu, munda mwebe, mmunyi mudi Nyuma awu mwa kwikalaye ne mwoyi munda mwa Yesu Kilisto ne kufunda *Eci*, kadi pashiishe kwalukila munda mwebe wêwè kadi kuvila Aci? Wamonu anyi? Kêna mwa kucyenza to. Yèyè’s neitabe ne Dîyi dyônsò didi nanku.

<sup>141</sup> Pashiishe, wêwè wamba ne: “Ee, ndi cidimba cîmpè cya ekeleeziya,” aci kacyenaku ne dipetangana ne Cyôci aci to.

Mêmè ndi mumanye mumpangaanu. Mu Afrike mwamwa, munkaci mwa bânà beetu baa bafiike mwamwa, ntu nsangana maalû mîmpè a nsòmbelu a bantu abu miikale matumbuke kupita—kupita a beena Amerike makumi citeema pa lukama. Mona’s, mu bimwe bya ku bifuku kuntwaku, nsongaakaji yèyè kayi anu musediibwe too ne pakaadiye ne bidimu kampanda, anyi mufike bule kampanda muntu kayi mumusele to, badi bamanya ne kudi katanyi. Badi bamwipata. Udi uumusha budinta bwa cifuku aci, uya mu cimenga, pa dîbà adi udi ushaala muntu udi mupidyè cifuku cyabo. Kadi padiye usediibwa, bavwa bamuteeta bwa kumona buuvirgo bwende. Piikala lutândatanda lukese lwa buuvirgo alu lutubuke, pa dîbà adi bidi bikengela bwa kwambaye ne mmuntu kaayi mwine awu udi mumumanyishe maalû. Nenku badi babashipa bônsò babidi,

cyapamwe. Kî nkufwanyineku kwenzeka dishipa dya bantu bûngi cyanaana mu Amerike bu ciine aci mwa kwenzeka anyi? [Disangisha didi dyamba ne: “Amen.”—Muf.] Nwamonu anyi? Kadi nujuuka peenu nubabiikila mudibo bampangaanu? Kaa, ekelekele! Bôbô’s badi mwa kulwa kulongesha bantu, bàdi bàdyamba ne mbidimba bya ekeleeziya aba, mushindu wa kwikala ne nsòmbelu mukezuke. S’ncyà bushuwa.

<sup>142</sup> Kacya ncitu mwanji kupetaku bwalu bwa masaama a màsàsà mu lwendu lwanyi lwònsò lwa mu Afrike wa ku Sud mujima to. Kabatu ne cintu cya mushindu awu to. S’ki bwalu mbwòbù abu. Nwamonu anyi? Bidi anu biibidilu byetu twètù bya bukooya ne manyaanu, bya mutudi batooke ebi. S’ncyà bushuwa. Baye kule ne Nzambi.

<sup>143</sup> Padi bwalu ebu bwenzeka, cintu ciwenza pa dîbà adi, neujandule ne Nyuma udi ulwa munda mwebe awu, ku Dilediibwa dipyadiya, newitabuuje ne newènzè cyònsò cidi Nzambi wamba mu Dìyì Dyende ne ncyà wèwè kwenza aci. Ne cyònsò cidi Bible uteela bwa wèwè kwenza aci, neucitwe “amen.” Ne kwakwimanaku to, muunya ne bufuku, anu too ne pawacipeta. Ncyà bushuwa. Ncyà bushuwa. Ne mu ciine cikondo cyònsò eci, bulelela, kumutu kwa byònsò, neukwame mamuma a Nyuma.

<sup>144</sup> Wèwè udi wamba ne: “Nèngààkulè mu myakulu anyi?” Udi mufwanyine kwenza cyòci aci, kabidi udi mufwanyine kubenga kucyenza. “Nèngèlè mbila anyi?” Udi mufwanyine kwenza cyòci aci. Udi mufwanyine kubenga kucyenza.

Kadi kudi cintu cilelela cimwepele ciwenza. Neukwame mamuma a Nyuma. Ne mamuma a Nyuma adi dinanga, disanka, ditalala, diitabuuja, mwoyi mule, bupole, kalolo, lutuulu. Cilunji cyebe kacyakwikala ne, “Wuuh!” to. Wavuluka anu ne, paudi ne aci, cidi cyumusha Nyuma Mwîmpè munda mwebe ku mulungù awu. Wamonu anyi? Paudi ufika mu mushindu wa muswe kwikala kukokangana ne bònsò baudi wenda naabo, kudi cintu cipampalamuke. Paudi ufika mu mushindu wa . . . mwambi ubala mu Bible, ne mbibi bwa kwenza cintu kampanda, ne, newikale. . . Wavuluka anu ne, kakwena bwena Kilisto mwaba awu to nansha bwa kânà. Aci mpindyewu, cidi ne: “Ku mamuma abo nkunwabamanyina.” Ki cyakamba Yesu ncyòci aci. Nwamonu anyi?

<sup>145</sup> Piikalaci ne n’Dìyì, ne Nzambi ngudi mwambe nanku, Nyuma udi munda mwebe awu neakumbanangane ne Dìyì adi, musangu wònsò. Bwalu, Nyuma Mwîmpè mushuwashuwale neakumbanangane ne Dìyì, bwalu Dìyì kî Mwoyi ne Nyuma. Yesu wakamba ne: “Mèyì Aanyi adi Mwoyi.” Nenku pawikala ne Mwoyi wa Cyendelele, ne Yèyè mwikale Dìyì, mmunyi mudi Dìyì mwa kuvila Dìyì? Nwamonu anyi? Neuvwije Nzambi muntu wa mushindu kaayi? Kî cintu cimwepele cya kumanya ncyaci,

cya ne udi mwena Kilisto, pawikala mwa kwitabangana ne Dîyi dya Nzambi dyônsò.

146 Nenku udi udisangana wêwè mwine mu dinanga ne beena lukuna beebe. Muntu wamba ne: “Ee, yêyè’s kèna cingà cintu to anu munsantu mubunguluki wa mu malaba ewu.” Nenku ubanga kushaala. . . Kaa! Wadimuka. Uh-hum. Wadimuka. Kadi paudi bulelela usangana ne, wêwè mwine, udi mumunange! Nansha yêyè mwenze cinyi, wêwè anu kacya wâmunanga. Wamonu anyi?

147 Pa dîbà adi ubanga kusangana ne, lutuulu lwebe lushaala *mona* bule, mu mushindu wa kaluciyi ne ndekeelu to. Muntu yônsò naka mutungunuke anu ne kukwamba maalu ne: “Ee, ncyêna cyukaku cyûdi wêwè wamba to!” Kusalukuku to. Wêwè mubange kusaluka, mbîmpè wânji ukasambile dyambedi, kumpala kwa wêwè kwakulangana nende cyakabidi. Eyowa. Eyowa.

Kubwediku mu makokyanganyi to. Kusu bwa kwikala kubwela mu makokyanganyi to; paudi muswe kumona muntu ujuuka mu ekeleeziya, wamba ne: “Nudi bamanye mudi bwalu anyi? Ny’a nnwambila’s, *Kampanda* mmwenze *cikansanga*.”

Amba ne: “Mpindyewu, mwaneetu, bundu bwebe.”

148 Wêwè mwambe ne: “Akàà, ki mudibi nanku anyi?” Utèya maci ku cilendwishi aci? Watapa ntaala wadimuka.

Nyuma Mwîmpè kî nciinà cya bucyafu nansha. Nwamonu anyi? To, to. To, to. Mwoyi ukaadi basòmbèlemù kudi Nyuma Mwîmpè, mmûle tente ne cijila, ne bukezuke. “Kawena wela meeji mabi to, kawena wenza cintu cibi to; udi witabuuja maalu ônsò; udi unanukila, ne mwoyi mule.” Wamonu anyi?

149 Kwikadi ukokangana to. Padi famiye ubwela mu makokyanganyi, kukokyanganyi naabo to. Pamba mamwèbè ne: “Ncikupeci cyakabidi ne, udi muye kuntu kwaka, ku ekeleeziya wa kalé wawa nansha. Ee, wêwè, cyônsò cyûkaadi welela meeji mpindyewu, cikaadi anu kulekela nsuki yebe yileepa. Wâlu mufwanangane ne ciikaaku kampanda cya cikulakaji.” Kwikadi wakokangana nende.

Amba ne: “Eyowa, maamu. Bidi anu bîmpè. Mêmè ndi mukunange, anu bu kwônsò eku. Nenku nêngîkalè anu nkusambidila pâncîdi ne mwoyi apa.” Wamonu anyi?

150 Mpindyewu, kukokyanganyi to. Wamonu anyi? Cilunji cibi citu cilela anu cilunji cibi. Katanci aka, udi ubungamija Nyuma Mwîmpè bwa akushiye aye, newikale ukaadi peebe anu ukokangana. Pa dîbà adi Nyuma Mwîmpè udi wasa masala n’Yêyè uyaaya wawa. Cilunji cibi citu cilela anu cilunji cibi.

Kadi dinanga ditu dilela dinanga. Ikala mûle tente ne dinanga. Yesu wakamba ne: “Ku cyôci eci nkwananyina bantu bônsò ne nudi bayiidi Baanyi, panwikala ne dinanga, muntu

bwa mukwende.” Ki dimuma dya Nyuma Mwîmpè ndyôdi adi, dinanga.

<sup>151</sup> Kabidi utu mumanyeku ne, udi mufuki wa kânâkânâ, wêwè mwine awu anyi? Utu mumanyeku aci anyi? S'ncyâ bushuwa. Ukaadi mumonemone bantu baudi anu munange bwa biikale mu nyungulukilu webe. Kwêna mumanye ne mbwa cinyi to. Anu muntu wa dinanga dya mushindu awu awu. Nukaadiku bamone aci anyi? [Disangisha didi dyamba ne: “Amen.”—Muf.] Mwikale anu ne musangeelu, mwaba awu, munange kwikala pamwe nende. Aci cidî . . . Yêyê awu udi ujuula cyuyÿyâ aci, ku nsòmbelu udiye nende, ku mushindu udiye uyiikila, ku yende miyiiki.

Pashiishe, ukaadi mumone bàdi, misangu yònsò, udi—udi ubeepuka. Dîbâ dyònsò, bôbò mbaswe kwakula anu pa cintu kampanda cya cibi, ne kwakula bwa muntu kampanda. Bamba ne: “Kaa, ekelekele! Nyawu ukaadi ulwa’s. Neabange kujaana muntu kampanda mwaba awu. Nyewu wabwedi muneemu mpindyewu, neakule bwa muntu *kampanda*. Cyende pende cyònsò ciikalaye ne cya kwamba cidî anu kwenza kwa mineku ya bundu, anyi cikampanda cya citangila bakaji, anyi cintu kampanda cya mushindu awu.” Udi umvwa anu bikwenza bibi bwa kwikala pamwe nende. Wamonu anyi? Badi bacijuula. Pa kubatangila, bantu bîmpè baa dikema’s, kadi biikale bajuula cyuyÿyâ aci.

Kadi bintu byûdi wêwè welela meeji abi, bintu byûdi wêwè wenza, byenzedi, bintu byûdi wamba, bidi bijuula cyuyÿyâ kampanda.

<sup>152</sup> Ngâkabwela mu birô bya muntu kampanda, muneemu mu cimenga emu. Muntu awu mmulubuludî, anyi mulami, eyo, mu ekeleeziya kampanda wa mwîmpè. Mvwa mubwelemu bwa kumonangana ne muntu awu bwa bwalu kampanda. Ki cisanji aci mwaba awu, cimba mijiki ya bidùndadùnda anyi ya maja a dijekeje dya nyima, cyònsò civwaku aci, dîyî dinangula ne penyî. Ne ndi ngeela meeji ne muvwa fôtô makumi anaayi milamika ku bimanu mu birô byende amu, ya bakaji butaka. Mpindyewu, kwêna mwa kungambila mùdî mulami, anyi nî ncinyi cikwabo to. Undeeje wêwè anu byûtù ubandila, ne byûtù ubala, ne mushindu wa mijiki yûtù uteeleja, musumbâ wa bantu wûtù muswikakane naawu, nenku mêmè nênkwabîlè ne nnyuma kaayi udi munda mwebe. Nwamonu anyi? Eyo.

<sup>153</sup> Umvwa muntu wamba ne: “Mêmè ngenza *cikampanda*? Musumbâ awu. . .” Vulukaayi anu ne, ncyêna mêmè ncyuka bidiye wamba abi to. Mêyî ende adi akula ne dîyî dikole kupita. Byenzedi byende bidi byakula ne dîyî dikole kupita byònsò bidi nî ncinyi cyònsò cifwanyine kwamba. Mmufwanyine kufila majaadiki, kwamba mudiye mwena Kilisto, cya bushuwa, ne

pàmwāpa kwenza nî ncinyi nî ncinyi. Kadi tangilaayi anu mushindu wa nsömbelu udiye nende. Aci ncidi cyamba cidiye.

<sup>154</sup> Mpindyewu, udiku mwa kudifwanyikijila ne, muntu ne nsömbelu wa nanku mmufwanyine kwamba ne: “Kwitabuuja dyondopa dya kudi Nzambi, aci’s ncintu kampanda bwa nyuunyi. Aci civwaku kale kukaadi bidimu. Cintu bu nanku kacyenaku leelu ewu” anyi? Awu nnsömbelu mukumbanyine Evanjeeliyo, wa ne: “Kilisto wakatapiibwa mputa bwa kushipa kwetu kwa mikenji, ne ku mibundabunda Yende tudi bondopiibwe” anyi? Wêwè udi wamba ne: “Kadi mêmè’s ndi mulami.” Kî mbwalu to. S’udi mufwanyine mene kwikala mwepiskopo.

<sup>155</sup> Pângààkumvwà Mwepiskopo Sheen wamba, kukaadi bidimu bibidi, paakapwekaye; ncyakakangulaku kabidi cisanji bwa kumuteeleja to. Paakambaye ne: “Muntu udi mufwanyine kwitabuuja ne kwikala ne nsömbelu wa Bible awu, uvwa mufwanangane ne muntu udi uteeta kwenda upicila mu mâyi a bitoci.” S’m’Mwepiskopo Sheen, kadi kukudimuka, kwamba ne: “Pângààya mêmè mu Dyulu, nudi bamanye mwikala bwalu anyi? Mêmè pângàätwilanganà anu ne Yesu mwine awu, nèmMwambilè ne: ‘Ki mêmè Mwepiskopo Sheen ewu,’ ne Yêyè neâmbè ne: ‘Kaa, eyowa’s, mvwa anu ngumvwa maamù Wanyi ukuteela.’” Bumpangaanu’s, bantu badi bafwanyine kupenda Dîyi adi. Nzambi afweku luse. Mêmè ncyèna nzuji to. Nwamonu anyi?

Dîyi adi didi Bulelela. Cya bushuwa. Ne Nyuma wa Nzambi neajingulule Mufundu Wende Yêyè mwine. Yêyè udi ujaadikiibwa ku Mufundu Wende. Ûdi—ûdi—ûdi wakula uMwamba Yêyè. Ne wêwè udi ujaadikiibwa pa kuWitabuuja, ne Wôwò ngudi ukupa mikanda yebe ya dijaadikiibwa.

<sup>156</sup> Kukokyanganyi ne bakwabo to. Ne kanwi—kanwikadi ne makokyanganyi a mu famiye aa to, mûngâmbì amu. Dinanga ditu dilela dinanga. Ne cilunji cibi citu cilela anu cilunji cibi.

<sup>157</sup> Mpindyewu, mpindyewu tutangilebi. Tangila Yesu, bwa katanci kakese cyanaana. Yêyè nguvwa cileejilu cyebe. Ndi ntekemena ne kanwena babange kutamba kucyoka to. Tangilaayi. Tutangilaayi Yesu, bwa katanci kakese cyanaana. Yêyè nguvwa cileejilu cyetu. Yêyè nguvwa mwambe aci. “Bwalu Ngânùpì cileejilu, bwa nwenzele bakwabo mûngânwenzèdì Mêmè emu.”

<sup>158</sup> Mpindyewu tangilaayi. PaakalwaYe pa buloba, pavwaku bupidya bupitepite, bwâbûngì pa buloba mwine musangu awu kupita muvwabu kacya, kacyakamupangishaku nansha mwa kukolesha kuya kumpala to. Wakaya anu wenda uyiisha byenze bu ne kakuvwa bwalu, ne wondopangana anu bu ne kakuvwa bwalu. KacyakaMutacishaku to. Kuvwa badyudi. Muntu awu wakadyudiibwa kubangila anu uci Mwânà wa mu diboko too

ne paakalwaYe kufwa ku nkuruse. CyakaMwimanyikaku anyi? To, mukalenge. Kiipacila Kende kavwa cinyi? “Kwenza misangu yônsò anu cidì Taatu mufunde. Kwenza misangu yônsò anu civwa ciMusankisha.”

<sup>159</sup> Tangilaayi Yesu. Twamba peetu mutùtù tudipwekesha? Paakashaala Nzambi Yèyè mwine Mwânà wa mu diboko, pamutu paa kuvwila mu—mu kalaalu kakese mu mwaba kampanda mu nzubu wa ufilaku kaneemu, wakalediibwa mwamwa pa mushiki wa tûmvi twa ngombe mu cikumbi, munkaci mwa twânà twa ngombe twikale tudila. Ki bôbò kuMujingila mu mikusu, yivwabo bakutulule ku cikokedi cya pa nshingu paa ngombe. Mupele mutambe ne badi batambe kwikala bapele, kadi, paabi, Mufuki wa maulu ne buloba.

<sup>160</sup> Diloolo dikwabo, dya mashika ne mvula, bôbò kwamba ne: “Mulongeshi, netuye Neebe Kwebe kumbelu.”

<sup>161</sup> Yèyè ne: “Mikenge yituku ne meenà, ne nyuunyi yituku ne maswa, kadi Mêmè ncyèna nansha ne kaaba kaa Mêmè kuteeka mutu to.”

Nzambi, Yehowah, kuDipwekesha e kushaala Muntu; muleejibwe mu mubidi wa mpekaatu, bwa kutupikula wèwè ne mêmè. Tudi banganyi pa dîbà adi? Yèyè uvwa cileejilu cyetu. Ndi nganyi mêmè? Cintu cyanaana.

<sup>162</sup> Mvwa ngambila muntu kampanda, mu mapingaja emu, mu kaadisangisha kakwabo kakese. Mêmè ne: “Mwânà wa balume yônsò udi mulela kudi Nzambi bikengela ateciibwe, dyambedi, anyookiibwe.” Ndi mvuluka pângàâkapetà dyanyi, anyi dyanyi dîbà dya bwalu bukole. Padi—padi muntu ulediibwa cyakabidi, kudi kaaba kakese, kenze bunene bu bwa luzadi lwa ku munu wende alu, kadi Nzambi wela munda mwende, ndongolwelu, nenku kadi kaponu mu mwoyi wende ne keelamu lwongo. Pashiishe Sataana umufikisha ku dikajaadika. Kadi kôkò aku kakayimu to, kwebe nkujike.

<sup>163</sup> Ndi mvuluka mu lupitaadi mwamwa, mvwa ne bidimu bu makumi abidi ne bibidi, makumi abidi ne bisatu, pâmwâpa, bu nanku awu, mvwa nsongaalume. Ne taatu wanyi, ûpunga ne lufu mu maboko aanyi, kadi paanyi ngaakula ne Nzambi bu mwondopi. Ne taatu wanyi mundedi ne disaamà dya mwoyi mwimane, muteeke mutu mu diboko dyanyi, ne mêmè mwikale mmusambidila; ne mmumona ukudimuna mèsù awu untangila, uponesha mutu cyanyima, bwa kuya kasangila ne Nzambi. Mêmè kumwangata e kuya kamujiika ku luseke lwa mwakunyaanyi wa balume, bilôngò bya bwalu bicikàle anu bibishi pa lukita lwende, kadi paanyi mwikale nyiishangana Nzambi udi wondopa babeedi. Ngenza mudimu mu Kumpanyi wa Midimu ya Mbulamatadi, bamfuta meeya makumi abidi ku dîbà dimwe, ne mukajaanyi wenza mudimu ku cyapu cya ditela dya miteelu eku; bwa kudyambulwishaku bwa



kumona mwa kudiisha kânà keetu kaa balume kaa ngondo dikumi ne mwandamukulu, Billy Paul, ne kânà kaa ngondo mwandamukulu kavwaye mwambule pambidi.

Ngámònu Mwaneetu wa bakaji Wilson ushikula mutu. Yèyè mmuvuluke bwalu abu; Roy Slaughter ne bakwabo baa bikondo bya kale abi.

<sup>164</sup> Mwva ngenza cinyi? Ngendakana mu mìsèèsù, ne dyâmpà dyela minyiinyi munda adi mu cyanza, ntuuluka ku dikunji, ngenda mfilà majaadiki kudi muntu ne muntu uvwa upicila mwaba awu, bwa dinanga dya Yesu Kilsto. Nya ku bilongolwedi byabo bya mashinyi mbalomba ne mwva mwa kukwailaku mudimu, ngaakula ne balongolodi baa mashinyi. Mbwelamu, ngamba ne: “Balumyana, nwènù aba nukaadiku basungidiibwe anyi? Mémè ndi mupete cintu kampanda munda mwa mwoyi wanyi.” Nya mbwela mu bisumbishidi bya bisekiseki mu mèbà a bufuku. Ngaalukila kumbelu pa dîbà ibidi anyi isatu wa bufuku, mfuma ku dikumbula dya babeedi bufuku bujima. Nciyiku mwa . . . Anu kusòmba, kushintulula bilàmbà ne kuvwala bya mudimu. Ne kusòmba mwaba awu mu nkwasu bwa kwikishaku too ne pavwabu bucya, kukatamuka kadi kuya. Ne wa bwalu munyaane bikole, bifumine ku dijila dya byakudya ne masambila, mu mushindu wa ne bikengela kusambila bwa mémè kuvwala bikanu bya ku bisabaata, bwa kubanda ku dikunji. Nyiisha, nyiisha mùvwà Nzambi mwikale munene, mùvwà Nzambi ne luse, mùvwà Nzambi mwikale dinanga, kudi bantu.

Kadi, mwaba ewu, taatù wanyi munkaci mwa kupùnga ne lufu mu maboko aanyi. Ne mwakunyaanyi wa balume mufwe, mushipa pâmvwà mémè mwimane mu cyambilu muneemu emu, mu kaekleeziya kakese kaa beena Mpenta baa bafiike aka, mwikale nyiisha. Balwa bangambila ne: “Mwaneenu wa balume baamushipi mu cibeeba mwamwa. Mashinyi mmamutuute kadi kumushipa.” Mashi a mwanaabo sungasunga amutunkumukila ku muteelu, paakayaye kamwambula mu cibeeba amu. Ndi mwenze anu mmujiika, taatù pende umbu ufwa. Pashiishe, ki mukajaanyi udi moolaadika pààpa naka wawa.

<sup>165</sup> Ki mémè kuya, kuvwila apa ku tabernacle eku. Anu mwaba ewu mene, mwaba udi cyambilu eci cisanganyiibwa ewu, mémè kwambila bantu, ngondo isambombo kumpala kwa bwalu abu kwenzekabu ne: “Nekulwe dipaasalala dya màyi. Ne ndi mumone Mwanjelo wangata dilenge, upima wamba ne: ‘Mètres asambombo ne bya dikumi mwandamutekete kumutu kwa mùsèèsù wa Spring Street.’”

Sandy Davis ne bakwabo bavwa basòmbe mwaba ewu, kusekabo, bamba ne: “S’bivwa anu centimètres bu makumi abidi anyi makumi abidi ne itaanu nanku awu mu cidimu cya 1884, mwànà wetu. Cidi cyakula neebe ncinganyi?”

166 Mémè kwamba ne: “Ki cùkalàku. Bwalu, ngàmònu umwe wa ku mishindu ya dibwela dya mu nyuma adi, ne Cyòci ncidi cingambile nanku. Nenku ki cùkalàku.” Nenku kudi cimanyinu mu Spring Street, leelu ewu, pa bule bwa mètres asambombo ne bya dikumi mwandamutekete pavwa màyi mafika. Mémè kwamba ne: “Mvwa ngenda mpicila mu bwàtù kuulu kwa tabernacle ewu.” Ne ngàkapìcilakù.

167 Mu ciine cikondo aci, mukajaanyi kusaamaye. Mémè kumusambidila. Nenku mémè kulwa ku tabernacle, ne bantu biikale bamwindile. Mémè kwamba ne: “Ûdi munkaci mwa kupùnga ne lufu.”

“Kaa, cidi anu mukajeebe, aci.”

168 Mémè ne: “Udi munkaci mwa kupùnga ne lufu.”

Mémè kuyaku e kusambila kusambila kusambila. Ki mémè kwolola byanza. Kunkwataye ku cyanza. Kwambaye ne: “Billy, nèntwilanganè neebe mu dinda, mwimanyine lwà Kwaka.” Yèye ne: “Wakungwija bânà bwa nwatwilangana naanyi ku Ciibi.”

169 Mémè kwamba ne: “Ubange anu kwela mbila ne: ‘Bill.’ NèngikalèKu.” Nwamonu anyi? Ki kupatukaye. Mémè kuya kamuteeka mu nzubu wa bitalu kwinshi kwaka.

Mémè kwalukila kumbelu, bwa kudyololaku. Nenku mémè mumane kuya... Billy Paul mwânà uvwa mushaale ne Mandamu Broy ne bakwabo, usaama bikole. Ngangabuka uvwa mutekemene ne neafwe nansha pa dibà kaayi. Paanyi mwikale nsambidila Billy. Kadi ki Mwaneetu Frank ulwàlwa ewu bwa kungangata. Yèye ne: “Mwaneebe wa mu diboko ukaadi ùpùnga ne lufu, kânà keebe kaa bakaji aku.”

170 Mémè kupatuka mu lupitaadi. Ngangabuka Adair kayi mwa kungiitabilaku bwa mémè kubwelamu to, wamba ne: “Ûdi ùsaama nshingu wa kabaala. Neumutampakajile Billy Paul.” Kwambilaye munganga mukaji bwa kumpaye kaacintu kakwabo kakunze kaa mushindu kampanda kaa kwangata, kaa bwanga bwa mushindu kampanda bwa dilaadikangana citànàtànà, kaacintu kampanda bwa kuntuuyishaku naaku cilunji. Ki mémè kubalomba bwa kupatukabo mu cibambalu amu, mémè kukiimanshila pa dididiishi. Mémè kupatukila ku ciibi cya kumfundu, e kupweka mu nzubu wa mwinshi mwa buloba.

Ki mwanaanyi wa mu diboko awu udi mulaadika pààpa wawa, kumpala kwa lupitaadi, mu cibambalu cya pa bule cya lupitaadi, ne njiji mu mèsù mwònsò emu mushindu awu. Mémè kwangata musheketele wa kale, kuyiipata, ne kumuteekawu pambidi. Mémè kutwa binù, kwamba ne: “Nzambi, ki tawányi ne mwakunyaanyi wa balume badi balaale muntu mwamwa baba, kwaka naka, ne bilòngò bicikàle pa nkita yabo. Ki Hope udi mulaale pààpa wawa, mulaale kwaka naka. Nenku

ki mwanaanyi wa mu diboko nyêyè ewu, ùpunga ne lufu. Kumwangaci kwòkò to, Mukalenge.”

171 Yêyè kadi kumba kupwekesha ne cilàmbà cikudika, byenze bu udi wamba ne: “Bwikila mukana. Ncyèna muswe kukuteeleja to, nansha kakese.” Kayi musweku nansha bwa kungaakwisha to.

172 Pa díbà adi, piikalabi ne Yêyè kavwa muswe kungaakwisha to, ki díbà dilela Sataana ndyòdì adi. Yêyè ne: “Kadi paanyi’s mvwa ndyambidila ne wêwè ewu uvwa wamba ne Yêyè utu Nzambi mwîmpè. Byònsò byúvwà welela mbila ebi mbinganyi? Peebe mucíkàle anu nsongaalume. Anji kenzakana umone, mu cimenga cijima. Nsongaakaji yònsò ne nsongaalume yònsò yúvwà muswikakane naayi yikaadi yela meeji ne wêwè wajimiji lungenyi. S’walujimiji.” Mpindyewu, kavwaku mwa kungambila ne Nzambi kàtukù to, bwalu mêmè nkaavwa mumane kuCimone. Kadi kungambilaye ne Yêyè kavwa uncyuka to.

173 Nsòmba bufuku bujima, mundaamuunya mujima. Mêmè kucyambila Nzambi ne: “Cìndì mêmè ewu mwenze ncinyi? Anji kundeejaaku, Mukalenge. Kwitabi bwa ewu udi kayi ne cidiyè mwenze akenge pa mwaba wanyi mêmè to, piikalabi ne mêmè ngudi mwenze bubì.” Ncivwa mumanye ne Yêyè uvwa munkaci mwa kunteeta to. Kadi mwànà wa balume yònsò udi ulwa kudi Nzambi bikengela ateciibwe. Mêmè kwamba ne: “Ungambile anu cìndì mwenze. Nèncilongòlòlè. Cìndì mwenze ncinyi pa kuumusha diyiisha mundaamuunya mujima, bufuku bujima, ne kuMupa anu kwa mwoyi wanyi, ku musangu ne ku musangu? Cìndì mwenze ewu ncinyi?”

Sataana kwambaye ne: “S’ncya bushuwa. Wamonu’s, mpindyewu, pakaadibi ne ngwêwè, peebe mumane kwambila bònsò abu múdì witabuuja ne Yêyè mmwondopi munene, kadi’s ki mwaneebe wa mu diboko awu mulaadika apu, ùpunga ne lufu. Wa bwalu Yêyè ubenga ne kuteeleja. Mukajeebe mufwe disaamà dya cyàdì dya bisulusulu. Peebe uvwa anu wamba ne Yêyè uvwa mwa kwondopa tunsere, kadi’s ki Yêyè awu. Tente suu, wamba peebe mudiYe mwîmpè, ne mudiYe mwîmpè kudi bantu. Kadi kùdì wêwè?”

174 Ki mêmè kubanga kumuteeleja’s. Ki dilukakaja dya lungenyi ndyòdì adi. Ndyambidila ne: “S’ncya bushuwa’s.”

Yêyè ne: “Yêyè’s udi mwa kwamba . . . kabyena bikengela bwa wêwè kwamba Dìyì to, *kutangila* anu mwaneebe awu cyanaana, yêyè’s mmufwanyine kwikala ne mwoyi.”

Mêmè ne: “Aci ncyà bushuwa.”

“Ne búngì bwònsò bwa byúdi wêwè ewu muMwenzele ebi, nansha nanku aci ki cidiyè ukwenzela’s.”

175 Mêmè ne: “Ncyà bushuwa’s.” Mêmè kubanga kwela meeji ne: “Ee, cinyi?” Nwamonu anyi? Byònsò kubanga kushaala

binguumuka, paakafikabi ku dilukakaja dya ngenyi. Kadi, mbyenze anu bikafika ku Aci anyi, Aci kukulama's. Kushaalaci mwaba awu. Nkaavwa anu pabwîpi ne kwamba ne: "Nanku ndi mbilekela."

Kadi paakafikabi panshi mu mushindu wa makole ônsò a dilukakaja dya ngenyi manguumuke, ki kufikabi ku Mwoyi wa Cyendelele awu, Dilediibwa dipyadipya adi. Ambaayibi tũng bu ne kaWuwwamu? Ambaayi tũng bu ne kaWuwwamu? Nunku katuvwaku bafwanine kwikala bamanyangane mutudi bamanyangane mpindyewu emu to. Nunku ekeleeziya ewu kavwa mufwanyine kwikala mwaba ewu mushindu ewu to, binunu ne miliyô bidi mu nyungulukilu mujima wa buloba ebi. Kadi, Nzambi twasakidila, Wôwô awu uvwamu.

<sup>176</sup> Kadi ndi mwenze anu ndyambidila ne: "Cinyi? Mêmè ewu ndi nganyi's, twamb'eku twamb'eku? Ndi nganyi, bwa kwela bunene Bwende mpatà? Ndi nganyi, bwa kwela Mufuki wâkampà wanyi mwoyi mwine pa buloba apa mpatà? Mwine mwânà awu mvwa mumupetele penyi? Uvwa mumumpeshe mwine awu uvwa nganyi? Kêna nnanshà wanyi to, twamb'eku twamb'eku. Yêyè nguvwa anu mumunsombèshe cyanaana, bwa cikondo cikese."

Mêmè kwamba ne: "Sataana, nguumukila apa." Mêmè kuya, kutenteka cyanza pambidi pa mwânà. Mêmè kwamba ne: "Nzambi akubeneshe, munanga wanyi. Mu kasunsa kamwe emu, papa neakwambule apweke neebe, akuteeke mu maboko a maman. Banjelo nebangate kaamusuuka keebe kakese aku baye naaku. Ne mêmè nêntwilanganè neenu mu dinda adi."

Mêmè ne: "Mukalenge, Wêwè nguvwa mumupeeshe. Wêwè nyewu ukaadi umwangata bwa kuya nende. Nansha bu Wêwè mwa kunshipa mêmè, bu mwakamba Yobo, nansha nanku, mêmè ndi anu muKunange ne muKwitabuuje. Wêwè muntume mu iferno, nênkunangè, nansha nanku. Ncyêna mwa kutapulukaku ne cyôci aci nansha." Ki bwalu mbwôbô abu's.

Bu biikale anu bya meeji a mu mutu, nunku byônsò mbinguumuke. Kadi bikengela wikale ne malanda a sungansunga. Bidi bikengela wikale mulediibwe cyakabidi.

<sup>177</sup> Ki cidi cyenza ne bambi biikale baseesuka, majitu manene ne bikwabo. Bamba ne: "Cintu paaci ne ndyondopa dya kudi Nzambi kacitukù to. Bintu bya mushindu awu kabituku to." Kabatu banji kufika mu bulaba bunsantu amu to, bu mûmwà ngamba mu dinda emu amu. Kî mbamanye cintu pa bidi biCitangila to. Mmunyi mudibo mwa kwamba mudibo bâna baa Nzambi, kadi kuvila Diyì dya Nzambi? Mmunyi mùdì mwa kucyenza, uvila Nyuma Mwîmpè mwine utu mukusumbe?

<sup>178</sup> Kaa, uvuluke anu ne, Yesu wakaDipwekesha, too ne ku lufu, bwebe wêwè. Yêyè kavwa ne makokyanganyi to. PaakaMutwilabo mate mwîsu, Kaakatwilangana pende mate

to. PaakaMutuulabo myedi, Yèyè kaakabatuula yabo ayi to. PaakaMutapabo dipi ku ditama, ne ku dikwabo, Yèyè kaakabatapaku paabo dipi to. Wakabasambidila, kutungunuka ne kuya, mu didipwekesha dyònsò. Yèyè uvwa cileejilu cya didipwekesha.

179 Yèyè uvwa mùle tente ne diitabuuja. Bwa cinyi? Ùvwa mumanye ne Méyì Ende kaàvwa mwa kupangila to. Ùvwa Yèyè menemene ne nsömbelu wa Díyì mu mushindu wa ne Wakashaala Díyì.

Éyì Nzambi wa yaaya! Ndekelaku ngiikale mwolole byanza byanyi byònsò bibidi kudi Nzambi, kumpala kwa bateeleji aba. Ngiikaleku ne nsömbelu wa nanku. Díyì edi divwijiiibwe mu mushindu wa ne, mèmè ne Díyì edi twikale cintu cimwe: mèyì aanyi ikale Díyì edi; dyelangana dyanyi dya meeji mu mwoyi wanyi; Yèyè ikale mu mwoyi wanyi, mu meeji aanyi; swika mikenji Yende ku dikunji dya meeji aanyi; uyiswike ku dikunji dya mwoyi wanyi; ngiikale mMumona anu Yèyè; paajuka diteeciibwa, mmone Kilisto; paanyanguka maalu, mMumone anu Yèyè; pàngüikalà mudilongolole, kadi mwena lukuna ukeba bwa kumfikisha ku difiika dya munda, mmone Yesu, cidiYe mufwanyine kwenza ncinyi?

180 Yèyè uvwa mutambe kwikala mu Díyì, mu mushindu wa ne Yèyè ne Díyì byakashaala cintu cimwe. Tangilaayi.

181 Kabivwa bikengela bwa kukokanganaYe to. Yèyè uvwa mumanye ne Yèyè ne Díyì bivwa cintu cimwe. Ùvwa mumanye ne Yèyè uvwa Díyì dya Nzambi dimweneshiibwe, ne ndekeelu wa byònsò díyì dituma dya Nzambi nedikwate buloba ku bukookeshi bwadi. Ùvwa mumanye aci, Díyì Dyende. Ùvwa ne diitabuuja. Ùvwa mumanye mwaba uvwaYe. Kabivwa bikengela kwelanganaYe mpatà to, wamba ne: “Mona, nudi mwa kulwa *apa*.”

182 Dyabulu kwambaye ne: “Mpindyewu, tangila, Wèwè’s udi mwa kwenza bishima. Udi mumanye ne Udi ne diitabuuja dinene. Udi mwa kwenza bishima. Mèmè nènKwibàkilè nzubu, mupite wa Oral Roberts misangu ibidi ku bunene. Bwalu, bantu bònsò... Ci—cintu cimwepele cidi cikengela Wèwè kwenza, s’nkubaleeja. Tùpikà ku nzubu ewu, udyèlè anu panshi cyanaana, bwalu udi umona’s, baakafunda ne: ‘Banjelo nebaKwambule, bwa nansha dîbà kaayi kulu kutuuta dikàsà ku dibwe to.’” Nwamonu anyi?

Yèyè’s uvwa mumanye ne Ùvwa ne bukole. Ùvwa mumanye ne Ùvwa mwa kucyenza. Ùvwa mumanye ne civwa munda Mwende, kadi Kavwa muswe kukwata naaci mudimu to anu pavwa Nzambi mwa kuMwambila bwa kucyenza. Nwamonu anyi? Mmuswe ne ciikale Nzambi munda Mwende, ciikale Díyì mu byònsò. Ne Yèyè uvwa mumanye ne, pavwaYe wamba cintu

kampanda, civwa n’Dìyì dya Nzambi; ne nansha bu maulu ne buloba mwa kujimina, Dìyì adi nedikookeshe dīngà dituku.

<sup>183</sup> Yèyè kavwa ne makokyanganyi ne dibinduluka to. Ûvwa wamba anu Mèyì a Nzambi. Dìyì dyònsò dyàkapàtukà ku Yende mishiku divwa Dìyì dilaaba dya Nzambi.

Kî mbifwanyineku kwikala bilenga bya menemene bu twètu mwa kwamba ne: “Dìyì dyanyi ne Dìyì dya Nzambi bidi cintu cimwe. Cīndì mēmè ngamba, Yèyè udi ucitwa mushinga, bwalu ncyèna ngenza cintu to padiYe kayi mucingambile dyambedi”? Kaa, s’ki cileejilu cyebe ncyòci aci. Ski nsòmbelu mukumbanyine Evanjeeliyo nyèyè awu.

<sup>184</sup> Kî mbaakwidi bavwa balonge tulaasa bikole bashaale baa kapelu abu to, ne biikale ne ngiikadilu yònsò ya kuneemekiibwa ayi, biimana benza masambila maleemale, kadi banyangakaja nzubu ya bakaji bakamba, ne biikale bazukila nkwasu mitumbuke mu—mu disangisha, bintu byònsò ebi muntwamu. Bavwa . . . Awu kavwa nsòmbelu mukumbanyine Evanjeeliyo to.

Kadi Yèyè uvwa mukumbanyine Evanjeeliyo, bikole menemene, mu mushindu wa ne Nzambi wakamba ne: “Ewu m’Mwan’Aanyi munanga, mu Yèyè mmūndi nsankila bīmpè. Muteelejaayi Yèyè. Dìyì Dyanyi n’Yèyè. Yèyè ki Dìyì Dyanyi. Yèyè ne Mēmè tudi cintu cimwe.”

<sup>185</sup> Manyaayi, tangilaayi eci mpindyewu. Yèyè uvwa mumanye ne ndekeelu wa byònsò Dìyì Dyende nedikwate buloba ku bukookeshi bwadi. Ûvwa mumanye kuvwa Dìyì Dyende difume. Ûvwa mumanye ne Dyòdi kadivwaku mwa kupangila to, ki bwa cinyi Wakamba ne: “Maulu ne buloba byònsò bibidi nebijimine, kadi Dìyì Dyanyi kadyakupangilaku to.” Nwamonu anyi? Ûvwa mwa kwamba nanku. Awu uvwa Muntu Ûvwa Yèyè ne Dìyì dya Nzambi bishaale cintu cimwe. Wakabambila . . .

“Bivwa bikengela Wènzè *cikampanda* ne *cikansanga*.”

<sup>186</sup> Yèyè kwamba ne: “Nganyi udi mwa kumpiisha Mēmè bwa mpekaatu? Udi mwa kumfunda Mēmè nganyi?” *Mpekaatu* utu “bupidya.” “Piikalabi ne Mēmè, ku munu wa Nzambi, Ndi ngiipata badémons, bânà beenu balela badi bayiipata ku nganyi?” Nwamonu anyi? Kacivwa aci to, nanku bivwa bikengela kwikalaci cintu kampanda cikwabo. Nwamonu anyi? “Piikalabi ne Mēmè . . .”

Bòbò ne: “Ee, twètu’s tukaadi biipate badémons.”

<sup>187</sup> Yèyè kwamba ne: “Piikalabi ne Mēmè ndi ncyenza ku munu wa Nzambi, Dìyì dya Nzambi dishindikiibwe, mwaba awu bânà beenu balela badi bayiipata ku nganyi? Nenku nwènù nwikale balumbulwishi’s.”

<sup>188</sup> Bantu baa mu matuku Ende awu, bantu abu mbavwa baMuseka, baMwamba Yèyè. Kadi, Yèyè, baakaMupwekesha milongo, mu mushindu wònsò uvwabo bafwanyine kwenza awu.

BaMwamba maalu mabi a mishindu yònsò, bwa kuMulwisha, kadi Yèyè anu mutungunuke.

Mpindyewu ndi muswe kujikija mu katanci kakese emu, mwikale ngamba bwalu ebu.

<sup>189</sup> Bantu baa matuku aa mmusùmbà wa bantu banyunguluke mitu. Bantu baa dituku edi mmusùmbà wa bantu banyunguluke mitu. Badi ne bwôwà bwa kwangata milayi ya Nzambi. Bantu beena ekeleeziya, bulongolodi bwa ekeleeziya, malongolodi a ekeleeziya adi ne bwôwà bwa kwangata kadyombo kaa Mufundu wa Nzambi bwa dituku edi. Mbamanye. Mbamanye ne ngiikadilu yabo ya cyena leelu ne evanjeeliyo wabo wa nsömbelu mulenga udibo bayiisha awu kabyakupetangana ne kadyombo kaa dîbà edi to, anu muvwabi ne Shimishoona kavwa mwa kupetangana naaku mu wende ngiikadilu to. Bivwa bikengela Nzambi.

Nenku ndongamu udi mucilaye nyèyè ewu. Nèmfikè ku cyôci aci mu katanci kakese emu.

<sup>190</sup> Ndi muswe kushaala mulame dîyi adi, katanci kakese. Nansha mudibo badibiikila ne mbeena Kilisto amu, badi biitaba twitabaayi, twitabaayi mikwatakaja kudi bantu, bwa kwangatayi kaaba kaa Dîyi dya Nzambi. Pa nanku, badi mwa kwangata twitabaayi awu, bwalu bantu mbadi bamukwatakaje. Kadi badi ne bwôwà bwa kuteekela diitabuuja dyabo mu Nzambi udibo balaka mukana mudibo baMunange awu. Neya bushuwa. Ki pashiishe nwènù kwamba ne nsömbelu awu mmukumbanyine Evanjeeliyo? Kabyena mwa kwenzekaku to, nansha mudibo bidimba bya ekeleeziya amu. Kadi aci kî ncikumbanyine Evanjeeliyo to. To, nansha kakese.

<sup>191</sup> Evanjeeliyo! Yesu wakamba ne: “Ndaayi pa buloba bujima nukayiishe Evanjeeliyo kudi cifukiibwa cyònsò. Bimanyinu ebi nebifile beena kwitabuuja.”

Kadi paudi uvila ne aci kacyena cilonda beena kwitabuuja, mmunyi mùdi mwa kwikala ne nsömbelu. . . Nansha nanku, udi mufwanyine kwikala kuyiku mwambe dîyi dibi to, udi mufwanyine kulama mikenji yònsò dikumi, aci kacyakwikala ne dipetangana nansha dimwe ne cyôci aci to. Kacyena anu cikumbanyine Evanjeeliyo to. Nwamonu anyi? Kî ncifwanyineku kwikala cikumbanyine to.

Baakwidi abu's bavwa balame cyôci aci, kadi kabavwa anu bakumbanyine to. Yèyè wakamba ne: “Nwènù nudi baa tatwènù, dyabulu.” Nganyi uvwaku mufwanyine kutwa munu pa umwe wa ku biine bantu abu? Katoba kamwe kaa dipiila, muntu uvwa washiibwa mabwe kakuyi luse to. Bantu baa cijila! Kadi Yesu wakamba ne: “Nwènù nudi baa tatwènù, dyabulu,” dîbà dyakabwela Evanjeeliyo.

<sup>192</sup> Nansha bôbò badibiikile ne mbeena Kilisto, mbanange kwikala bakwate ku twitabaayi, twitabaayi yabo bôbò. Kaa! Twitabaayi yidi yibweja ne yikumbaja ngeelelu wa meeji wa

bantu baa cyena leelu baa dituku edi. Kadi muntu wíkala mwa kutuuta dyakalenga mu dituku edi, bikengela alonde mmwenenu wa ngeelelu wa meeji wa cyena leelu ewu. Lekelaayi ngămbè bwalu abu mu mushindu mwîmpè ne mutooke. Nwamonu anyi? Muntu, pawíkala muswe kutuuta dyakalenga, bikengela ulonde ngeelelu wa meeji wa cyena leelu wa dituku edi. Cidi. . . Badi baya eku ne eku, bamba ne: “Kaa, kî ngwa musangeelu anyi? Kî mmulenga wa dikema anyi? Yêyè udi mwa kushaala anu mwaba awu kacya wasulama, kayi mwa kutulamaku tusunsa tupite pa dikumi ne tutaanu to. Ne wetu mpaasata katu utukumaku bisûsù bya mēyì mashile bwa miine maalu aa to.”

Bundu bwa mwine mpaasata awu. Muntu nansha bamwamba ne nganyi wadidinga kwimana mu cyambilu mutangile mpekaatu wa dituku edi, kadi kayi umwelela mbila to, kudi cintu kampanda cipampalamuke mu muntu awu. Kî mmukumbanyine Evanjeeliyo udiye ulaka mukana ne udi uyiisha awu to. Ncya bushuwa. Pa nanku, mu kwenza kwa nanku, badi badifidila tubingila, pa kwamba ne: “Mpindyewu, tangilaayi, nwênù disangisha dyanyi!”

<sup>193</sup> Mu—muntu mukwabo mmulwe apa, anu abidi adi panshi aa, wa mu ekeleeziya kampanda wa munene, mwikale ufunda mukanda wa cibungu. Ki yêyè ne: “Ndi mfunda pa dyondopa dya kudi Nzambi.” Yêyè ne: “Mwaneetu Branham, tudi bakunange, mu dingumba dyetu.” Dimwe dya ku mangumba a matambe bunene, dimwe dya ku adi matambe bunene a mu ditunga edi, anyi a pa buloba. Ki yêyè ne: “Tudi bakunange, mu dingumba edi.” Úvwa mwaba ewu mene ku Jefferson Villa eku. Kadi, yêyè ne: “Ndi mulwe bwa kujandula pa bidi bitangila diine dyondopa dya kudi Nzambi edi.” Yêyè ne: “Mu bushuwa bwa bwalu kudi cilema anu cimwepele cidi wanyi ekeleeziya mupete.” Nwamonu anyi? Yêyè ne: “Wêwè udi muswikakane ne beena Mpenta bapitepite bûngì.”

Mêmè ne: “Ee, mpindyewu, udi mumanye’s, bwa aci’s ncya bushuwa.” Mêmè ne: “Aci ncilelela. Udi mumanye’s, mêmè ntu nkaadi anu mukebekebe mpunga wa kubeeputa’s.” Mêmè ne: “Nênkwambilè cidi bwalu. Nêndwe mu cimenga cyenu nwênù amu, nwambile ekeleeziya wenu bwa antuudile mfranga.”

“Akàà,” ki yêyè awu, “kî mbafwanyine kwitaba to.”

Mêmè kwamba ne: “S’ki címvwà ndyambidila aci. Ki címvwà ndyambidila ncýòcì aci.”

<sup>194</sup> Yêyè kwamba ne: “Udi umona’s, dyanyi dingumba kadyakutwala aci to.” Aci’s cidi anu kabingila menemene, bu kaa ne: “Ndi mfuma ku disela mukaji,” anyi “ku disumba ngombe ya cikokedi.” Bwanyi mêmè nansha wêwè ne mapolome a bu-docteur bûngì munyi, nansha bakwangata ne mushinga wa bishi, kudi dingumba dyebe. Mudimu wa bwambi wa mushindu awu



kí mmukumbanyine Evanjeeliyo udi mufundiibwe mu Mukanda ewu awu to. Bushuwa's.

<sup>195</sup> Cidimba cya ekeleeziya cyasungula bwa kwikala ku luseke lwa cintu bu nanku awu, kadi kudibiikila mwena Kilisto! Ne kupatuka apa kadi kwikala ne nsòmbelu... Ne bakaji babebula nsuki, ne bavwala bilàmbà bidi Bible wamba bwa kabavwadi abi. Balume benza maalu a lukutukutu mudibo benza mpindyewu emu, "cimwenekelu cya difwana dya Nzambi," banwa maala ne banwa bifwanka, ne basela bakaji misangu yàbùngì kadi biikale bashaala balami mu ekeleeziya ne mene bampaasata, ne bikwabo. Ne bantu biine badi biitaba bintu bya mushindu awu abu, nsòmbelu wa mushindu awu kí mmukumbanyine Evanjeeliyo nansha.

<sup>196</sup> Mukaji wa wendakana, kadi kutwa cyanza pa telefone ne kubanga kabwabwa, kadi kubanga makokyanganyi mu ekeleeziya, ne bintu bya mushindu awu, awu kí nnsòmbelu mukumbanyine Evanjeeliyo utwikala mwa kwimanyina to. Muntu nansha bamwamba ne nganyi wadidinga kukosolola ekeleeziya, ne kubanga makokyanganyi a biiji pankaci paa bantu, ne bintu bya mushindu awu, kí mmukumbanyine Evanjeeliyo utudi tuyiisha to. Menemene's. "Ncimwenekelu cya difwana dya Nzambi, biikale bavila bukole bwadi," bwine bukole bwa Nzambi bùdi bùnùlamà ku bya nanku awu abu.

<sup>197</sup> Monaayi, mpindyewu, bôbò kabeena babyenza to. Kabaakuswa bwa kubyenzaku to. Badi ne kabingila, kaa ne, ekeleeziya wabo bôbò katu witabuuja Aci to. Badi . . .

Ee, kadi, Yesu's mmufwanyine kwambila—kwambila muntu, diloolo edi, kwakula ne mwoyi wende wamba ne: "Ndi muswe uye, ukayiishe Evanjeeliyo mu kaabujima."

"Wanyi ekeleeziya katu utwala Aci to, Mukalenge. Wamfwilaku luse, bu Wêwè mwa kuswa. Mêmè ndi ne bujitu bwîmpè be bungoomekela. Ndi—ndi—ndi, Udi mumanye's, ndi mpaasata, wa umwe wa ku ekeleeziya ya mitambe bunene ya mu cimenga eci, Mukalenge. Kaa, twètù's tutu tutumbisha Dîná Dyebe mwômò amu! Eyowa's, Mukalenge. S'ncitutu twenza bulelela. Ncyêna mwa kucyenza to." Kabingila kamwekamwe aku, cintu anu cyôci cimwecimwe aci. Pa nanku kabeena balwa ku difesto dya nyuma dya mulayi Wende to, Diyì dishindika.

<sup>198</sup> Yesu kaakambaku ne: "Mwaba udi citalu awu, ki wadisangishila mikanku" anyi? "Mikanku," kí ntubangu nyuunyi to, mpindyewu. Mikanku! Mwaba udi bishààdilà awu, ne—ne—munyiinyi mubole, dîbà adi kaayi tubangu nyuunyi tudi tudisanga. Kadi mwaba udi Munyiinyi mubishi, mukezuke, ki wadisanga mikanku. Nwamonu anyi? Cya bushuwa. Mwaba udi Diyì, Cyakudya cya mikanku, ki wadisangayi.

<sup>199</sup> Pa nanku kabeena balwa ku difesto dya nyuma kudibo bababiikile to. Nudi nwitabuuja ne Nzambi mmupe Amerike

dibiikila, bidimu dikumi ne bitaanu bishaale ebi, ku ditabuluja dinene, ku difesto dya nyuma anyi? [Disangisha didi dyamba ne: “Amen.”—Muf.] Mbalwe anyi? To, mukalenge. To, mukalenge. Nenku, kubenga bwa kulwa, awu nnsòmbelu mukumbanyine Evanjeeliyo, nansha mudibo bôbô biine bamubiikla nanku awu anyi?

<sup>200</sup> Pavwa muntu kampanda mulwe kûndi, abidi adi panshi aa, kusòmbayè ku meesa, wamba ne: “Mwaneetu Branham, ndi muswe bwa kwelaku cyanza dyamwamwa dya meesa adi,” muntu munene’s, “ndi muswe nkukwateku ku cyanza. Ndi mukunange.” Mwva mu ekeleeziya kampanda mumuteeleje pavwaye uyiisha. Yèyè ne: “Ndi mukunange. Ndi ngiitabuuja ne udi musadidi wa Nzambi.”

Mémè ne: “Twasakidila’s, docteur. Ndi mukunange, mémè paanyi.”

Yèyè ne: “Ndi muswe nkwambile bûngi bwa dinanga dîndi mukunange naadi, bu mwaneetu.” Ki yèyè ne: “Udi umona kaamukalenge-mukaji kaanyi kadi kasòmbè mwab’ewu aka, mukajaanyi ewu? Udi mumuvulukeku anyi?”

Mémè ne: “Ndi mumuvuluke.”

Yèyè ne: “Ngangabuka uvwa mumupe mbingu ibidi ne ki yivwaye mwa kwikala ne mwoyi, bwa kansere kaa mapondo-mapondo. Kadi wèwè kulwa mu cimenga e kumusambidila. Utàngila muulu, wèwè kumona cikeena-kumona. Ukûdimuka nunku wèwè kungambila ne: ‘EMU MMUDI MUKALENGE WAMBA, yèyè neondopiibwe.’” Dikeji dinene mu mwongo wende, pabuyike mushindu *ewu*, cyenze bu mudi cintu cinene menemene. . . bu citupa cya dibeele dya mukaji bacikokele lwà munda, mu mwongo wende amu, anu pa dyèbà dya mwongo wende menemene apu. Kapacyena dikeji nansha dimwe dya cyôci aci to, leelu ewu. Yèyè ne: “Ki mukalenge-mukaji wanyi udi musòmbè wawa, mwikale ne mwoyi leelu ewu.” Yèyè ne: “Mmunyi mûndi mwa kwenza cîngà cintu piikalaci kaciya dikunanga, bwa disambila dya diitabuuja diwakasambila adi? Mmunyi mûndi mwa kubenga kwitabuuja mùdi mu—musadidi wa Mukalenge, pawakammona, ne kungambila anu menemene civwa mwa kwenzeka?” Yèyè ne: “Mpindyewu nyewu ndiku ne kaacintu kampanda bwebe wèwè, Mwaneetu Branham.” Yèyè ne: “Ntu mwena nsangilu udi mutambe bunene wa beena Mpenta udiku awu.”

Mémè ne: “Eyowa’s, mukalenge. Ndi mumanye aci.”

Yèyè ne: “Ndi muyiikilangane ne bânà beetu, abidi adi panshi aa, ki kungambilabo bwa mémè kumonangana neebe, bwa nkwambile ne ncintu cya bundu paudi mwangate mudimu wa bwambi mufila kudi Nzambi awu muye naawu kudi musumbà wa binyonga ne baa mu nyungulukilu amu mushindu awu.”

Mêmè ne: “Bushuwa anyi?”

Yèyè ne: “Eyo.” Yèyè ne: “Nzambi mmutume mudimu wa bwambi awu bwa kulenga myaba ya bukole, myaba minene, myaba mitumbuke.”

<sup>201</sup> Mêmè kumona dyabulu wakula pa dîbà adi mene. Mêmè kudiyambidila ne: “Eyo. ‘Tupika kuulu kwa mukuna eku ùdyèlè panshi, nenku uleeje, udi mumanye’s, kuulu kwa nzubu eku.’” Nwamonu anyi? Nwamonu anyi?

Mêmè kudiyambidila ne: “Mmufikisheku anu kule ndambu.” Maamù wanyi mukulakaji awu uvwa ne ciibidilu cya kwamba ne: “Peesha ngombe mwonji bule bukumbane, neàkadyòwè anu yèyè mwine.”

Mêmè kwamba ne: “Aci ncyà bushuwa anyi?”

“Eyowa’s.” Yèyè ne: “S’mbundu, ku byùdì wenza abi?” Yèyè ne: “Cyùdì ncinyi? Leelu ewu nyawu udi mwa kusumba cyebe cyakudya anu ne lutatu.” Ki yèyè ne: “Anji tangila umone Oral Roberts ne bakwabo, mbeelemu anu cidya, kadi bapatukemu ne cya pa lukama cimwe cya mudimu wa bwambi wùdì wêwè naawu ewu. Tangila umone mukaadibo.”

Mêmè ne: “Eyo. Aci ncyà bushuwa.” Nwamonu anyi?

Ki yèyè ne: “Cisumbu cyanyi mêmè necikwangate. Twêtù netukubweje munkaci mwetu, bu—bu umwe wa ku bânà beetu. Bônso nebakwele mwoyi ku cyanza wa buunyaana, nenku netufucile ndeke, ne netukupe difutu dyebe dya ndola nkama itaanu ku lumingu, anyi mipite apu pawikala muswe nanku. Nenku netukutume mu cimenga cinene cyônso cya ditunga.” Eci cyakenzekela anu mu Phoenix, Arizona, mêmè dyamunu yèyè dyamwamwa dya meesa. Ki yèyè ne: “Nenku netukufute ntanyi yebe...” Yèyè ne: “Pa dîbà adi tubiikila baa pa buloba bujima, baa ku baabèndè, tubiikila banene baa kuneemekiiibwa, bantu baa bujitu, baa myânzù mitumbuke...” Yèyè ne: “Wêwè utu wakula misangu yônso anu bwa badi kabayi dikuta. Twêtù tudi ne beena tente—mu—nzubu tente—pambelu.” Yèyè ne: “Netubapeteshe mushindu wa kumonabo cyanza cya Mukalenge. Pa dîbà adi mêmè nèmbitàbilè bwa kuyabo ne mukajaanyi, ne bakwabo, badi mwa kujaadika ne bintu byùdì wamba bidi byenzeka.”

<sup>202</sup> Mêmè ne: “Eyowa’s, mukalenge. Abi’s mbifwanyine kwikala binene.”

Mpindyewu, monaayi ne, mwine muntu awu, mwikale ne mapolome a D.L., L.L.D., mufundi wa mikanda, nwamonu’s, docteur mu difunda dya mikanda ya kubala, mufundi wa kalandaamusenga, muntu wa maalu mimpè. Nwamonu anyi? Kavwa mumanye Mifundu to.

Nukaavwaku bamanye ne Mwanjelo wâkenza byenzi bya mushindu awu awu kaakayaku mu Sodoma anyi? Wakashaala ne kasumbu kaa bakiikiidibwe bwa kupatuka, Abraham.

Yèyè kavwa anu mucimanye to. Mémè kumulekela anu cyanaana, musòmbè anu mwaba awu kakese. Mvwa mémè njinga anu kumona civwa buteyi. Mémè ne: “Ee, cidi cifwanyine kukengela bwa mémè kwenza ncinyi?”

Yèyè ne: “Ee, Mwaneetu Branham, cintu cimwepele cyanaana cidibo bambe...Tudi bayukilangane pa cyôci aci, tuntu ndambu, tuntu tukese menemene tûdi ulongesha, bwa wamona anu mwa kututeekaku ku luseke cyanaana.”

Mémè ne: “Cileejilu, bu cinganyi, mwaneetu?”

“Kaa,” mwakambaye, “dibatiiza dyebe adi, udi mumanye’s. Udi mumanye’s, utu ubatiiza anu bu unitaire, cintu bu nanku awu.” Yèyè ne: “Tuntu tukese twa mushindu awu atu’s.”

Mémè ne: “Kaa?” Mémè kutungunuka.

Ki yèyè ne: “Cileeeji cya mbangilu aci; ne bayiishi bakaji; ne tuntu tukese ndambu cyanaana twa mushindu awu.”

<sup>203</sup> Mémè ne: “Uh-huh?” Mémè ne: “Udi mumanye’s, mbipapule bwa kumona musadidi wa Nzambi ulomba musadidi mukwabo wa Nzambi, paanyima paa mumane kumpa bunémè muwênji emu, umbiikila mûndi muprofeta, ne mumanye ne Dîyi dya Mukalenge, anyi dibuulula dya Dîyi, ditu dilwa kudi muprofeta. Kadi dya ukuvumuka, Docteur Pope, (kacyena cileeja meeji ebe mimpè to), ne uswa kwamba ne ulomba, wèwè bu musadidi wa Nzambi, ulomba musadidi mukwabo wa Nzambi bwa kudya cibanga pa cintu cidi...?.?.cidi bwende yèyè ne mushinga kutamba ne mwoyi mwine.” Mémè ne: “To, mukalenge, Mwaneetu Pope. Ni mbya kumona lufu ncyèna mufwanyineku kucyenza to. To, mukalenge.”

Ncinyi ciine aci? Kudi lutete lwa Mwoyi wa Cyendelele; kwikala ne mwoyi anyi kufwa, nansha wèwè mwikale muntu munene anyi kuyi muntu munene to.

<sup>204</sup> Mémè kupicila, dituku dikwabo...Kî mbwa kudyombola bantu babidi aba to. Mémè kutangila kuntwaku, nenku kuvwa cimfwanyi cinene kwaka ku Tulsa, Oklahoma; mwaba mupyamupya wa Oral Roberts ucivwabo baasa, seminere bwa kwikala kulongeshilamu bambi. Neikale mwa kuyiila mushinga wa (Ne mémè ndi mumanye Demos Shakarian, Mwaneetu Carl Williams, ne bakwabo badi mu kasumbu kaa balombodi kaa ciine aci abu.) miliyô ya ndola makumi ataana, ne nzubu wa uyiila miliyô isatu ya ndola; nsongaalume wa beena Mpenta ewu, abi’s mbintu byâbungî menemene bidi Nzambi mumwenzele.

<sup>205</sup> Ntu mémè ndyambidila ne: “Mémè ewu, kwikala ne seminere? Aci’s mémè ntu ncilwisha, twamb’eku twamb’eku.”

206 Nenku bavwa bafunde ne: “Cisòmbedi cicilwalwa cya seminere munene wa Oral Roberts.” Mémè kupweka ne njila, kuvwa cintu cinene cya bwena leelu. Pende’s Oral Roberts mwine awu, mu kantenta kakese kasunsuke, wakalwa mu disangisha dyanzi mu Kansas City, Kansas.

Bavwa bafunde ne: “Cisòmbedi cicilwalwa cya Tommy Osborn,” kaa, balumyana wa yaaya, nzubu wa ndola mitwe ku miliyò isatu anyi inaayi munkaci mwa kujuudiibwa mushindu awu.

Nenku mwaba awu, Tommy Osborn, umwe wa ku beena Kilisto badi batambe kwikala baa maalu mîmpè. Yèyè’s nmuntu wa bushuwa, muntu wa bushuwa mutuma kudi Nzambi. Úvwa mwimanyine dinsambu dya mùsèèsù dyadya; nsongaalume mukese, mubinduluke, mwânà mukese wa balume ne mwânà mukese wa bakaji mu kashinyi; kunyungulukaye lubilu, e kupatuka. Yèyè ne: “Mwaneetu Branham, mvwapu pângàakamònà mubuluke awu upatuka lubilu. Ki mémè kumona umufunkuna munu mumpala, wamba ne: ‘Mu Dìnà dya Yesu Kilisto, patuka munda mwende.’ Mémè kumumona udishinda ku makàsà ebe; paanyima paa yèyè mwambe ciprofeta cyende, ne: ‘Diloolo edi, nènkybyànkùlè panshi munkaci mwa bateeleji binunu bisambombo ne nkama itaanu aba.’” Ki yèyè ne: “Mémè kukumona kacya anu wîmana mwaba awu, kuyi ubandishaku nanshà díyi to, wèwè kwamba ne: ‘Mu Dìnà dya Mukalenge, bu muwèdi Nyuma wa Nzambi kadyombo, diloolo edi, neupone ku makàsà aanyi eku.’ Yèyè ne: ‘Kadi nènkyulejè ne nku makàsà a nganyi kùngààpònà.’”

207 Ki mémè kwamba ne: “Patuka munda mwende, Sataana.” Kuponaye cyànyimànyimà kadi kushaala mushimikile makàsà aanyi panshi.

Yèyè kwamba ne: “Nzambi udi anu Nzambi, Mwaneetu Branham. Kwajiki.” Yèyè ne: “Ndi muye kadikangila mu nzubu munda mwa matuku abidi anyi asatu.” Yèyè katu uduya cibanga to. Nealonde bwalu anu mùdìbu. Katu uumvwa bundu bwa bwalu abu to. Yèyè ne: “Udi welaku meeji ne mémè ewu ndi ne dipà dya dyondopa anyi?”

208 Mémè ne: “Pwa aci mwoyi, Tommy. Udi mutumiibwe mbwa kuyiisha Evanjeeliyo. Ndaaku, ukaMuyiishe. Ndaaku ne Mwaneetu Bosworth ewu kuntu kwaka.”

209 Mémè kutangila kwine aku, ki mémè kumona. Mvwa mémè mubadyanjidile bônso babidi mu buyiishi.

Mémè kudyambidila ne: “Ki Oral Roberts nyèyè wawa ne mashinyi a mikanda kî mmàngì kî mmàngì nkama yitaanu ya Kabamba, adi nansha cyanza cya muntu kaciyiku cilenga mikanda to; ndola miliyò inaayi mitùma mu mikanda, cidimu cishaale eci.” Miliyò inaayi’s; cya binaayi cimwe cya mfranga yivwa misangishiibwe, mu bwena Kilisto bwa buloba bujima.

Cya binaayi cimwe cya mfranga ya beena Kilisto bônsò nkòòng yilwa kudi muntu umwepele. Mwaba wa dikema's! Mémè mupatuke mwaba awu bwa kuya kuwumona.

<sup>210</sup> Nenku, mpindyewu, Oral mmwaneetu. Ekelekele! Ntu mumunange. Mmuntu anu wa cya bushuwa ewu, mulumyana wa cya bushuwa, ne mêmè ntu mumunange. Ne yêyè utu ungeelela meeji manene, ne mêmè, mmwelelawu paanyi. Bwalu budi anu ne katwenaku tupetangana pa—pa Mifundu to.

Ne, Tommy Osborn, kakwena udi mwîmpè kumutamba to. Mémè ntu anu mmwelela meeji manene. Yêyè utu umwe wa ku bantu batu batambe kwikala baa maalu mîmpè bânkaadîku paanyi mutwilangane naabo, Tommy Osborn awu.

“Kadi biine bantu baba,” mûngàkadyàmbidilà, pângààkabwelà mu bìrô byabo ne kumona bivwabo naabi, “ngeela meeji ne ndi mufwanyine kuumvwa bundu bwa bôbô kulwabo, ne kumonabo byanyi mêmè”: kashinyi kakese kaa mikanda, ne mutudi tudyenzeja bwa kutuma mikanda mifundilangana. Kadi eci's ncintu cya dikema! Pâmvwà musòmbè mundekeelu mwa ditempu dya mashinyi, mwine musangu awu. Mémè kudyambidila ne: “Ciine cyacya ncifwanyine kwikala cinyi?”

Pashiishe mêmè kupatuka. Mémè kudyambidila ne: “Ee, ‘Cisòmbedi cicilwalwa cya Oral Roberts.’ ‘Cisòmbedi cicilwalwa cya Tommy Osborn.’ Ewu kayi wakwisha mukwende to.”

Pa nanku, mêmè kupweka ne njila. Mémè kudyambidila ne: “Kadi mêmè?”

<sup>211</sup> Ki Cintu kampanda kwambaci ne: “Tangila muulu.”

<sup>212</sup> Mémè kudyambidila ne: “Eyowa's, Mukalenge, lekela ngiikale nteekela mabanji aanyi mu Dyulu, bwalu ki mudi wanyi mwoyi.” Mpindyewu, ncyèna ngamba aci bwa kudisamba to. Ndi ngamba cyôci aci anu bwalu ncyenzeke, ne Nzambi mmumanye ne ncyà bushuwa. Nwamonu anyi?

<sup>213</sup> Ebe mabanji adi penyi? Udi muswe kwikala kampanda wa munene anyi? Pawikala yêyè awu, udi muntu cyanaana. Wêwè fika anu mwaba wa kuyi muswe kwikala kampanda wa munene to. Muswe kwikala musadidi mukese mudipwekeshe wa Kilisto. Ki njila wa dipatukila nyêyè awu. Kwajiki.

<sup>214</sup> Mwaneetu Boze ne bakwabo badi munkaci mwa kjuula ekeleeziya mu Chicago. Kubakengelabi anu bwa kulekeela dingumba adi ekeleeziya wa Philadelphie awu. Mpindyewu bavwa baakula bamba bwa kupeta muntu kampanda mwikale ne nkooçi wa paanyima penze *nunku*, muntu mwikale ne dipolome dya DD. Mémè kwamba ne: “Ki nwênù baadyaci kabeji abu. Panwikala baswe kupeta mpaasata wa bushuwa bwa ekeleeziya awu, petaayi muntu mudipwekeshe wa kale udi bwa kubala dîna dyende biikale bikole, kadi mwoyi wende mwikale

ulakuka kanya bwa Nzambi. Angataayi anu muntu wa nanku awu. Ki udi unukengela bwa kupeta nyèyè awu, muntu udi kayi mumanye bintu byònsò ebi to, muntu wíkala kayi mwa kwenza cimbambila anyi kwenzejangana maalu ku bukole to, anyi wa ukanwela mu mabanza a mishindu yònsò, ne bikwabo byònsò, kadi mwikale anu unudiisha ne Diyì dya Nzambi. Muntu wa mushindu awu ki wa nwènù kwangata.”

Pa nanku, kabaakulwa ku difesto dya nyuma nansha. Bikengela njikije. Ngäpicishi ne pa dîbà diine mpindyewu. Mu tusunsa tutwe ku tusambombo, netutangalake, bu Mukalenge mwa kwanyisha.

215 Ndi ngumvwa bamwe bamba ne: “Kadi, Mwaneetu Branham, biwva bikengela wèwè kwalukila pa diyì adi.” Bamba ne: “Bantu abu kî mbanyunguluke mitu to. Bantu aba kî mbanyunguluke mitu to. Cidibo mbalonge anu tulaasa cyanaana.” Nanku, mbalonge tulaasa biikale banyunguluke mitu’s. Aci’s ncyà bushuwa. Eyo. “Kî mbanyunguluke mitu to. Mbalonge tulaasa.”

Nenku ndi muswe kunwelaku lukonko. Nwamonu anyi? Nudi bumvwe. Nenku ndi muswe kunwelaku lukonko. Swayi numvwije byenzi byabo bya leelu ebi, piikalabo kabayi banyunguluke mitu to. Ngambilaayi cidi cibafikisha ku dyenza maalu mudibo benza amu, piikalabo kabayi banyunguluke mitu; nwamonu’s, muntu yònsò wakwila anu dyende dingumba, ne lukuka lwònsò. Yesu kavwa nanku to. Yèyè kavwa upututuka bwa cintu nansha cimwe to. Nwamonu anyi? Kavwa ne lukuka to. Yèyè’s ki uvwa cyetu cileejilu.

216 Bwenzavi, ditunga, ditunga dikaadi ne bwenzavi bupite bwa kacya kwònsò eku. Ncilumbu kaayi aci? Bansonga, bidimba bya ekeleeziya, bashipangana, balume baasa bakaji baabo ne beena famiye yabo bingoma, boosha ne bânà baabo balela mu mudilu. Kadi anji tangilaayi anu divulangana dya bwenzavi. Nwamba ne kî mbanyunguluke mitu? Kadi ncilumbu kaayi aci? Byenzedi byabo abi mbyenzedi kaayi?

Matunga azukila bukookeshi, ditunga ne ditunga dikeba kukwata dyònsò...makwabo bwa kwenza dibendela dimwepele, ditunga dimwepele, bwa ciikale dibendela dyabo bôbò ne ditunga dyabo. Bazukila bukookeshi!

217 Nsòmbelu wa masandi, mona’s, baa pa buloba mbalwe beena masandi kupita muvwabi kacya kwònsò eku. Bakaji butaka mu misèèsi, bakaji butaka, kadi nwamba ne badi ne lungenyi mu lwòlò? Kabeena mwa kwikala naalu to. Kabeena anu mwa kwikala naalu to.

218 Teelejaayi. Kuvwa muntu umwepele mu Bible wâkavùùla bilàmbà byende, ùvwa n’Legona. Yèyè kaayi uvwa mujimije lungenyi. Paakalwa Yesu kumusangana ne kumupingajila lungenyi mu lwòlò, wakavwala bilàmbà byende. Cya bushuwa’s.

Cidi cinufikisha ku divuula bilàmbà byenu ncinyi? Dyabulu. Ncya bushuwa. Pashiishe ki nwênù kwamba mudibo kabayi banyunguluke mitu's? Asa anu lwendu wenda upweka ne mùsèèsù mwab'ewu, wëndè mu mashinyi upite mìsèèsù mwandamukulu kuyi mumone mukaji butaka, kadi walukile ungambile. Eyo. Jandulaayi.

<sup>219</sup> Pashiishe nwênù kwamba mudibo kabayi banyunguluke mitu amba's? Dìbà adi ncinyi cidi kaciyi cyenda bìmpè? Kabeena mwa kwikala ne lungenyi lwabo mu lwòlò to. Mukaji ne lungenyi lwende mu lwòlò kî mmufwanyine kwenza aci to; awu's udi ne cyumvwiidi citambe bwîmpè. Mmumanye ne yèyè udi munkaci mwa kudizanjika: musùmbà wa démons ya dyalakana pambelu pààpa, biikale anu bantu baa manyaanu, bakooyike, bapepeledi, bakwaciki baa maala, bashipyanganyi, ne bikwabo byònsò. Nwamba ne . . .

<sup>220</sup> Baa pa buloba banwanwa maala makole mapite bùngì patudi twakulangana apa. Badi batuula mfranga mipite bùngì ku maala makole, mu États-Unis emu, kupita yidibo batuula bwa byakudya. Ngeela meeji ne bidi . . . Ngápù mwoyi bùngì bwa misangu yidi mabanza a maala a kapyà alomba ku cidimu ne cidimu cyònsò eci, mu ditunga edi, kupita muvwabi kacya kwònsò eku. Kadi dinwanwanwa diine dya maala a kapyà didi dyenza cinyi? Dikutuma mu lupitaadi lwa bapàle.

<sup>221</sup> Kansere. Padi bangangabuka baa buloba bujima bafunda mu bikandakanda, ne banwambila ne: "Kansere ku bùngì bwaku." Mfwanka. Bamwela pambidi paa mpuku, nenku mbijaadikiibwe ne udi ukupeesha kansere kaa bisulusulu. Makumi mwandamutekete pa lukama a kudibo badi bapeta kansere kaa bisulusulu ku dinwa dya mfwanka. Kadi bakaji ne balume abu badi bamupwita kadi kukupwidijilaye mumpala's. Piikala aci kaciyi dinyunguluka dya mitu, dinyunguluka dya mitu mwaba awu didi ncinyi?

<sup>222</sup> Padibi ne, Evanjeeliyo wa Yesu Kilisto udi mwa kuyiishiibwa ne kujaadikiibwa, ne Nzambi wa mu Dyulu mu mmwenekelu wa Dikunji Dyende dya Kapyà ulelema kumutu kwa bantu ne ulejea ne Yesu Kilisto ukaadi mu citupa cya ndekeelu cya Dilwa Dyende, mwikale munkaci mwa kubapa cimanyinu cya ndekeelu. Kadi baCiseka ne baCyelulwila, kadi kudibiikila mudibo bidimba bya ekeleeziya; nenku pashiishe ki nwênù kwamba mudibo kabayi banyunguluke mitu's? Umvwiyaaku aci. Dìbà dyanyi nyewu dyenda anu diya's. Kadi konkaayi ní kî mbanyunguluke mitu's. Cya bushuwa. Mbanyunguluke mitu balonge tulaasa. Aci kadi ki menemene's. Umvwiyaaku ngiikadilu wabo awu. Kanwena mwa kuumvwija to.

<sup>223</sup> Badi bakosa nsuki yabo, bavwala bilàmbà bya bantu baa pa buloba, bapatuka benda bendakana mu mùsèèsù mushindu awu. Kadi Bible wa Nzambi pendè's udi udimwija ubenga ciine



aci, ukandika mene bwa mukaji kusambilaye ne nsuki mibebula. Wamba kabidi ne mulume. . . Kadi mukaji yêyè udi ucyenza. S'udi wamba, yêyè mwine, wambila bayende, mudiye mwena masandi, yêyè mwine, ne mulume udi ne bukenji bupwangane bwa kushipa nende dibaka ne kumwipata. Aci's ncyá bushuwa menemene. Dìyì dya Nzambi dyamba ciine aci, ne mukaji umvwa ciine aci, cibi utungunuka anu ne kwikala ne nsuki mîpì, kadi kudibiikila mudiye mwena Kilisto. Piikala aci kaciyi ne mmuntu mmunyunguluke mutu, munyunguluke mutu ncinyi? Ndi nkeba muntu angambileku ne munyunguluke mutu ncinyi, pa díbà adi. Eyo. Mbanjunguluke mitu.

224 Balonge bapiluke, ne mapolome, a tulaasa tutumbuke! Tutu tupicisha díbà dyàbúngì ku dilongeshisha bânà beetu balela, mu—mu makumi makole ne dilonga dya cidì mwoyi, kupita mutudi tubalongesha Bible ne Yesu Kilisto. Kakwenaku mwânà nansha umwe mu ditunga emu udi kayi mwa kukwambila cidì David Crockett to. Kakwena cyabisatu cimwe cyabo badi mwa kukwambila ne Yesu Kilisto udi Nganyi to. Nenu, kî ndinyunguluka dya mitu anyi? Cya bushuwa, ndyòdì. Mushindu mwine utudi bafwanyine anu kwikala twenda tuya twenda tuya twenda tuya, mushindu wenzenzabo awu's!

225 Anji vulukaayi. Ne ekeleeziya yidi yileeja patooke mudiyi micítàbe, padi Bible ucipiisha. Bambi mbanjunguluke mitu anyi? Banyunguluke mitu baa balonge tulaasa. Aci kadi ki menemene's. Ekeleeziya mmicítàbe.

226 Vulukaayi Lota. Yêyè's uvwa muntu wa meeji matwe. Anjaayi kumutangila, katanci kakese mpindyewu. Kanwikadi—kanwikadi. . . Katwikadi. . .

Numfwileku luse bwa kupicisha anu tusunsa tubidi cyanaana. Eci cidì—eci cidì ne mushinga mupite búngì. Cidi cipatuka pa. . . Nudi balwe mbwa kunteeleja pândì ngenza mukaba wa mêyì ewu.

227 Tangilaayi. Tangilaayi. Twimanaayi kakese. Sambila anu mu kasunsukila kaa kasunsa, munda mwa mwoyi webe amu ne: “Mukalenge, swaku ncimone.” Kangula cyumvwidi cyebe. Nzambi asweku ênzè cyôcì aci. Tangilaayi. . . Angataayi anu ditunga edi, nkaayaadi. Tumonaayibi cidì Nzambi mwambe.

228 Bible mmwambe, ne: “Mpekaatu ya Sodoma yivwa yitacisha musuuka mwakane wa Lota ku dituku ne ku dituku.” Bwalu buvwa anu ne yêyè kavwaku ne dikima dikumbane bwa kucikandameena to. Ncyá bushuwa anyi? [Disangisha didi dyamba ne: “Amen.”—Muf.] Kavwa mwa kucyenza to, bwalu ùvwa mfumu wa cimenga. Kavwa mwa kucyenza to. Kadi Bible mmwambe, ne: “Mpekaatu ya beena—beena Sodoma yivwa yitacisha musuuka wende.” Úvwa mumanye ne mbibi, kadi kavwa ne dikima dya kucyenza to, bwa kucikandameena.

229 Mpindyewu tangilaayi. Mba-Lota bûngì kaayi mu Amerike emu, makeelela awu, babala Bible wabo, bwa kulongolola diyiiisha dyabo dya dituku, kadi bu mu mpuukapuuka bakafike pa dibatiiza dya mâyi mu Dînà dya Yesu Kilisto? Mbantu bûngì kaayi baa kudibo badi bu mu mpuukapuuka bakafike pa dibatiiza dya Nyuma Mwîmpè? “Yesu Kilisto umwèumwè awu makeelela, leelu, too ne kashidi”? Maako 16: “Bimanyinu ebi nebifile badi biitabuuja”? Yone 14.12: “Ewu udi ungiitabuuja Mêmè, byenzedi bîndi Mêmè ngenza neàbyènzè pende”? “Nwènú bashaale munda Mwanyi, ne Dîyi Dyanyi munda mwenu, nulombe cinudi baswe ne necyenjiibwe”? Mba-Lota bûngì kaayi bavwa bamone Cyôci aci? Kadi, anu bwa kabingila kaabo, bwa dingumba dyabo! Cidi . . . Batangila bamona mu Bible.

230 Batangila disangisha dyabo dya bakaji babebule nsuki adi, kadi paabo bamanye ne Bible udi ucipiisha. Batangila padibo benda bapweka ne mùsèèsù apu, bidimba byabo byôbi biine bya ekeleeziya benda bapweka ne mùsèèsù, bavwale tuputulu, kadi paabo bamanye ne Bible mmucibenge. Kadi kabayiku ne dikima dikumbane dya kucitandisha to. Kadi, nansha nanku, muntu awu wamba mu diye mwena Kilisto, musuuka wende munda mwende mwikale ucilwisha ne mbila mikole, kadi kayi ne dikima to. Piikala aci kacyi Sodoma wa cyena leelu, yèyè awu udi penyi?

Nzambi, tûpèèshèku muntu wacilwisha ne mbila mikole. Ncya bushuwa. Bu mwakamba Yone Mubatiiji ne: “Cisuyi nciteeka ku muji wa mucu.” Ki cidi citukengela leelu ewu ncyôci aci.

231 Tangilaayi. Bôbò n’Sodoma wa cyena leelu. Vulukaayi. Nwamonu anyi? Ditunga dijima dikaadi Sodoma ne Gomola bya cyena leelu. Lota mwikale cyakabidi ne mwoyi’s. To . . . Mwikale ne nsòmbelu awu cyakabidi, bwalu bidiye witabuuja ne mbyôbi ne meeji matooke ônsò abi bidi bimwambila ku Dîyi ne mmupiile.

232 Tangilaayi mu Chicago, Chicago mutambe bunene ewu, pavwa bayiishi nkama isatu abu basòmbè mwaba awu. Ki Mukalenge kungambila diloolo adi civwabo bajinga kwenza. Bavwa ne buteyi buvwabo bajinga kungeela. Mêmè, kuyaku. Mêmè kuya e kwambila Mwaneetu Carlson. Mêmè kwamba ne: “Kanwakucyenzela mu nzubu wa cilaala-beenyi awu to. Nenwikale ne cya kuya naaci mwaba wa cyanaana, ne neciikale cibambalu cya diikala dya mâyi a matamba. Ne bôbò badi ne buteyi bwangeelabo, kî mmwômò anyi, Mwaneetu Carlson?” Kwinyikaye mutu.

Musòmbè mwaba awu mu bìrô byanyi, kukaavwa matuku ndambu, bwa mêmè kulwa, ku disangisha dya mu Chicago adi. Yèyè ne: “Ncyadyakupwaku bwalu abu mwoyi to, Mwaneetu Branham.”

Ki mêmè kwamba ne: “Badi ne buteyi bwangeelabo. Mbwa cinyi, Mwaneetu Carlson? Udi uciina bwa kungambila ne mbwa cinyi anyi, wêwè ne Tommy Hicks?” Kwinyikabo mitu yabo. Mêmè ne: “Tommy, bwa cinyi kwèna uya kaakula?”

Yèyè ne: “Ncyèna mufwanyineku kucyenza to.”

Mêmè ne: “Paanyi’s mwua ndyambidila ne uvwa wamba ne uvwa mufwanyine kunsankisha.”

<sup>233</sup> Mêmè kwamba ne: “Makeelela diloolo ngudi Mukalenge mungambile. Nenupweke kuntwaku leelu, kadi nenujandule ne kanwakupeta nzubu awu to. Nenuye ku nzubu wa cyanaana. Docteur Mead neikale musòmbèle *elu* luseke. Muntu wa bafiike awu, mukajende, utu wimba awu, neikale musòmbèle anu *apa* nunku, ne bikwabo, mwaba wikalabo bônso basòmbèle.” Mêmè kwamba ne: “Nekwikale mwakwidi wa beena Bouddha muntwamu.” Ki mêmè ne: “Mpindyewu nujandule. Badi bandwisha bwalu ndi nyiisha dibatiiza dya mu mâyi mu Dîna dya Mukalenge wetu Yesu Kilisto. Badi bandwisha bwalu ndi nyiisha dimiinu dya nyoka; ne ndwisha cileeji, cya ne, muntu yônso udi wakula mu myakulu udi ne Nyuma Mwîmpè, ne bikwabo.” Mêmè kwamba ne: “Pwekaayi kuntwaku nulwe kubandila Nzambi.”

<sup>234</sup> Kubwelabo muntwamu... Kupwekabo kuntwaku, ne mu mêtà miine abidi a paanyima paa aci awu, anyi mapite apu, pa dîbà kampanda mu mapingaja amu, kubiikilabo Mwaneetu Carlson ku telefone. Ki kwambaye ne: “Muntu wâkamufikisha ku dipeta ciine aci, ne wâkafuta citupa cya mushinga cya diteekesha naaci awu, kwambaye ne: ‘Bikengela tulekele, bwalu mulongolodi wa ndongamu udi wamba ne bakaavwa bamane kulaya cisumbu kampanda cya bimbi baa misambu nzubu awu diloolo adi, anyi mu dinda amu.’” Nunku kabaakapeta mwa kumwangata to.

<sup>235</sup> Pa nanku twêtù kupatuka kuya ku Town and Country. Nunku mu dinda adi patwâkamûbwelà, ne patwâkiimanàmu, ki—ki Mwaneetu Carlson kwambaye ne: “Kudi cintu cimwepele. Nwênù bânà beetu nudi bafwanyine kubenga kupetangana ne Mwaneetu Branham, kadi,” yèyè ne, “yèyè kèna ne bwòwà bwa kwamba bidiye witabuujà to.” Yèyè ne: “Ûkaavwa mungambile ne bintu ebi nebyenzeke menemene anu mushindu udibi ewu.” Yèyè ne: “Mpindyewu nyèyè ewu. Mulekelaayi àdyâkwilè yèyè mwine.”

<sup>236</sup> Mêmè kwangata Mufundu wa ne: “Ncyakashikuka ku cikeena-kumona cya mu dyulu to,” mwakamba Pólò. Mêmè kwamba ne: “Nudi bacyènzè mbwa kundwisha mêmè, bwa dibatiiza dya mu mâyi mu Dîna dya Yesu Kilisto. Baa kunudi aku bapite pa nkama isatu badi baditeeja bu Docteur *Kampanda*, ne Docteur *Kansanga*.” Mêmè ne: “Mêmè ncyèna mulonge nansha tulaasa tubandile to. Kadi ndi ngeela muntu kana yônso

kadyombo mwab'ewu bwa kutwala Bible wende ne kwimana mwab'ewu ku luseke lwanyi eku, ne kuvila nansha dimwe dya ku Mèyì adi mambiibwe awu."

Nudi naabi pa mikaba ya mèyì mwaba ewu, panwikala baswe kubyumvwa. Civwa mmusùmbà wàkashàlà matama bu byàtà unudiku kanuyi banji kuumvwa to. Mémè kwamba ne: "Mbwalu kaayi ebu?" Kudiku muntu mwab'ewu, diloolo edi, uvwapu mu disangisha dya mu dinda adi anyi? Tumonebi èlè cyanza muulu. Eyo. Ee, cya bushuwa, tangilaayi eku ne eku.

Mémè ne: "Nanku, panudi kanuyi mwa kucitwa nyama ku mikolo to, nanku lekelaayi kwikala kunjaanyina mu dikoshi's." Cya bushuwa. Ki bikemu abi búngì cyanaana, padibo baya ku luseke banyunguluka ditumba. Kadi padibo bafika cìmònààmèèsù ne cyena bwalu, ngonyoonyi yandamuna myadi's. Ncya bushuwa. Cidi. . . Bantu abu kupatukabo.

<sup>237</sup> Tommy Hicks kwambaye ne: "Ndi muswe mikaba ya mèyì nkama isatu ayi, bwa kuyitumina muyiishi yònsò wa badi badyamba ne mba-Trinitaires bándiku mémè ewu mumanye abu."

Bantu abu bandabula ku cyanza, bamba ne: "Netulwe ku tabernacle aku bwa kulwa kubatijiibwa cyakabidi."

Badi aku anyi badi kunu? Tubingila's. "Ncyèna mwa kucyenza to. Dingumba dyanyi kadyankundekela ncyenza to. Ndi mfuma ku disela dya mukaji. Ndi mfuma ku disumba dya ngombe wa cikokedi, anyi ngombe ya cikokedi, eyowa's we. Ndi—ndi mfuma ku disumba citupa cya buloba. Bikengela nye kacitangila." Nwamonu anyi? Bimwe bya ku bintu abi, bu ne, ntubingila. Ncya bushuwa anyi? [Disangisha didi dyamba ne: "Amen."—Muf.] Awu nsòmbelu mmukumbanyine Evanjeeliyo anyi? ["To."]

Piikala Evanjeeliyo ngwa cya bushuwa, tusumbishaayi byònsò bitudi naabi bwa twikale ne mwoyi bwende Yèyè. Ikala mwena Kilisto. Eyowa's, mukalenge. Amen. Monaayaaku mpindyewu, patukaadi tujikija apa.

<sup>238</sup> Kadi tubingila twabo ntwitabaayi yabo ne mangumba abo awu.

Mbyenze bu mudi mucu. Mvwa ntangila Mwaneetu Banks, dīngà dituku. Mvwa ne mu—mucu wa pin, wúmvrà mukune pāncīvrà mmwangeelaku kwaka naka, kukaadi bu, kaa, bidimu bitwe ku dikumi ne bitaanu, anyi bipite apu. Nenku mémè kulekela mici ya mvinyo ayi, matamba matolokele pa mucu wa pin awu, ne katuyi mwa kupicishila kùpākupà mwinshi amu to. Ne mwòmò mwine kamuvwa kasoosa nansha kaa kànà katoloke to, twamb'eku twamb'eku. Ki mémè kupatuka kwaka, kwangata scie e kukosa matamba awu, too ne mwavu mucu wa pin awu kubanda kufika *apa*, mu mushindu wa wèwè mufwanyine kwendela mwinshi mwawu awu ne kùpākupà. Nenku musùmbà

wa bisoosa bilenga bitambe binudiku kanuyi banji kumona to bidi mwinshi mwa mucu awu patudi twakulangana apa. Civwa ncinyi? Dimiinu divwa mwaba awu. Bivwa bikengela kupetadi bukênkè.

<sup>239</sup> Nenku pacidi anu mangumba, tubingila twebe atu, biteeta kubwikila dileji dyabi pa Dimiinu adi dyûdi mumanye ne didi bushuwa disanganyiibwamu adi, udi uditeeka ku luseke lwa Lota. Imansha bintu abi kule, ne lekela Bukênkè bwa Evanjeeliyo bukenkeshe panshi apu, bukole bwa Yesu Kilisto. Eyo. Kupangisha Bukênkè bwa kufikabo pa dyôdi adi, nekudipangishe bwa kwikaladi ne mwoyi. Bwalu, Bukênkè bwôbô anu bufikepu, neditoloke diye ku Mwoyi.

Ki bwa cinyi bantu batu bamba ne: “Kwikadi uya ku amwe a ku masangisha a mushindu awu to.” Badi baciina ne nkwepi kwavwa ndambu wa Bukênkè kulenga cimwe cya ku bidimba byabo.

<sup>240</sup> Vulukaayi mukaji wa ku ciinà cya mâyi. Ûvwa ndumba.

Ki baakwidi abu biimane mwaba awu. Bôbô kumona Yesu wambila Natanaela ne: “Nkaavwa mukumone, pauvwa mwinshi mwa mucu wa mfigi apu.”

Ki baakwidi kwambabo ne: “M’Beelezebula. Mmwena lubuku. S’ki yêye dyabulu wawa.”

<sup>241</sup> Mukajaana mutekete awu, mmwenze anu useemena mwaba awu, mu ngiikadilu wende wa bungèndàmàsàndi awu, musòmbe ne balume basambombo. Kadi mmwenze anu useemena mwaba awu mu ngiikadilu awu, mu ngiikadilu uvwaye awu. Ki Yesu kwamba ne: “Ntwadileku mâyi a kunwa.” Mu yiiki umba ukutuka’s. Yêye ne: “Nda wangate bayeebe ulwe nende mwab’ewu.”

Yêye ne: “Ncitu nende to.”

Yêye ne: “Wambi bulelela. Ukaavwa naabo bataanu, kadi mwine ûdi musòmbe nende awu, kî mbaeebe to.”

Yêye ne: “Ndi njingulula ne Udi muprofeta, Mukalenge. Ndi mumanye ne Maasiya ki wênza aci paalwaYe.”

Yesu kwamba ne: “Mémè ki Yêye awu.”

<sup>242</sup> Aci kadi kukosaci bwalu. Paakateema Bukênkè abu pa Dimiinu divwa disanganyiibwa mu kandumba kaa kale aku, matuku a bundumba e kumba kujika. Kuditwaye mu mùsèèsù, wenda utumbisha Nzambi, wamba ne: “Lwâyee, kanumonaayi Muntu Udi mungambile bintu bîndi mwenze. Kî n’Yêye ewu Maasiya anyi?” Civwa ncinyi? Bukênkè mbuye kalenga kaadimiinu kavva mwinshi mwa dileji dya ciikishilu cya bundumba aci. Eyowa’s, mukalenge.

Mpindyewu tujikijaayi, mu kwamba kwa eci nunku. Ncyêna mumanye ne ncidi ne mabeji makwabo bûngi kaayi to, kadi

ndi—ndi mutwishiihwe ne ncyàkuàngata ônsò to. Matwe ku dikumi, kadi awu adi anu bu cyabibidi cimwe bwa kujikija. Kadi tujikijaayi, mu kwamba kwa eci nunku.

<sup>243</sup> Tufwanyikijaayi cintu kampanda, musangu umwe, cya nsòmbelu mukumbanyine. Tufwanyikijaayi nsòmbelu wa Pòlò Munsantu ne wa nsongaalume mubanja awu. Bukênkè bumwebumwe abu mbwàkalengà bantu bônso babidi aba. Bônso babidi baakapeta dibiikila dimwedimwe dya kudi Yesu Kilisto. Neya bushuwa anyi? [Disangisha didi dyamba ne: “Amen.”—Muf.] Bônso babidi bavwa balongeshiihwe bîmpè mu Mifundu. Bônso babidi bavwa beena teoloji. Vulukaayi, Yesu wakambila—wakambila nsongaalume mukookeshi mubanja awu ne: “Lama mikenji.”

<sup>244</sup> Awu ne: “Ndi mwenze aci, kacya ku bwânà bwanyi.”

Ûvwa muntu mulongeshiihwe. Ki muvwa pende Pòlò Munsantu. Bônso babidi bavwa balongeshiihwe bîmpè mu Mifundu. Kadi, bônso babidi bavwa ne Dìyì. Umwe uvwa naaDi byumukile ku dimanya kampanda; mukwabo uvwa yèyè ne mutoloku wa Mwoyi munda amu. Bukênkè abu mbwenze anu buteema, kumpala kwa Pòlò, kwambaye ne: “Mukalenge, Wèwè udi Nganyi?”

Yèyè ne: “Ndi Yesu.”

“Bwa apu kaayi, ki mêmè ewu.” Ûvwa mudilongolole.

<sup>245</sup> Bukênkè abu bwakalenga bantu bônso babidi abu. Umwe wakiimicishiihwa; mukwabo to. Mushindu awu ngudibi leelu ewu: ekeleeziya wa nyuma, ekeleeziya wa mubidi.

<sup>246</sup> Muntu mubanja awu uvwa ne kabingila kende. Kavwa mwa kucyenzaku to. Ûvwa mulamina panshi kudi bujitu bwa balunda bapitepite bûngi baa pa buloba. Kavwa muswe kushiyangana ne baamâyi bende to.

Ki lutatu ludi naalu bantu bààbûngi leelu ewu. Wèwè wela meeji ne, bwalu udi wa mu diswa kampanda, kwêna mwa kulekelaku bwânà bwenu bwine abu to. “Bônso nyawu banwa maala ne bintu bya mushindu awu. Badi benza *bikampanda*.” Eyo, tungunuka anu naabi; ncyêna cilumbu ne diswa adi to, ncyêna cilumbu ne ekeleeziya awu to. Mêmè ndi ngamba mbwebe wèwè. Wamonu anyi? Eyo. Wamonu anyi? Ncyêna cilumbu ne ciine aci to. Bwalu, mmaanyi mu nkunde, nkunde mu maanyi. Ngâfumu ku dinwambila ne ekeleeziya awu kî ncîngà cintu to anu diswa, dingumba, piikalabo bavila Dìyì dya Nzambi.

<sup>247</sup> Monaayi. Muntu mubanja awu uvwa ne tuingila twende. Kaakalekelaku bujaadiki bwende to, nansha nanku. Tudi tusangana ne wakaya too ne ku bungèndààmùshìngà bwa bunene. Ûvwa ne dimanya. Nenku wakafika mu kaaba kaa bikengela kuvudijaye byàbûngi menemene, mu mushindu

wa ne byakakengela yêyè kwasa mayeeba mapyamapya bwa kuteekelamu bintu byende abi. Kadi paakafwaye; ki muntu kampana mwena dipolome dya tulaasa tutumbuke, mwikale ne nshingu wa nkoolò, kuyiishaye ku citalu cyende, kakuyi mpatà to. Nenku paakayiishaye apu, ùvwa mufwanyine kwikala mwambe. . . Baakashiya mabendela mapwekesha, nenku wakamba ne: “Mwaneetu munanga, mfumu wa cimenga eci, patudi twakulangana apa ùkaadi mu maboko a Wa bukole bwònsò, bwalu yêyè uvwa cidimba cinene cya ekeleeziya. Yêyè wakenza *bikampana*, ne *bikansanga*.”

Kadi Bible mmwambe ne: “Mu iferno yêyè kubandulula mèsù, mwikale mu dikengeshiibwa.” Nwamonu anyi?

<sup>248</sup> Nenku vulukaayi ne, ucivwa anu muswe kushaala mukwate ku ditonda dyende mu iferno amu. Kumonaye Lazàrò, mu cyàdi cya Abraham, ki kwambaye ne: “Taatu Abraham, tuma kwòkò Lazàrò apweke muneemu.” Mutungunuke ne kumubiikila ne “taatu.” Nwamonu anyi?

Yêyè uvwa mwangate dimanya dyende, muye ku ekeleeziya wa mamanya a mu mitu. Paakamulenga Bukènkè, wakaBubenga.

Piikalabi ne awu kî mmwenenu wa cyena leelu wa ekeleeziya leelu ewu to, ncyèna mumanye aci to. Cidi Nzambi uteemesha mu wabo njila nansha ciikale cinyi, Dikunji dya Kapyà anyi cifwanyine kwikala cinyi; bôbò, ne dimanya dyabo adi, badi mwa kuCipetela anu dyumvwija dya kudibingisha naadi, ne kuya ku cisumbu cya beena mamanya mu mitu, bwa mwaba wa luumu.

<sup>249</sup> Kadi Pòlò yêyè's ukaavwa mu mwaba wa luumu mwine awu, ne dimanya dinene, mumanyi munene wa dibàla mulongesha kudi Gamaliele, mwikale diboko dya bukole dya mwakwidi munene, mu mushindu wa ne wakaya kudi baakwidi ne kupetaye mikanda bwa kwela bansantu babunguluki baa mu malaba abu mu buloko. Kadi paakateema Bukènkè mu wende njila, ne paakamonaye ne Dikunji dya Kapyà dimwedimwe dyàkalombolà bânà baa Izaleela mu cipeela adi divwa n'Yesu Kilisto, wakalekela byònsò bivwaye mumanye abi. Wakalwa ku Mwoyi.

<sup>250</sup> Nudiku bafwanyine kubiikila nsòmbelu wa muntu mubanji awu ne mmukumbanyine Evanjeeliyo wàkumvwaye awu anyi? Nansha muvwaye mwena kwitabuuja amu, nudiku bafwanyine kubiikila nsòmbelu wa mushindu awu. . . Munkaci mwa beena mamanya a mu mitu ne bisankasanka, diloolo adi kuulu kwaka pa. . . pakaavwa dîbà dyamba kubwela, mulongolole dituutakaja dya bilawudi bya maala, ne pàmwàpa mwakwidi kampana wenza disambila, lwà kuulu kwa nzubu kwaka. Nenku yêyè mwikale mulongolole bisankasanka abi, ne mulombyanganyi wa kaa pa luse mulaale ku ciibi cyende cya lupangu panshi apu. Ki kwenzaye dituutakaja dya cilawudi

cyende, ne kwakulaye pa diitabuuja dyende dinene divwaye naadi mu Nzambi. Kadi kumpala kwa bufuku kucyabu, dinda dya dituku divwa dilonda, kumpala kwa dîbà kupatukadi, yêyè ukaavwa mu iferno. Ncya bushuwa. Beena mamanya a mu mitu beenu's ki bôbô abu.

<sup>251</sup> Kadi Pôlò, paakamulenga Bukênkè, tufwanyikijaayi wende nsômbelu bwa kumona ne mmukumbanyine anyi. Cyakenzeka ncinyi? Dîbà adi, Pôlò, paakamulenga Bukênkè, wakalekela dimanya dyende dyônsò ne wakashiyangana ne cisumbu cya beena mamanya a mu mitu aci, ne wakenda mu Nyuma wa Yesu Kilisto. Butumbi kudi Nzambi's we! Ne meeji matwe bu muvwaye naawu amu, yêyè kaakakwataku mudimu nansha ne myaku ya minene to.

Paakafikaye munkaci mwa beena Kolinto abu, yêyè wakamba ne: "Ncyakafikaku kunudi ne lungenyi lwa bantu to. Ncyakafikaku kunudi ne myaku minene to, bwalu nwênù nutu nuteeka dyenu dyeyemena mu bya nanku. Kadi ngâkafika kunudi mu bupwekele, mu bukole bwa dibiika dya Yesu Kilisto ku lufu, bwa diitabuuja dyenu kwikaladi mu cyôci aci." Ki nsômbelu nyêyè awu. Tangilaayi aci.

<sup>252</sup> Yêyè kaakakwataku mudimu ne tulaasa twakalongaye to. Kaakendaku ne musumbà wa beena mamanya a mu mitu to. Wakenda mu Nyuma wa Kilisto, mudipwekeshe, utumikila Dîyì dya Nzambi, pavwaDi dibengangane bikole ne twitabaayi yabo bôbô. Kadi Pôlò wakamona Bukênkè ne wakendelaMu (ncya bushuwa anyi?), ulekela Mwoyi wa Kilisto uleeja Yesu Kilisto kudi baa cikondo civwaye ne mwoyi aci, bwa bantu kumonabo Nyuma wa Nzambi munda mwende.

Nenku badipwekeshi bakaciitabuuja, bikole menemene, mu mushindu wa ne bavwa mene bajinga kutwala mishwala. Bavwa bayilengesha mubidi wende. Ne bavwa baciitabuuja, mu mushindu wa ne, yêyè uvwa cimfwanyi cilelela cya Yesu Kilisto, mu mushindu wa ne, cyônsò civwaye yêyè ulenga, bavwa biitabuuja ne, civwa cibeneshiibwe. Eyowa. Awu uvwa mmuntu kaayi, mufile mwoyi wende, mabanji ende, ne byônsò bivwaye naabi! Tulaasa twende tulonga; wakatupwa twônsò mwoyi, bwa kwikalaye wendakana ne balobi, ne balombyanganyi baa kaa pa luse ne balalakanyi mu mùsèsèsù, bwa kwenza ne makênkè ende aleeje dinanga dya Yesu Kilisto.

Wakamba ne: "Bakankuma mfimbu mu mwongo, misangu makumi anaayi ne citeema; kabiya bintacisha to." Wakamba kabidi ne: "Ndi mwambule mu mubidi wanyi bimanyishilu bya Yesu Kilisto." Kalumyana aku kakwate ne bya luse mu mushindu ukwacisha ne bwôwà, kamba ne: "Ndi mwambule mu mubidi wanyi bimanyishilu bya Yesu Kilisto." Dishiihangana kaayipu ne munene wa kuneemekibwa ewu ne baakwidi bavwa bamunyungulukile.



253 Kadi paakadiye mu Loomo, kakuyi muntu nansha umwe mwimane ku luseke lwende. Nenku bavwa munkaci mwa kwibaka cishipeelu, bwa kumukosabo mutu, pambelu apu. Ki mwaba awu ki wākacyāmbāye. Kaa, ekelekele! Yēyè ne: “Kudi cifulu cya butumbi cinteekela, ciikalà Mukalenge, Nzuji mwakane mwa kumpa mu Dituku adi; kī ng’anu mēmè nkaayaanyi to, kadi mpindyewu bōnsò batu banange dimweneka Dyende.” Ki nsömbelu udi mukumbanyine Evanjeeliyo nyēyè awu, mwānà wa balume mulelela.

254 Wakangata kaaba kaa Kilisto. Wakashiya Evanjeeliyo udileejila mu yēyè. Kumpala kwa kwenzaye nanku, wakaya ne wakalonga Evanjeeliyo. Wakapweka ku Arabie ne kushaalaku bidimu bisatu, ne wakangata Dipungila Dikulukulu. Ne wakaleeja, ku Dipungila Dikulukulu, ne Yēyè awu ki uvwa Yesu Kilisto. Ki kuCilekelaye cidileejila mu yēyè, kudi musumbà wa bantu badipwekeshe. Bwa ne, yēyè, pavwa . . . Yēyè kwamba ne: “Ndi mumanye mwa kwikala ne difu dyukute, ne ndi mumanye mwa kwikala ne nzala ne mupangile bintu.”

Muntu ne dilonga dya tulaasa bu yēyè awu, ne mumanyi wa dibàla bu yēyè awu, mwimane ku luseke lwa . . . mupetele dimanya ditwe ngwengwengwe dya mu tulaasa kudi Gamaliele, umwe wa ku balongeshi bavwa batambe bunene baa mu dituku adi, ne mwimane mwelangane diboko ne mwakwidi munene. Mwaneetu, yēyè’s uvwa mwa kwikala mukumbanyine miliyò ya ndola ne mwikale ne nzubu ya mishindu ne mishindu. S’ ncyā bushuwa. Kadi wakamba ne: “Mēmè . . .”

255 Ûkaavwa mushaale ne cinkutu anu cimwepele. Ki Demaasa umona muntu pende ne mudimu wa bwambi wa mushindu awu! Timote Mwibîdi, nshapita mwi3, mmwambe ne: “Demaasa mmundekele, ne bantu bakwabo bōnsò abu, banange maalu a pa buloba adiku leelu aa.” Yēyè ne: “Pawalwa, untwadileku cinkutu cîndi mushiye kuntwaku aci. Kukaadi mashika be.” Muntu ne mudimu wa bwambi wa mushindu awu, kadi mufwanyine pende kwikala ne cinkutu anu cimwepele? Butumbi kudi Nzambi’s we!

256 Bimvulwija Martin Munsantu, pavwaye ukeba kwimanyina Evanjeeliyo, ne bikwabo byōnsò, kumpala kwa kwikalaye mukudimune mucima. Mu—mu cisangilu cya Kumpala kwa Nicée, anyi mu cisangilu cya Nicée, mu *Baataatù Bâà Nicée*, mu maalu malonda. Dituku dikwabo, ùvwa upatukila ku biibi aku. Ûvwa wa ku Tours, mu France. Nenku kuvwa bantu . . . Ki mukulakaji mukwabo mulombyanganyi wa kaa pa luse mulaale panshi mwaba awu, ùpunga ne lufu, kayi bilàmbà pambidi to. Ne Bantu biikale bapicila mwaba awu, bàvwà mwa kwikalaku bamupe bilàmbà, kadi kabayi mwa kumupa to. Bapicilapu benze anu bu badi kabayi bamone mukulumpe awu to. Kī Martin Munsantu kwimanye mwaba awu e kucitangila. Batu bambe ne uvwa . . .

257 Musalaayi ne musalaayi yônsò uvwa ne—uvwa ne muntu wa kwikala kumulaabila bwanga ku bisabaata. Kadi uvwa yêye ulaabila bende basadidi bwanga ku byabo bisabaata.

Ki kukopolaye cinkutu cyende, kwangataye keele kadi kucipandulula, pankaci, mu bipese bibidi, ne mwele wende wa kuvita. Kujingilaye mukulakaji mulombyanganyi wa kaa pa luse awu mu cyôci aci, wamba ne: “Twêtù bônsò babidi tudi mwa kushaala ne mwoyi.”

Kwalukilaye kumbelu e kudyelaye mu bulaalu. Mulaale mwaba awu, wela meeji muvwa mukulumpe awu mwase mwadi. Dyakamwe, Cintu kampana kumubiisha. Kutangilaye. Mu cibambalu amu, Yesu Kilisto mwimanemu mudj̄ingile cipese cyôci cimwecimwe cya cilambà cya kale civwaye mujingile mulombyanganyi wa kaa pa luse awu aci. Wamba ne: “Mu mushindu wûdi mwenzele mutambe bukese wa ku bânà bakese aba awu, Mêmè ngûdi mwenzele awu.” Ki nsômbelu mukumbanyine Evanjeeliyo nyêye awu. Nudi bamanye mwakatwaye pende citampi ku mwoyi wende, ki mmwômò anyi?

258 Tangilaayi Polycarpe, mwimanyine dibatiiza dya mu Dîna dya Yesu, ubangana ne ekeleeziya wa Katolike wa cyena Loomo. Ki kumwoshilabo ku dikunji dya cyoshelu; kuupulabo nzubu wa byowedi ne kumwoshabo. Tangilaayi Irénée, ne bakwabo baa kudibo, baa bwena bààkakèngà bwa bwalu ebu abu. Ki nsômbelu mikumbanyine nyôyi ayi.

259 Tangilaayi cidi Pôlò mwambe mu Mukanda wa Ebelu, nshapita wa 11. Mmwambe ne: “Baakabakosa bitupa ne scie, kubapandulula; baakalalakana, bavwale biseba bya mikooko ne bya mbuji, ne bavwa mu cipeela, ne babanyenge bintu byabo byônsò ne bikwabo; nsômbelu yidi baa pa buloba ebu kabayi bakumbanyine to.” Ki bwalu mbwôbò abu’s. Nsômbelu awu ki udi mukumbanyine Evanjeeliyo. Wanyi mêmè ne webe wêwè neyiimane bishi mu Dituku dya Cilumbulwidi, kumpala kwa bantu baa mushindu awu?

260 Tangilaayi Pôlò mpindyewu. Netupweke too ne kwinshi. Yêye wakiimanyina Evanjeeliyo, ulekela Yesu utamba kupongolokela munda mwende. Nansha byôbi ne mmunyi, ncinyi, nansha civwa muntu kana yônsò wela meeji pa bwalu abu. Mwaba awu, mwakwidi munene, mona’s, kuyaye e kumukoseshaye mutu, bwa Cyôci aci. Yêye uvwa cifwanyikijilu cikumbanyine cya Evanjeeliyo. Ulekela... Tangilaayi mwaba awu. Nansha cyakeela bantu meeji ciikale cinyi, ulekela nkwaaka wa Mwoyi wa Cyendelelele utuucila nkoka mu yêye, mu mushindu wa ufika ku dyamba ne: “Mvwa mwa kujinga ne ngeediibwe mêmè mulawu ne ngiikale mutapuluke ne Kilisto, bwa bânà beetu.”

Mpindyewu udi mumanye cyûdi wenza paudi upeta Mwoyi wa Cyendelelele anyi? S'ki lukonko lwebe ndwôlò alu. S'ki dyandamuna dyebe ndyôdi adi. Udi wangata luseke lwa mamanya a mu mitu; anyi, udi wangata luseke lwa *Eci*, pawikala bushuwa mupete Mwoyi wa Cyendelelele. Ki cidi cyenzeka ncyôci aci.

<sup>261</sup> Ki cyakenzeka. Pôlò, mwikale mudilongolole bwa kwedibwa mulawu ne kwikala mutapuluke ne Kilisto, bwa cisamba cyende...Bampofo, bantu binyonga bavwa kabayi baswe kuteeleja Evanjeeliyo wende abu!

Ndi ndyumvwa ne, bundu kûndi mêmè mwine. Mêmè's nkaavwa pabwipi ne kubabenga, bwalu kabavwa baswe kunteeleja to. Ndi ndyumvwa anu mwa kunyingalala's. Ne ndi mene munyingalale. Nwamonu anyi?

<sup>262</sup> Monaayi. Bivwa bakwabo beela meeji nansha biikale binganyi, nsòmbelu wa mushindu ewu ngudi mukumbanyine Evanjeeliyo.

Mpindyewu nkaadi njikija.

<sup>263</sup> Muntu mubanji awu, anu mudi bààbûngi baa kutudi leelu ewu, mbakangile Dîyi dya Mwoyi ciibi ne badibenge, ne bashaale cidimba cya ekeleziya; ne tukaadi baleeje nsòmbelu, udi ujaadika mu Bible ne, uvwa kayi mukumbanyine Envanjeeliyo uvwaye mulombiibwe bwa kwakidila awu to. Neya bushuwa anyi? [Disangisha didi dyamba ne: "Amen."—Muf.] Mmuni mudi Evanjeeliyo mufwanyine kuteema mu bukênkè bubwicidile mushindu awu, buvila bukole bwa Nzambi?

<sup>264</sup> Mpindyewu, mushindu umwepele wa kwikala ne nsòmbelu mukumbanyine, ngwa kulekela Kilisto ne Dîyi Dyende (bwalu, Yêyè udi Dîyi) bidileeja mu bupwangane bwônso mu wêwè too ne paashindika Nzambi cidiYe mwambe mu Dîyi. Bwalu, Kilisto wakafwa bwa Yêyè kuDileeja kumpala kwa Nzambi, bu Mulambu. Ne Wôwò awu wakaalukila mu mmwenekelu wa Nyuma Mwîmpè, bwa kuDileejila mu bantu Bende, bwa kutungunuka ne mudimu Wende; mwikale uDileejila mu wêwè, bwa kuuja Dîyi Dyende dilaya mu matuku acivwa alwa aa.

Bu mwakumvwa Yone Mubatiiji, paakumvwaye ne Kilisto mmulwe. Ki Kilisto kupatuka kadi kubwela mu mâyi. Ki Yone kwambaye ne: "Monaayi Mwânà wa mukooko wa Nzambi."

Muntu mukwabo nansha umwe kaakaCimona to. Kadi yêyè wakaCimona, Bukênkè bwâkatuulukà mu Dyulu abu, bwenze bu nkuci. Ne Dîyi dyamba ne: "Ewu udi Mwan'Aanyi munanga ûndi nsankila bwa kusòmbela munda Mwende." WakaBumona bulwa.

Ki Yesu kupatuka e kubwela mu mâyi, Emanuwele, kumpala kwa mu—muyiishi uvwabo ne cya kucinkila ne muumishi wa

maalu awu. KupatukaYe e kubwela mu mâyi, kumpala kwa bantu, wamba ne: “Ndi muswe kubatijiibwa kûdi wêwê.”

265 Yone kwamba ne: “Mukalenge, mêmè’s ngudi ukengela bwa kubatijiibwa kûdi Wêwê. Udi Wêwê ulwa kûndi bwa cinyi?” Mêsû a bônso babidi kusambakeenawu, muprofeta ne Nzambi wende. Amen. Nudiku bafwanyine. . . Ndi. . . Mêmè ewu ncyênàku mufwanyine kunanga bwa kwikala mwimane mbandila aci anyi? Kumonaku lutangilu lwa dîsû dikolesha, lwa dibankameenangana lwa Yone alu ne ntema lupetangana ne lutangilu lwa dîsû dikolesha, lwa dibankameenangana lwa Yesu alu; biikale bânâ baa baakaaku mukulu ne mwakunyi, mu mubidi emu.

266 Yesu kwambaye ne: “Yone, twala bwa biikale nanku bwa mpindyewu, bwalu bidi bikengela twêtù kwenza nanku. Twêtù’s ki Mukenji wa dîbà edi. Bidi bikengela bwa twêtù kukumbaja bwakane bwônso.”

267 Yone kudyambidilaye ne: “Eyowa, Yêyè’s ki Mulambu. Bikengela Mulambu usukudiibwe kumpala kwa Wôwô kufidiibwa.” Pa dîbà adi kwambaye ne: “Seemenaaku apa.” Ki kuMubatiizaye. Amen. Mu ngaakwilu mukwabo ne: “Bidi bikengela bwa twêtù kukumbaja bwakane bwônso.”

Yesu, mumanye ne muntu awu uvwa mulelela, kwambaYe ne: “Kacya kakutu kwanji kwikala muntu mulela kudi mukaji, bu yêyè nansha. Yêyè mmutambe ne muprofeta; nudi mwa kwakidilaayi bwalu ebu ne, yêyè ewu mmutambe ne muprofeta.” Ne Yesu, mutangile mu mwoyi wende, ne mumanye ciine aci. Mwanaabo menemene wa mamwëndè mukulu utwilangana Nende mwaba awu, mpala ne mpala.

268 Yone kwambaye ne: “Mukalenge, mêmè ngudi ukengela bwa kubatijiibwa kûdi Wêwê. Kadi bwa cinyi Wêwê udi ulwa kûndi mêmè?”

269 Yêyè ne: “Twala bwa biikale nanku awu, Yone. Kadi, vuluka ne, bidi bikengela bwa twêtù kukumbaja cyônso cidi Nzambi mulaye. Ne Mêmè’s ki Mulambu. Bikengela Mêmè kusukudiibwa kumpala kwa kufidiibwa.” Kaa, ekelekele! Ekelekele!

270 Nenu, leelu ewu, padi Makênkè a diloolo ateema apa, padiku kakuyi muntu ne lungenyi lwende mu lwôlo udi kayi mwa kwambaku (mulongi wa Bible kana yônso, ukaadiku mutangile mu Bible emu, mmumanye) ne edi ndituku dya ndekeelu to. Pa nanku, bidi bikengela twêtù kuumuka ku bimanu binene ebi kumata panshi, anyi kuumuka ku bintu ebi, ne kubwela mu bwakane bwa Yesu Kilisto mu dituku dya ndekeelu edi, ne kutwibwa Citampi cya Nzambi kumpala kwa dyabulu kututwaye cimanyinu cya nyama wa lwonji. Kaa, ekelekele. Eyowa’s.

271 Lomba Nzambi bwa alekele Bukênkè bwa dituku edi bujuuke munda mwebe, bwa wikale musadidi wa butumike

wa Nzambi. Ne pashiishe ulekele mamuma a Nyuma ashaale kashidi mu nsòmbelu webe. Nenku nsòmbelu mukumbanyine Evanjeeliyo nyêyè awu.

<sup>272</sup> Anyishaayi ngămbè bwalu ebu, bwa kujikija. Mushindu umwepele, mushindu umwepele wúdi mwa kwikala ne nsòmbelu mukumbanyine Evanjeeliyo, nkulekela Evanjeeliyo Yêyè mwine, kantu ne kantu kaa Evanjeeliyo, kabwele munda mwebe ne kaleeje milayi Yende, kayivwije mishindikiibwe. Lekela Nzambi ikale ne mwoyi munda mwebe, bwa kushindika milayi ya dituku edi.

Anu mwakamba Yone, muvwa Yesu mwambile Yone ne: “Twala bwa biikale nanku, Yone. Ncya bushuwa. Kadi twêtù’s ki baamisanjeela baa dituku edi, nenku’s bidi bikengela bwa twêtù kukumbaja bwakane bwónsò.”

Nenku piikalabi ne twêtù ki beena Kilisto baa dituku edi, twakidilaayi Yesu Kilisto mu mwoyi yetu. Ne Yêyè udi Dîyi. Kuvidi kantu nansha kamwe kaa Dyôdi adi to. Amba ne: “Didi Bulelela.” Ne uDiteeke mu mwoyi webe, utangile mamuma a Nyuma pa wêwè, ne ukumbaje mulayi wónsò utuYe mwenze mu Bible. Nzambi mmuswe kukumbaja Dîyi Dyende, ne Yêyè katu ne bîngà byanza to anu byanyi mêmè ebi ne byebe wêwè abi. Katu ne mângà mêsù to anu aanyi mêmè aa ne ebe wêwè awu. Katu ne lûngà ludimi to anu lwanyi mêmè elu ne lwebe wêwè alu. “Mêmè ndi Muci wa mvinyo. Nwênù nudi matamba.” Matamba ngadi akwama bimuma. Muci wa mvinyo ngudi ufila bukole kudi ditamba. Ki nsòmbelu udi mukumbanyine nyêyè awu.

<sup>273</sup> Disambila dyanyi didi, bwa aba badi ku cisanji anyi mu . . . mu citupa cya buloba cidi mikaba yikafika, ne aba badi apa aba. Nzambi wa ngàsà yónsò, wa mu Dyulu, akenkesheku Nyuma Mwîmpè Wende mubenesha pa twêtù bônso, bwa ne twêtù, kubangila diloolo edi, kubangila apa, twamona mwa kwikala ne nsòmbelu udi Nzambi mufwanyine kwamba ne: “Ndi musankishiibwe be. Bwelaaku mu masanka a Cyendeleele avwa makulongolwela kacya ku difuka dya dyulu ne buloba.” Nzambi wa mu Dyulu atumeku mabeneshwa Ende pa nwênù bônso.

<sup>274</sup> Ndi ndomba bwa Nzambi anubenesheku nwênù bakaji, diloolo edi, nwênù badi ne nsuki mîpî abu, mu mushindu wa nwênù kumona, ne kuseemena kule ne mmwenenu wa cyena leelu wa dituku edi ewu, ne numanya ne Bible udi wamba ne kabivvwa bikengela kwenza nanku to. Ne pawikala mupiile bwa divwala dya bilàmbà bya bisalula masandi, Nzambi wa mu Dyulu apongolweleku ngàsà Wende mu mwoyi webe, bwa kwikadi wacyenzaku kabidi to kashidi keebe, bwa kwikadi mupiile kabidi ku cintu bu nanku nansha. Byënzèku anu ne Nyuma Mwîmpè akukangwileku cyôci aci ne akuleejeci. Swaku, wêwè udi kuyi ne Nyuma Mwîmpè awu. . .

275 Nwênù balume badi ne bakaji beenu, biikale nubalekela bashaala bamfumu baa nzubu ne banulombola eku ne eku abu, Nzambi wa mu Dyulu asweku anupeeshe ngàsà bwa kushimika dikàsà panshi ne kwaluja cyakabidi mukaji awu ku lungenyi lwende mu lwòlò, eyo, ne amanye ne awu mwaba ngwebe wêwè mu Kilisto. Mpindyewu, kî nne wikale bu mfumu wa cikisu to, kadi wêwè udi mutu wa nzubu. Wavuluka ne, mukaji kavwa nansha mu difuka dya ku cibangidilu to. Yêyè udi anu cintu cyangata ku wêwè, cidi Nzambi mufile, mukupeeshe wêwè, bwa kwikalaye ukukuba, bwa kwikalaye ulama bilàmbà byebe bitooke ne kwikala ukwipikila byakudya, ne bikwabo. Mukaji kî mmfumwebe wa cimbambila nansha.

276 Nwênù bakaji baa beena Amerike nutu nwâtwa eku nwâtwa eku ne mupimbu wa bilaabu kwîsù, ne dyûlù dyela muulu, bu mvula mwa kumata, mbifwanyine kukutukija mu mâyi, kadi kubanga kwela meeji mùdi mfumu wa cimbambila wa mushindu kampana. Ki cyûdi, bwa cilùmaacikàji's, kadi kî mbwa mwànà wa balume mulelela wa Nzambi to. Cya bushuwa.

277 Nzambi anupeesheku ngàsà nwênù balume, bu bânà baa balume baa Nzambi, bwa kwimanyikaku lukutukutu lwa mushindu bu nanku alu. Ncya bushuwa. Anupeesheku ngàsà, bwa kwimansha mfwanka ayi, kulekela diteeleja dya mineku ya bundu ayi, lukutukutu lwònsò alu. Twikalaayi bânà balume baa Nzambi, bwa twamona mwa kwikala ne nsòmbelu udi mukumbanyine Evanjeeliyo.

Bwa muntu kampana upweka mu mùsèsù, wambaku ne: “Ne kùtukù mwena Kilisto, ki yêyè uyaaya wawa. Udi Nzambi uDilejila munda mwende ki yêyè uyaaya wawa, ne muntu wawa's mmwena Kilisto mulelela, bwa piikalaku mwena Kilisto. Udi wêwè mufwanyine kwela meeji mudiye ne mmwenekelu wa cyena kale. Yêyè's nyinàbànzà wa menemene.” Ki bwalu mbwòbù abu's.

278 Ikala mwena Kilisto wa bamanya ne ngwa kweyemenyiibwa, bwalu twètù tudi beenyi panwapa. Panwapa kî n'Kwetu to. Kwetu nku Dyulu. Twètù tudi bânà baa balume ne baa bakaji baa Mfumu kampana, baa Mfumu *awu*. Twikalaayi ne nsòmbel-...twènzàayi bwa ne nsòmbelu wetu ikale nsò—nsòmbelu mumanya ne ngwa kweyemenyiibwa. Twikalaayi ne nsòmbel-... nsòmbelu wíkala mwa kutwa mushinga cintu citudi twamba ne ki citudi aci: mwena Kilisto. Kadi pawikala kuyi mwa kwikala ne nsòmbelu wa mushindu awu to, nanku ulekele kubiikidiibwa ne udi mwena Kilisto, bwalu udi wêwè anu wela bundu pa Kiipacila kiine.

279 Twasakidilaayi, bakwetu, bwa diloolo edi dya luuya lukole, kacya nwasòmba mwab'ewu. Ndi mutwishiiibwe ne kakwakwikala nansha umwe wa kunudi wajimina to, mu Dituku adi. Ndi—ndi—ndi mutwishiiibwe ne nwênù ne mêmè,

bònsò pamwe, netupete ngàsà kumpala kwa Nzambi, bwa ngaamonaku mwa kwimanyina misangu yònsò anu cidi Bulelela aci, nciyiku mwa kunutapa ku mwoyi to, kadi kabiyiku bya kwikala kukokiibwa ku dyùlù kunudi to. Nwamonu anyi? Mémè mufwanyine kwenza nanku, ncyèna mufwanyine kwikala taatù wa mushindu mujaalame to, bu mémè mwa kulekela wanyi mwànà wenza cintu kana cyònsò. Nèmmulongòlòlè. Dinanga kana dyònsò edi nedyènzè nanku. Dinanga mudimu wadi nkulongolola. Ndi muvuluke múvwà mumfundile kabèji aku, dituku adi, Pat. S'ncidi anu naaku. Nenku dinanga mudimu wadi nkulongolola. Ki mudi Bible mwambe. Nenku piikaladi kadiyi dijaalame to, ki bwa cinyi Nzambi utu utulongolola. Mmutunange.

<sup>280</sup> Twikalaayiku ne nsòmbelu, kubangila ku mpindyewu, udi mukumbanyine, ne kalolo ne musangeelu. Kwikadiku ucyuka, wamba ne: “Ee, Nzambi abeneshiibwe, ndi mumanye ne mukaji awu mmuMupete. Yèyè's uvwa mwakule mu myakulu. Ûvwa muje maja mu Nyuma.” Abi mbìmpè. Kadi piikalaye kayi ne mamuma a Nyuma to, Nyuma kènamù to. Yèyè udi anu utentula disaluka dya mushindu kampanda, anyi cintu kampanda, bwalu Nyuma Mwìmpè udi mwa kwikala ne mwoyi anu ku nsòmbelu wa mamuma a Nyuma. Ki mushindu umwepele udiYe mwa kwenza ngwòwò awu.

<sup>281</sup> Nzambi anubeneshe. Twinyikaayaaku mitu yetu, bwa katanci kakese cyanaana.

Nzambi udi mupongolole Bukènkè Bwende mu dituku dya ndekeelu edi. . .Bwòbò abu bwikale buteekiibwe mwab'ewu kumpala kwanyi, bwa Bible Wende, ne fòtò wa Banjelo aba, Bukènkè budi kabuyi buumvwika ebw mu mmwenekelu wa bupaapu cya musaka, cidi nansha beena maalu a mamanya kabayiku bamanye ne Bwòbò abu mbufike mwab'ewu bishi to, kabeenaku mwa kuBuumvwija to. Kadi, Taatù, bwa twètù kaayi tudi ne kusakidila. Wèwè ukaavwa mutwàmbile twètù, ngondo ne ngondo kumpala kwa kwenzekaci, nenku tudi ne disakidila Kùdi.

<sup>282</sup> Swaku bwa bantu, badi babiikidiibwa ku Dìna Dyebe abu, buumuke ku mpekaatu, diloolo edi, Mukalenge, ku bupidya. Swaku, bu mudibi ne. . .Byàkèngedi bwa ngaakule mumishe maalu ndwishangana ne bânà beetu baa bakaji, kabiyi ne mbwalu ncyèna mubanange to, Mukalenge, kadi ncyèna muswe kumona dyabulu ùbàjìngila mu mushindu wa badishinda bafwa, dimwe dya ku matuku adi panshi aa, kadi kukebabo bwa kutuutakeena Neebe mu ngiikadilu wa mushindu awu, paanyima paa bamane kuumvwa Bulelela bwa Nzambi, mushindu ewu. Swaku bwa kuumvwabo ne badi ne dibanza kudi anu bòbò biine, bwa kuyabo kakenketa Mifundu, ne kumona ne ncyà bushuwa anyi. Pa dîbà adi baye ku binù, ne meeji ònsò matooke, bamba ne: “Nzambi, m'Bulelela anyi?” Pa dîbà adi

ki cyònsò cìikalà ne mushinga, Mukalenge, piikalabo ne meeji matooke pa bwalu abu, bwalu Dìyi Dyebe m'Bulelela.

<sup>283</sup> Bantu nyewu batuule bapuwe. Bààbùngì baa kudibo, pàmwápa, mbapete maalu adi mabatape mu mwoyi. Kadi Nyuma wa Nzambi mmwakule naabo, ki bôbò kusòmba bapuwe bwa kuteelejabo. Dìbà didi dyenda dipita. Dìbà dikaadi dipite mu diloolo, ne dikaadi kabidi dipite mu cikondo citudi ne mwoyi. Dìbà dikaadi dyenda dibwela. Buloba bukaadi bwenda bupeta citaleela. Nzambi, mìdimà neyènzè kataataka, ne pashiishe Dilwa dya Mukalenge, bwa kwangata Ekeleeziya Wende kuya nende. Mushindu mwine utudi tuKusakidila bwa bwalu ebu's, Mukalenge!

<sup>284</sup> Tudi tulomba mpindyewu bwa Wèwè kubenesha muntu yònsò udi mu Bwikadi bwa Nzambi. Yònsò udi uteeleja mukaba wa mēyi ewu, Mukalenge, mu nyungulukilu wa buloba bujima, swaku adisake kule ne twitabaayi ne bintu bya kale abi, ne alwe akwacile Nzambi udi ne mwoyi mudimu, alwe èlèMu byende byònsò, ènzè mwakenza mukalenge-mukaji wa ku Sud awu. Yèyè wakalwa, byakamukengela ngondo isatu bwa kufika kuvwa muntu kampanda uvwa uleeja mpala wa Yesu Kilisto, anyi wa Nzambi wa mu Dyulu; Solomo. Yesu wakamba ne: “Yèyè wakalwa mufumine ku bitupa bya kuleekule bya buloba, bwa kuteeleja lungenyi lwa Solomo, kadi monaayi ne udi mutambe Solomo bunene udi apa.” Ne twètù tudi bamanye ne “udi mutambe Solomo bunene” udi mwaba ewu, Nyuma Mwîmpè munene Yèyè mwine udi mwaba ewu, mwikale ukwacila mudimu mu bantu. Mushindu mwine utudi tuKusakidila bwa bwalu ebu's, Taatù. Ndi ndomba dibenesha mpindyewu.

<sup>285</sup> Benesha mpaasata wetu munanga, Mwaneetu Neville. Mukalenge, pândi—pândi mmutangila ne mvuluka midimu yende mikole ya dinanga, mwoyi wanyi udi anu utupika's. Ndi mumunange. Pa kumumona mushindu udiye ukuba mukajende ne bânà bende bakese, ndi—ndi ndomba, Nzambi, bwa Wèwè kumupa dikanda. Umupe mwoyi mukole. Umubeneshe bwa bikwabo bidimu byàbùngì, byàbùngì bya mudimu, mu budimi bunene bwa dinowa mutudi tusanganyiibwa emu.

<sup>286</sup> Benesha bambi naanyi badi basòmbè mwab'ewu diloolo edi aba. Bààbùngì baa kudibo mbeenyi bafumine myaba ya kwa cyanaana. Ndi ndomba bwa Wèwè kwikala naabo kwine aku, Junie ne Mwaneetu Ruddell, ne bantu baa mushinga mukole baa ekeleeziya myanaabo ne ekeleeziya ewu abu, miimane kacya anu yakwata Bukênkè bwa Evanjeeliyo mu bitupa bishiileshiiilangane bya bimenga mu nyungulukilu mwònsò mwamwa, bwa Bukênkè bumwebumwe ebu, balwangana mvita bwa bwalu Bwabu. Twasakidila bwa bantu abu, Mukalenge. Ubakolesheku ku mwoyi. Ne ubape ngàsà wa kutambabo mateeta manene ne bikwabo bidi bilwa pa buloba bwa kuteeta beena Kilisto bònsò ebi.



<sup>287</sup> Ondopaku babeedi ne beena ntatu, Mukalenge. Ikala neetu mu lumingu lulwalwa elu mpindyewu. Utupeku mwoyi mukole. Tuumaleesona tukese ne tukosoloke twa kalaasa kaa Dyalumingu twa mu dituku edi etu, swaku bwa katuumukuku mu myoyi yabo to. Swaku bwa beelanganepu meeji, muunya ne bufuku. Wafilaku mabenesha aa, Taatù. Mu Dìnà dya Yesu Kilisto, mmùndì ndomba nunku. Amen.

<sup>288</sup> Nudi baMunange anyi? [Disangisha didi dyamba ne: “Amen—Muf.] Nudi baCítàbùùje anyi? [“Amen.”] Twìmbààyi cyakabidi musambu wetu mulenga wa ne, “Ndi muMunange, ndi muMunange” awu, patudi tukwatangana bônso pamwe ku byanza apa. Mwaneetu wa bakaji Ungren udi penyi? Udi mwab’ewu anyi, umwe wa kudibo, anyi mwaneetu wa bakaji uvwa mwimbe piano awu, umwe wa ku bainàbànzà mwab’ewu? Ncyèna mumone cisanji aci to. Eyo, nyèyè ewu, inàbànzà udi apa ewu. Ncya bushuwa.

<sup>289</sup> Mvwa muswe, diloolo edi, ne kaneemu kônso, kadi ncyèna mumone Mwaneetu wa balume Ungren to. Mvwa muswe bwa yèyè angimbileku, diloolo edi, *Wèwè Udi Munène’s Wè!* Ngeela meeji ne mwaneetu awu ukaadi mwalukile kumbelu. Nwamonu anyi? Mvwa muumvwe musambu awu mu dinda emu, mèmè kuwanyinsha anu cya bushuwa. Ekelekele, kaa, ekelekele! Mmushaale anu wimba munda mwa mwoyi wanyi’s. Nunku mvwa—mvwa—mvwa muswe kumuumvwa wimba *Wèwè Udi Munène’s Wè!*

<sup>290</sup> Mpindyewu twìmbààyaaku *Ndi MuMunangè*, twètù bônso, cyapamwe. Mpindyewu bwitaayi anu kwìsù cyanaana. Nunku twikalaayi baMweyemene Yèyè mpindyewu, twamba ne: “Mukalenge, kwòkò kwikale kaacintu kaa musunya aka munda mwanyi, ùkùmùshèku, anu mpindyewu. Ùkùmùshè.” Ne wèwè, pambelu, udi umvwa mukaba wa mèyì ewu, paudi umvwa musambu ewu, imba neetu, pa dîbà adi, anu mu nkwasu webe mene mùdì musòmbèle amu.

Piikalabi ne cya nanku cidiku, pawikala mupiishiibwe kudi Dìyì, pawikala wela meeji ne Dyòdì adi kî n’Dìyì to, kenketa Mifundu, umone ne n’Dya bushuwa anyi. Ncikutangila wèwè. Cidi cyumvwija Mwoyi anyi lufu.

Ne pashiije patudi twimba musambu ewu apa, kwòkò kwikale kaacintu kaa musunya mu nsòmbelu webe, kwènàku muswe bwa kwela cyanza cyebe muulu, mu nkwasu webe amu anyi? Ambila bânà beebe ne mukajeebe bèlè byanza byabo muulu, bananga beebe mu nyungulukilu webe amu. Imba *Ndi MuMunangè*, ne fila mwoyi webe kudiYe. Amba ne: “Nkezùlèku, Mukalenge, ku bubi bwònsò.”

Patudi twimba mpindyewu apa, tujuukilaayi kuulu.

Ndi muMunange, ndi . . .

Mukalenge Yesu, ndi ndomba bwa Wêwè kwondopaku bantu, biikala mwa kwangata mishwala eyi pambidi paabu aba. Ndi nyibenesha, mu Dîna dya Yesu Kilisto. Amen.

Ne wakampetela lupandu  
Pa mucu wa Kalvariyo.

<sup>291</sup> Mpindyewu, mu dibenesha dinene edi! Tungunuka wêwè anu ne kuwimba, mwaneetu wa bakaji. Bwitaayi anu kwisù nwikale nwelangana meeji, mu kasunsa kamwe mpindyewu. Tusambilaayi, munda mwa myoyi yetu ne: “Mukalenge Yesu, nkenkètèku. Ndi muKunange cya bushuwa anyi? Wêwè utu mwambe ne: ‘Panwikala baNnange, nenulame mêmè Aanyi mamba. Panwikala baNnange, nenulame Dîyi Dyanyi.’” Ne pathiishe munda mwa mwoyi webe amu, amba ne: “Mukalenge, swaku ndameku Dîyi Dyebe. Swaku nDisokoke munda mwa mwoyi wanyi, bwa ncibengyanganyiku kabidi Neebe mu kwenza kwa mpekaatu to, mbwena kwamba ne, kubenga kwitabuuja cintu kana cyônsò cyûdi Wêwè mwambe.”

<sup>292</sup> Mpindyewu patudi twimba *Ndi MuMunangè* apa, tulabule muntu udi pabwîpî neetu ku cyanza. Olola anu cyanza, wamba ne: “Nzambi akubeneshe, mwaneetu wa balume, anyi mwaneetu wa bakaji.” Bituulubituulu menemene mpindyewu.

“Ndi...” Nzambi akubeneshe, mwaneetu. “Ndi...” Nzambi akubeneshe, mwaneetu wanyi wa bakaji. Nzambi akubeneshe, mwaneetu wa bakaji. Nzambi akubeneshe, mwaneetu wa bakaji. “Ne wakampet-...” Nzambi akubeneshe, mwaneetu wanyi wa bakaji. Nzambi akubeneshe. Nzambi akubeneshe. Nzambi akubeneshe. “mucu wa . . . variyo.”

<sup>293</sup> Mpindyewu twêlààyi byanza byetu muulu kudiYe.

Ndi—ndi muMunange  
Bwalu . . .

Udi ne cintu kampanda, cikwabo, cyûdi muswe kwenza anyi? Ndi muswe bwa wêwè kutangalajangana.

. . . mêmè  
Ne wakampetela lupandu  
Pa mucu wa Kalvariyo.

<sup>294</sup> Nudi baMunange anyi? [Disangisha didi dyamba ne: “Amen.”—Muf.] Kî mmulenga anyi? [“Amen.”] Ndi nsambidila muntu ne muntu wa kunudi, bânà. Mbifwanyine kwikala ne dikwacisha kaayi kûndi bwa kwimana kaaba aka bwa kwamba maalu aa piikalabi ne mêmè, munda mwa mwoyi wanyi, ncivwa ngeela meeji ne nebinukwacishe? Paabi, s’ndi mucyoke ne muzengele. Ncyèna nansha ne bukole bwa kwimana mwab’ewu to. Makàsà akaadi ansaama. Ne bisabaata byanyi, ndi mwimanemu too ne mûngààvu kukopakanamu, ne bikwabo byônsò, mu mushindu wa ne makàsà akaadi manginge buzevu. Kabidi ndi mucyoke be! Ncicyena kabidi mwânà mutekete to,

to. Ne ndi muyiisheyiishe mayiisha a mèbà asatu anyi anaayi, mwikale kabidi nsambidila babeedi, biine abi nyaku muunya ne bufuku. Cìndì mufwanyine kwikala mwimanyine mwine mwab'ewu ncinyi, bwa kubyenza?

Nudi bamanye ne, bidimu byònsò makumi asatu ebi, bu ne bivwa mbwa dimanyika, mèmè's ntu nkaadi munyeemenyeeme cyòcì aci. S'nutu bamanye ne mèmè nciitu ngangata mfranga. Aci nudi bamanye. Nciituku muyàngàte to... Mèmè ewu nkaadiku munwàmbile cintu kampanda mu Dìnà dya Mukalenge kaciyi cyenzeke anyi? S'nudi bamanye ne aci ncyà bushuwa.

Ntu mununange. Dinanga dya Nzambi ndidi mu mwoyi wamyi bwa muntu ne muntu wa kunudi. Mvwa mwa kujinga ne... Mvwa mwa kujinga kushaala mwimane kumpala kwa Nzambi, ngamba ne: "Nzambi, swaku—swaku—swaku mbakwacisheku. Swaku—swaku ngènzèku *cikampanda*." Ncyèna mwa kucyenza to. Bikengela muntu ne muntu imane paa nkaayende. Nwamonu anyi?

<sup>295</sup> Ndi—ndi—ndi ngiitabuujà ne tukaadi pa kubànda twètù bònsò mpindyewu, dimwe dya ku matuku adi panshi aa. Kadi byòbì mwa kwenzeka ne tulaale tulu kumpala kwa cikondo aci, mèmè mwangaciibwe kunudi, vulukaayi ne, nèntuutakeenè neenu Mwamwa. Ndi mumanye ne Mwamwa mudiku. Bikeena-kumona biine bitu binwàmbile maalu ònsò abi, bu muvwabi bipwangane, mbyenzeke anu muvwaYe mubyàmbè amu. Muntu nansha umwe, mu bidimu byònsò ebi, kèna mwa kwambaku kaaba aka ne ntu munwàmbile cintu kampanda civwa mwa kuula kadi kaciyi cyùle to. Buloba bujima, mbamanye aci. Kacya kanutuku banji kumona pa cibumba cya ku cyambilu apa, citubo bambile muntu ne muntu kaciyi Bulelela bwa menemene to. Nwamonu anyi? Bitu anu byùle misangu yònsò. Nzambi umwèumwè awu utu mumpe mushindu wa kutangila dyamwamwa dya ridò wa cikondo. Mèmè kumona bakaji abu ne balume bangeela maboko kunshingu banguupukila, bamba ne: "Kaa, Mwaneetu Branham."

<sup>296</sup> Ncyèna—ncyèna anu mwa kusòmba to. Nenku, mèmè mucyoke, nyaaya, nansha bishi. Nyima udi unsaama. Ne mèmè mwine, dituku dyònsò dicyacyà diiliilà edi... Nkaadi—nkaadi—nkaadi ne bidimu makumi ataanu ne binaayi. Nudi bamanye ne, udi usakidila anu dikenga dikwabo dituku dyònsò dicyacyà diiliilà edi.

Disambila dyanyi didi ne: "Nzambi, undameku ne mutu ku nshingu. Undameku ne mutu ku nshingu, bwa mèmè kuyiisha Dìyì, kushaala mwimane pa Bulelela abu, too ne pàngààmònà mwanaanyi wa balume, Joseph, mufike bukole bukumbane, ne mùle tente ne Nyuma Mwìmpè; ndi mwa kwangata Bible mukulakaji ukaadi musunsuke ewu, kumuteekaYe mu cyanza,

kwamba ne: ‘Mwanaanyi, tungunuka Nende too ne kundekeelu kwa mwoyi webe. KuMudiidiku cibanga to.’”

<sup>297</sup> Mwva ndyambidila ne pàmwāpa Billy uvwa mwa kuyiisha Evanjeeliyo. Nzambi katuku mumubiikile yêyè to.

Kadi ndi ngiitabuuja ne, Joseph yêyè, nansha mucidiku kambodyoto kaa malu makole emu, ndi ngiitabuuja ne Nzambi mmumubiikle. Ki bwa cinyi bânà nende kabatuku mwa kupetangana nende to, yêyè mmulombodi. Nenku ndi—ndi—ndi mumanye ne Nzambi mmumubiikile. Ndi muswe kwikala mmulongesha mu njila wa Dîyì, njila wa Dîyì dya Mukalenge, bwa kiikadi walwa kulekela Dîyì adi to. Ndi muswe kudyenzelaci, mêmè mwine, bu Nzambi mwa kwanyisha. Nenku pângiikalà nkaadi mukulakaje ne mukasòmbele lwà paanyima, ne mwikale mwa kumumona kwaka, mwimane mu cyambilu, wamba ne: “Evanjeeliyo umwèumwè ewu, papa wanyi wakamwimanyina. Nyawu musòmbe mwaba wawa, mukulakaje ne mucibuluke, diloolo edi. Kadi ndi muswe kwangata kaaba kende ne mvwale bisabaata byende, ngiimane mwaba wawa.”

<sup>298</sup> Pa dîbà adi nêntangilè muulu, ngamba ne: “Mukalenge, lekelaaku musadidi Wêbè àyè byandi mu ditalala.” Ki cîndi muswe kumona, bikole menemene. Too ne paalwa diine dîbà adi . . .

<sup>299</sup> Kadi amba tũng bu mêmè mwa kujuuka mu lukongo lukwabo? Ncyèna mwa kujuuka to. Bikengela ndwe ne elu lukongo. Bikengela ngiimane neenu. Nwênù ki badi bakengela mêmè kwimanyina, ne kunufidila mulubu kudi Nzambi, wa Evanjeeliyo ûndi muyiishe. Nudi nwela meeji ne ndi mufwanyine kwimana kaaba aka kadi kukeba bwa kunupambula, nnupatula mu Cintu kampana cîmvwà ngeelela meeji ne ki cya bushuwa anyi? S’ndi anu mufwanyine kunukolesha ku mwoyi bwa kuya kaCyenza. Kadi ndi mumanye ne, padici cya mashimi, ndi muswe kunupatulamu, kunubweja mu cidi cya bushuwa. Bulelela, byumukile mu mwoyi wanyi, Nzambi udi umfidila bujaadiki, ndi mununange, muntu ne muntu, ne dinanga dilelela, dya Nzambi ne dya bwena Kilisto. Nzambi anubeneshe. Nwânsambidilaayikù.

<sup>300</sup> Ncyèna mumanye cidi matuku aanyi acivwavwa mandamine to, kadi ndi mumanye Yêyè udi mulame matuku aanyi acivwavwa awu, nenku pa cyôci aci ki pândi mujaamine.

<sup>301</sup> Ndi ngaaluja cyambilu eci, kudi muntu ûntù nende dyeyemena ditambe kutumbuka, bu musadidi wa Yesu Kilisto, mpaasata wetu, Mwaneetu Neville.



*NSÓMBELU WEBÈ MMUKÛMBÀNYÌNE ÈVÀNJEELIYÒ ANYÌ? LUA63-0630E*  
(Is Your Life Worthy Of The Gospel?)

Diyiisha edi dya Mwaneetu William Marrion Branham, dyakayiishabo musangu wa kumpala mu Anglais mu dyalumingu diloolo, mu matuku 30 a ngondo mwisambombo, cidimu cya 1963, mu Branham Tabernacle mu Jeffersonville, Indiana, U.S.A., ndyumusha pa mukaba wa méyì ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2020 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)